

# Xtiidxza'c Jesucrist ni bacaa San Matew

*Xdiaagulal Jesucrist  
(Lc. 3:23-38)*

<sup>1</sup> Guie zëed laj ree bén naj xdiaagulal Jesucrist, bén zëed ree loj xdiaa rey Davi në loj xdiaa Abraham.

<sup>2</sup> Abraham brii laj xdad Isaac, abi' Isaac gojc xdad Jacob, guiáad Jacob gojc xdad Judá con ree bijchaman. <sup>3</sup> Dxel Judá cwa'man Tamar, abi' guyu xi'n reeman brii laj reeman Fares con Zara. Fares gojc xdad Esrom, Esrom gojc xdad Aram. <sup>4</sup> Aram gojc xdad Aminadab, Aminadab gojc xdad Naasón, Naasón gojc xdad Salmón. <sup>5</sup> Salmón gojc xdad Booz, guiáad xniaa Booz brii laj Rahab. Booz cwa'man Rut, abi' xi'n reeman brii laj Obed. Obed gojc xdad Isaí, <sup>6</sup> Isaí gojc xdad rey Davi. Dxel rey Davi con bén goc lacheel Urías guyu xi'n reeman brii lajman Salomón.

<sup>7</sup> Dxel Salomón gojc xdad Roboam, Roboam gojc xdad Abías, Abías gojc xdad Asa. <sup>8</sup> Asa gojc xdad Josafat, Josafat gojc xdad Joram, Joram gojc xdad Uzías. <sup>9</sup> Uzías gojc xdad Jotam, Jotam gojc xdad Acaz, Acaz gojc xdad Ezequías. <sup>10</sup> Ezequías gojc xdad Mainán, Mainán gojc xdad Amón, Amón gojc xdad Josías. <sup>11</sup> Dxel Josías gojc xdad Jeconías con ree bijchaman, tiamp ni guzu ree bén Israel Babilonia zi'c bén yu' ladxguiib.

<sup>12</sup> Chi ma barii reeman Babilonia lod guzu reeman zi'c bén yu'ladxguiib, gojl Salatiel, xdadam gojc Jeconías. Dxel Salatiel gojc xdad Zorobabel. <sup>13</sup> Zorobabel gojc xdad Abiud, Abiud gojc xdad Eliaquim. Eliaquim gojc xdad Azor, <sup>14</sup> Azor gojc xdad Sadoc, Sadoc gojc xdad Aquim. Aquim gojc xdad Eliud, <sup>15</sup> Eliud gojc xdad Eleazar. Eleazar gojc xdad Matán, Matán gojc xdad Jacob. <sup>16</sup> Jacob gojc xdad Xiëb lacheel Li. Dxel Li gojc xniaa Jesús, bén la gajc Cristo.

<sup>17</sup> Zian gojc, diizd xtiamp Abraham xt xtiamp rey Davi, guyu chidaj generacion, dxel chidaj generacion guyu diizd xtiamp rey Davi xt tiamp ni guzu ree bén Israel Babilonia zi'c bén yu'ladxguiib, abi' zachidaj generacion guyu diizd tiamp ni barii ree bén Israel Babilonia xt chi bidxin dxej gojl Jesucrist loj guidxliuj.

*Gojl Jesucrist  
(Lc. 2:1-7)*

<sup>18</sup> Ze gojc gojl Jesucrist: Li, xniaaman, ma naj tia' Xiëb laaman. Per chi gad reeman tia' lasa', guyu xi'n Li por xSprijt Dios. <sup>19</sup> Abi' Xiëb guial najman benza'c, ad guyéntaman nusa'nxtuman Li. Beenman xgab niro'nladxaman laaman ralanzi. <sup>20</sup> Per la'tgaj cayüjnman xgab zian, balüüloj tijb xianjl Dios lojman loj bacaal, rëb anjl guin lojman:

—Xiëb, xdiaa Davi, ad bal rdxebil tia'l Li, din xindo nüüm por xSprijt Dios zëëdix. <sup>21</sup> Tijb xindoniguiaaw gac xi'n Li, yagu'l lajx “Jesús”, din por laax gra ree xbejnx gac perdon xtol.

<sup>22</sup> Gra ree ni guie gojc persi guzobj xtiidx Dios zi'c gunee bén badëë xtiidxaman loj ree bejn, chi rëbaman:

<sup>23</sup> Tijb biinxduüb chu' xi'n,  
abi' chi galix grii lajx Emanuel,  
rën guiëban: Dios za'në dunuj ree.

<sup>24</sup> Chi baban Xiëb, dxel beenman zi'c gunabee xianjl Dios laaman, cwa'man Li, <sup>25</sup> per ad bagaalt Xiëb laaman xt chi bidxin dxej gojl xi'nman. Dxel bagu' Xiëb laj xindobëz guin JESÚS.

## 2

### *Bignaj ree bén rajc Jesús*

<sup>1</sup> Jesús gojlamen Belén tijb guiedx naaz Judea, tiamp gunabee rey Herodes. Dxel bidxin ree bén rajc, Jerusalén, laa reeman naj magos, za reeman niz oriente. <sup>2</sup> Abi' gunabdiidx reeman, rëb reeman:

—¿Con xrey ree bén Israel, bén ma gojl? Din dunujn diizd duladxan baguaan xbjalamen xanyabaa, zeel zio'pan din yazuxiban lojman.

<sup>3</sup> Chi biguien rey Herodes zian, däd guyunawëëgaman, nëgajc gra ree bén Jerusalén guyunawëëg. <sup>4</sup> Zeel gurejdx Herodes gra ree bixhioz rniabee ree bixhioz, në ree mextr rajc ley, persi gunabdiidxaman loj reeman banguin naj gal Cristo. <sup>5</sup> Dxel rëb reeman:

—Belén naj galaman, tijb guiedx naaz Judea, din ze bacaa bén badëë xtiidx Dios loj ree bejn:

<sup>6</sup> Lüj Belén, tijb guiedx naaz Judea,  
mäjsi guiedx dobëz najl loj gra ree guiedxro' naaz Judea.

Per lasajquil din luguidx Belén guin grii tijb bén  
nabee  
guinijat tēēman da bén Israel reen.

<sup>7</sup> Dxel ralanzi gurejdx rey Herodes bén rajc  
guin ree, persi gunabdiidxaman goc balüüloj bajl  
xanyabaa guin loj reeman. <sup>8</sup> Abi' guxhaalaman  
laa reeman Belén, rēbaman loj reeman:

—Gol wej, gol bignabdiidxchaaw graczi xcwent  
xindobëz guin. Abi' chi yadxejlidi laax, laa gol  
bagojn gajc naj, din nē naj chigzuxib lojx.

<sup>9</sup> Chi gulox rēb Herodes loj reeman zian, dxel  
zē reeman. Abi' bajl xanyabaa baguiaa reeman  
diizd ladx reeman, nedan loj reeman, xt lod yu'  
xindobëz guin guzudxen. <sup>10</sup> Chi baguiaa reeman  
bajl guin, dād babaa reeman. <sup>11</sup> Abi' chi guyu  
reeman lēnū guin, baguiaa reeman xindo guin con  
xniaax Li. Abi' bazuxib reeman gojp reeman laax  
respejt. Dxel guxhal ro' xcaj reeman, abi' baza-  
ladx reeman or, nē yaal, nētēē mirra par xindo  
guin. <sup>12</sup> Chi ma guidxin dxej yaza reeman, dxel  
bagojn Dios laa reeman loj bacaal chitëē yayejc  
reeman niz lod za' Herodes, zianan zeel bayejc  
reeman niz lood ren.

### *Zē reeman Egipto*

<sup>13</sup> Chi ma zia ree bén rajc guin ladx reeman, dxel  
balüüloj tijb xianjl Dios loj Xiēb loj bacaal, rēbaman:

—Bixche, cwa' xindo guin con xniaax, gol chej  
niz Egipto. Ni gol guzuj xt chi ganin lëjt, din zaguül  
Herodes laax din gugütaman laax.

<sup>14</sup> Dxel bixche Xiēb, cwa'man xindobëz guin con  
xniaax, abi' guxhin guin brii reeman zē reeman  
niz Egipto. <sup>15</sup> Ni guzu reeman xt güjt rey Herodes.

Zian guzobj xtiidx Dios ni gunee bén badëë xtiidxaman loj ree bejn, chi rëbaman: “Babedx da xi'nan Egipto.”

*Gunabee Herodes guiët ree xindobëz*

**16** Chi gogbee Herodes guial basquiee ree bén rajc guin laaman, dád bidxe'chaman. Dxel gunabeeman guiët gra ree xindoniguiaaw diizd ree xindo qui gojlri ree xt ree xindo ma yu' ree guia' tio'p iyz, xindo yu' ree Belén në gra ree guiedx riga' niz ni, guial yu'guijcaman ni rëb ree bén rajc guin guial ma gojc tio'p iyz ni baguiaa reeman bajl guin.

**17** Zian gojc cumplid ni bacaa Jeremías, bén badëë xtiidx Dios loj ree bejn, chi rëbaman:

**18** Biguien cha' tibj bejn guiedx Ramá,  
yu' guialroon në guialrbixdiaj,  
Raquelan cayoon por ree xi'nman,  
abi' ad rile't chu gusquiejn laaman guial güjt ree xi'nman.

**19** Per chi güt Herodes, dxel balüüloj tibj xianjl Dios loj Xiëb loj bacaal lod zojb reeman, Egipto, abi' rëbaman lojman:

**20** —Bixche, cwa' xindobëz guin con xniaax. Gol baguiaj niz Israel, din ma güjt ree bén guyën nugüjt laax.

**21** Dxel bixche Xiëb cwa'man xindobëz guin con xniaax, bayejc reeman niz Israel. **22** Per chi gogbee Xiëb guial Arquelao, xi'n Herodes, naj bén canabee niz Judea, bidxebaman naguiaj reeman niz ni. Dxel bagojn Dios laaman loj bacaal din che reeman niz Galilea, dxel zë reeman. **23** Chi bidxin reeman ni, gurej reeman guiedx Nazaret. Zian gojc persi guzobj diidx ni gunee ree bén badëë

xtiidx Dios loj ree bejn, guial grii laj Jesús bén Nazaret.

### 3

*Diidx gunee Waj bén baroobnijs bejn ree  
(Mr. 1:1-8; Lc. 3:1-9, 15-17; Jn. 1:19-28)*

<sup>1</sup> Lén ree dxej ni bidxin Waj, bén baroobnijs bejn ree, loj yujbidx niz Judea catie'chaman xtiidx Dios. <sup>2</sup> Rëbaman:

—Gol bayün xgab por xtolidi din ma zidyob xguialrniabee Dios.

<sup>3</sup> Xcwent Waj guinan bacaa Isaías, bén badëë xtiidx Dios loj ree bejn, chi rëbaman:

Rguien cha' tijb bén rbiidxa' niz loj yujbidx, rëbaman:

“Gol beenchaaw xnejz dux Dad ree Dios,  
gol guxhal tijb nejz nali.”

<sup>4</sup> Con guidxlad camell gojcne xab Waj, abi' lénman bixii tijb guid. Gudaw tñéman bi'tsu con dxijn yu' dajn. <sup>5</sup> Dxel bén Jerusalén ree në los demazri ree bén Judea nëtëë gra ree bén zojb gadéd ro' guiw Jordán, brii reeman bicaagdiajg reeman ni rniece Waj. <sup>6</sup> Dxel guxhoobdol reeman, abi' baroobnijs Waj laa reeman loj guiw Jordán guin.

<sup>7</sup> Per chi baguiaa Waj zien ree bénfarisew në ree bén saducew bidxin din tiobnijs reeman, rëbaman loj reeman:

—¡Xi'n xindxbab! ¿Chu bagojn läjt din laadi loj castiro' ni zëed? <sup>8</sup> Gol gubajn zagdxe din guiguien guial waliquidi ma bayüjndi xgab por xtolidi, <sup>9</sup> abi' ad bal rlies xvalorgajquidi, rëbidi: “Dunujn zio'p loj xdiaa Abraham”, din naj rni läjt xt guiaj guie

ree zile' yayüjn Dios xdiaa Abraham. **10** Abi' ree bén ad zinalt xnejz Dios zi'c rayal, ma zidyob dxej ni güünné Dios laa reeman zi'c rüjnné bejn tijb yag chi ad rtiatan, rutüögaman laan din che'can. **11** Naj rni lojdi, curobnijsan läjt con nijs zi'c tijb sen guial ma bayüjndi xgab por xtolidi. Per bén zidnal naj, laaman guroobnijs läjt con xSprijt Dios con né bajl, din laaman mazri rajp guialrniabee guial lon, abi' ni'qui xgurëchaman ad rayalt gaxhiecan. **12** Abi' zi'c raya trigo zian güünnéman bejn. Din bén zinal ree xnejz Dios chinéman laa reeman lod rniabeeman, guíaad ree bén ad zinalt xnejz Dios guixhiaalaman laa reeman loj bajl ni ad yu't dxej yayü'.

*Gurobnijs Jesús  
(Mr. 1:9-11; Lc. 3:21-22)*

**13** Lén ree dxej zii guza Jesús niz Galilea wejman ro' guiiw Jordán lod za' Waj, din guroobnijs Waj guin laaman. **14** Per ad nuyéntaman nuroobnijsaman Jesús, rëbaman lojman:

—Lüj rayal guroobnijs naj, ad najt rayal guroobnijs lüj.

**15** Dxel rëb Jesús lojman:

—Yo guna gac zian, din mazri zagdxe yaguieen gra zi'c rniabee Dios.

Dxel cwëjb Waj baroobnijsaman laaman. **16** Chi gulox guroobnijsaman, naabzi bariiman loj nijs guin, dxejczi bixal xanyabaa, abi' baguiaaman zidguiajt xSprijt Dios zi'c tijb palom xt guijcaman.

**17** Dxel biguien cha' tijb bejn xanyabaa, rëbaman:

—Bén guie naj da Xi'nan, bén rën da'tan bén rabaanë' tëën.

## 4

*Gojc Jesúś prueb  
(Mr. 1:12-13; Lc. 4:1-13)*

<sup>1</sup> Dxel binë xSprijt Dios Jesúś niz loj yujbidx, din güün xindxab laaman prueb.

<sup>2</sup> Ni guzuman tiuu dxej tiuu guiaal sin guialraw, dxel gulaanman. <sup>3</sup> Abi' bidxin xindxab beenx laaman prueb, rëbix:

—Bal wali najl xi'n Dios, gunabee yayajc guiaj guie ree guiadxtil.

<sup>4</sup> Per badxi' Jesúsan rëbaman:

—Loj xtiidx Dios rëb: “Ad ganaxtizi guiadxtil guiban bejn, négajc gra diidx rniece Dios.”

<sup>5</sup> Dxel binë xindxab guin laaman Jerusalén, abi' gulë'pix laaman guiijc yadooro' zojb luguidxzii,  
<sup>6</sup> abi' rëbix lojman:

—Bal wali najl xi'n Dios, gudidya' diizzd guie, din loj xtiidx Dios rëb:

Dios guixhiaal ree xianjlamан din guinia reeman lüj.

Guiniaaz reeman lüj con yaa reeman chitëē ladx ni'czi tijb guiaj guia'l.

<sup>7</sup> Badxi' Jesúsan, rëbaman:

—Rëb gajc loj xtiidx Dios: “Ad güünl prueb xDadil Dios.”

<sup>8</sup> Dxel binë xindxab guin laaman tijb guiijc guia' ya da't, lod balüük laaman gra ree guiedx riga' loj guidxliuj në ree guialnaza'c yu' loj reen. <sup>9</sup> Abi' rebix lojman:

—Naj gune gra ree ni guie lojl, bal guzuxibil lon guiniajchi' tëél naj.

<sup>10</sup> Badxi' Jesúsan, rëbaman:

—Biquied, xindxab, din loj gajc xtiidx Dios rëb:  
“Gunajchi' xDadil Dios, tijbzi lojman been sirv.”

<sup>11</sup> Dxel biquied xindxab guin lojman, abi' bi't  
tio'p choon ree xianjl Dios persi been reeman  
laaman sirv.

*Rzuloj Jesús rtie'chaman xtiidx Dios niz Galilea  
(Mr. 1:14-15; Lc. 4:14-15)*

<sup>12</sup> Chi gogbee Jesús guial yu' Waj ladxguiib,  
bayejcaman Galilea. <sup>13</sup> Per ad gurejtraman guiedx  
Nazaret, wejman bisobaman guiedx Capernaum,  
tijb guiedx riga' gajxh ro' nijs Galilea niz lod goc  
ree xdajn Zabulón në Neftalí. <sup>14</sup> Zian gojc persi  
gojc cumplid ni bacaa Isaías, bén badëë xtiidx Dios  
loj ree bejn, chi rëbaman:

<sup>15</sup> Bén Zabulón con ree bén Neftalí,  
në ree bén zojb gajxh ro' nijsdoo, nëtëë ree bén  
zojb xijch guiiw Jordán

con gra ree bén zojb niz Galilea,  
lod zojb ree bén ad najt bén Israel,

<sup>16</sup> gra reeman gubajn loj xcay.

Yan ma brii tijb biani par laa reeman,  
abi' biani guin guxhal xquiarguejn ree bén ad  
nabant xnejz loj Dios.

<sup>17</sup> Diizd dxejzii guzuloj gutie'ch Jesús xtiidx Dios,  
rëbaman:

—Gol bayüjn xgab por xtolidi din ma zëëd gajxh  
xguialniabee Dios.

*Rbejdx Jesús tajp ree bén gac xbejnman  
(Mr. 1:16-20; Lc. 5:1-11)*

<sup>18</sup> La'tgaj caza Jesús gajxh ro' nijsdoo Galilea,  
baguiaaman Simón bén la gajc Bëd con bijchaman

Andrejs. Cuzaal reeman guijxh loj nijs din guini-aaz reeman bëjl. Guial laan naj xchiin reeman.  
**19** Dxel rëb Jesús loj reeman:

—Gol tanal naj, din gulün läjt xhienaaag güundi din guto'pidi bejn par Dios luar guiniaazidi bëjl.

**20** Loj hor guin gajc basa'n xguijxh reeman abi' zinal reeman laaman.

**21** Guzaman zatibda'n dxel baguiaaman zatio'p ree bejn, Jacob con bijchaman Waj, xi'ngaan ree Zebedeo. Yu' reeman loj tijb barcw con xdad reeman cayünchaaw xguijxh reeman. Dxel gurejdx Jesús laa reeman, **22** abi' basa'n reeman barcw guin con xdad reeman, dxel laa zinal gajc reeman laaman.

*Rulüü Jesús zien ree bejn  
(Lc. 6:17-19)*

**23** Wej Jesús guidibczi niz Galilea, abi' tijbgaj ree guiedx wejman lën ree yadoo persi balüuman bejn ree. Balüuman laa reeman xtiidx Dios, rëbamán loj reeman xhienaaag naj xguialrniabee Dios, abi' bayünman bén rdoob ree në gra ree bén rajc xhi-etëëz guialguijdxan. **24** Guidibczi niz Siria bire'ch xtiidx Jesús, abi' bidnë reeman bén cusagdiaj ree gadxagayaa ni mal në graloj ree guialguijdx, bén yu' ree xindxab luxdoo, në ree bén rëjtya', nëtëë ree bén ad rile't suli, abi' bayün Jesús laa reeman. **25** Dád zien ree bejn binal laaman, bén Galilea ree, bén zëëd ree Decápolis, bén Jerusalén ree, bén zëëd ree niz Judea në ree bén zëëd stiblad ro' guiw Jordán.

## 5

*Ni baliüü Jesúś tijb guijc guia'*

<sup>1</sup> Chi baguiaa Jesúś bén guixiuj ree, wë'paman tijb guijc guia' abi' gurejman, dxel gubig ree xbejnan lojman. <sup>2</sup> Abi' guzuloj culüuman laa reeman, rëbaman:

*Xiquilbaa ree bejn*

(Lc. 6:20-23)

<sup>3</sup>—Xiquilbaa ree bén ragbee guial ryaadx gagnë Dios laa reeman, din por zian yayal reeman lod rniabeeman.

<sup>4</sup> 'Xiquilbaa ree bén yu'naya, din Dios yagu' luxdoor reeman zagdxe.

<sup>5</sup> 'Xiquilbaa ree bén naj bén chaawladx, din laa reeman tia' guidxliuj ni rëb Dios gudëédaman loj reeman.

<sup>6</sup> 'Xiquilbaa ree bén rzajc zi'c chi rliaan bejn o chi re'caman nijs zian rën da't reeman güün reeman zi'c rniabee Dios, din Dios gagnë laa reeman din güün reeman zi'c ruladxaman.

<sup>7</sup> 'Xiquilbaa ree bén raya lasa', din zian yaya Dios laa reeman.

<sup>8</sup> 'Xiquilbaa ree bén naya loj Dios, din laa reeman guguaa laaman.

<sup>9</sup> 'Xiquilbaa ree bén rüjn naguiejn c wedxenë lasa', din laa reeman grii laj xi'n Dios.

<sup>10</sup> 'Xiquilbaa ree bén cadëd loj guialzi por graloj ni rujnnë bejn laa reeman guial cayüñ reeman zi'c rniabee Dios, din laa reeman yayal lod rniabeeman.

<sup>11</sup> 'Xiquilbaadi, chi rüjnnë reeman lëjt xhiernarajc në chi rnieeguijdx reeman lëjt nëtëë chi rudxiib reeman guijquidi graczi, guial najdi

da bejnan. <sup>12</sup> Gol badxe' luxdoodi nix, gol babaa  
tëe din naroob naj ni gunee Dios lojdi xanyabaa.  
Abi' läjt ragbee guial ziangajc basagzi reeman bén  
badëe ree xtiidx Dios loj ree bejn gocli chi gadidi  
gui't loj guidxliuj.

*Lëjt naj zi'c zëd në zi'c bajl*  
*(Mr. 9:50; Lc. 14:34-35)*

<sup>13</sup> 'Lëjt naj zi'c zëd loj guidxliuj guie. Per bal  
id naxijran, ¿xhieza naag yayajcan naxij zatijb?  
Achetri dxiin güünan, gaz guire'chan abi' chë'p ree  
bejn guijcan.

<sup>14</sup> 'Lëjt naj zi'c tijb biani loj guidxliuj guie, naj  
tëedi zi'c tijb guiedx ni riga' tijb guijc guia' abi'  
ad zajct guiguie'chan. <sup>15</sup> Ad ritiaguij tëet tijb guij  
par guida'cwan lën tijb yagalm, rtiaguijn persi  
rzojban ya din gusnin loj gra ree bén yu' lënü.  
<sup>16</sup> Ziangajc läjt, gol gojc zi'c biani loj ree bejn,  
din chi guguaa reeman ni zagdxe cayüjndi guza't  
reeman xDadidi Dios zagdxe bén yu' xanyabaa.

*Rulüü Jesús xcwent ley*

<sup>17</sup> 'Ad naladxidi zialan par günan ley tiblad,  
ley ni badëe Dios loj Moisejs o ni balüü ree bén  
badëe xtiidx Dios loj ree bejn, zialan par günanan  
cumplid. <sup>18</sup> Din naj rni lojdi, la'tgaj yu' xanyabaa  
në guidxliuj, ad ziquiedt tijb punt o tijb lejtr loj  
ley xt chi gac gra ni naj gac. <sup>19</sup> Zianan zeel bén  
ad ruzoobt tijb mandamient ni zëed loj ley guin  
majsi nidobëz naj mandamient guin, bal rulüü  
tëeman bejn ree güün reeman zian, laaman lasajc  
ta'nzi lod rniabee Dios. Per bén ruzoob gra ree  
mandamient ni zëed loj ley guin, rulüü tħemman  
bejn ree guzoob reeman laan, laaman naj mazri

bén lasajc lod rniabee Dios. <sup>20</sup> Zeel naj rni lojdi, bal id zabajndi mazri zagdxe guial loj ree mextr rajc ley nē ree bénfarisew, ad zayaltidi lod rniabee Dios.

*Rulüü Jesús xcwent guialrdxe'ch lasa'  
(Lc. 12:57-59)*

<sup>21</sup> 'Lëjt ragbee guial rëb Dios loj ree xbéngulalidi: "Ad gugütil bejn, din bén gugüjt bejn yayalaman casti." <sup>22</sup> Per naj rni lojdi, chutëëz bén rdxe'chnë lasa', yayalaman casti, nē bén rniece diidxguijdx lasa' xt loj guxtis zajc cheman, guiáad bén rëb loj lasa' achet sirv lüj, laaman yayal loj bajl yu' gabijl.

<sup>23</sup> 'Zeel bal zinël gon lën yadoo abi' yagaj rusaal-adxil guial yu' bén rdxe'chil, <sup>24</sup> basa'nsii xgonl yagaj, yalojxgaj babenë bén rdxe'chil zagdxe, dxel ma zile' yayejquil din gusa'n xgonl.

<sup>25</sup> 'Bal chu bén rudeed lüj loj guxtis, baya'nnëman diidx zagdxe la'tgaj yu' tiamp, chitëë yayüman lüj loj guxtis, abi' guxtis guin nabee chu'l ladxguiib. <sup>26</sup> Naj rni lüj, ad zariitil ladxguiib guin xtczi quixil gra ni na guxtis guin.

*Rulüü Jesús xcwent guialrzunë lacheel ben ren*

<sup>27</sup> 'Lëjt ragbee guial loj ley rëb: "Ad sunël lacheel ben ren." <sup>28</sup> Per naj rni lëjt, chutëëz bén rüjn xgabmal chi ruguaaman tijb bengunaa, con laan ma beenman dol lën luxdooman por bengunaa guin.

<sup>29</sup> 'Bal laagajc guiaaloj ladbeel rüjn din güünl dol, mazri zagdxe naj gulëen bazaalan zift. Din mazri zagdxe naj nit tiblad guiaalojl luar che guidibil gabijl. <sup>30</sup> Abi' bal laagajc yaa ladbeel rüjn din güünl dol, gutü'n bazaalan zift. Din mazri zagdxe naj nit tiblad yaal luar che guidibil gabijl.

*Rulüü Jesús xcwent guial rala' lasa' bejn  
(Mt. 19:9; Mr. 10:11-12; Lc. 16:18)*

<sup>31</sup> 'Ma bacaagdiajg tēëdi: "Chutëëz bén rala' lacheel, rayal gudéedaman gui'ch lojman guial ma bala' lasa' reeman." <sup>32</sup> Per naj rni lëjt: Xinguaaw rala' xbéngunaa, abi' ad za'nët bëngunaa guin xin ren, laagajc laax cayüjn din sunë xbéngunaax xin ren. Abi' xin tia' bëngunaa guin dolan cayünx.

*Ad rayalt guza't xlia' bejn Dios*

<sup>33</sup> 'Rëb tēë Dios loj ree xbéngulalidi: "Ad guza't xlia'di Dios, rayal güundi cumplid ni rëbidi gudéedidi lojman." <sup>34</sup> Per naj rni lojdi: Ad rayaltczi guza'tidi Dios, ni'qui xanyabaa par chililadx reeman lëjt din ni zojb Dios, <sup>35</sup> ni'qui guidxliuj din loj guidxliuj naj lod ruzuj guia'man, ni'qui Jerusalén din laan naj ladx rey mazri rniabee. <sup>36</sup> Ad guza't tēë guijquidi par chililadx reeman lëjt, din ni'qui tijb guidxguijquidi ad zajct güundi ni ya's o ni naquich ya. <sup>37</sup> Zagdxeli con gol güjdx "an" o "a'n", din los demazri ree ni guinieedi loj xindxbazan.

*Ad yadxi'di ni mal por ni mal  
(Lc. 6:29-30)*

<sup>38</sup> 'Lëjt ragbee guial loj ley rëb: "Bén cwëë guiaalojl, gulëë gajc guiaalojman. Guiáad bén cwëë layil, gulëë gajc layaman." <sup>39</sup> Per naj rni lëjt: Ad yadxi'di ni mal por ni mal, bal chu chëëz xhajg ladbeedi, gol badëë stibladan chëëzaman. <sup>40</sup> Bal chu bén tilë lüj din cwëëxuman xmanguil, badeëë në xchamarril tia'man. <sup>41</sup> Abi' bal rüjn reeman lüj naguiejn güül tijb yuu din sanëlan tib kilometro, guzanën tio'p kilometro. <sup>42</sup> Chutëëz bén rniab

xhienin lojl, badëëdan, bal chu tëë rgui'n xhienin lojl ad bal cwexuul gudëëdilan.

*Guyën bén rdxe'ch lüj  
(Lc. 6:27-28, 32-36)*

<sup>43</sup> 'Ragbee tëëdi rëb ree bejn: "Guyën bén rën lüj, bidxe'ch tëë bén rdxe'ch lüj." <sup>44</sup> Per naj rni lojdi: Gol guyën bén rdxe'ch läjt, gol gurejdx tëë Dios por ree bén rzunal läjt, din güün reeman läjt ni mal. <sup>45</sup> Din zian gaquidi xi'n xDadidi Dios bén yu' xanyabaa, din laaman ruslejn xgubijdxaman par ree benza'c në par ree benmal, rascal tëëman guia par ree bén nabant zi'c rayal në par ree bén ad nabant zi'c rayal. <sup>46</sup> Din bal rëndi ganaxzi bén rën läjt, ¿xhieza tia'di loj Dios zian? Din xt bëndol ree rüjn zian. <sup>47</sup> Abi' bal ganaxzi bén rëndi rugajpdiozidi, ¿xhieza ni zagdxe cayüjndi? Din xt bén ad nünbeet ree Dios rüjn zian. <sup>48</sup> Zeel gol gojc benza'c, zi'c naj xDadidi Dios bén yu' xanyabaa.

## 6

*Xhienaaag gagnë lasa' bejn*

<sup>1</sup> 'Ad güündi ni zagdxe niz loj ree bejn naabzi par yadxaloj reeman läjt. Din bal güündi zian, xDadidi Dios bén yu' xanyabaa achet guneman lojdi. <sup>2</sup> Zeel chi güünl yudar bén ryaadx xhienin, ad guitie'chil diidx par gagbee bejn xhie cayüjnl zi'c rüjn ree bén rusquiee, lën ree yadoo në ree lunejz, din guilies bejn xvalor reeman naj reeman benza'c. Per diidxliczi rnin lojdi, laazan naj ni rayal reeman. <sup>3</sup> Zeel chi güünl yudar bén ryaadx xhienin, ni'czi loj xmiwda'til ad gül diidx ni cayüjnl. <sup>4</sup> Mazri zagdxe lüjzi gagbee ni cayüjnl,

abi' xDadil Dios laaman cuguaa ni cayüjn lüjzi,  
laaman gunee ni rayalil.

*Xcwent xhienaaag cwedx guiniab bejn Dios  
(Lc. 11:2-4)*

<sup>5</sup> 'Chi cwedx guiniabidi Dios, ad güündi zi'c rüjn ree bén rusquiee, bén ruladx ree rzuli par cwedx guiniab reeman Dios lén ree yadoo në ree xquin nejz, din yadxaloj bejn laa reeman. Din naj rni lojdi, laazan naj ni rayal reeman. <sup>6</sup> Per lüj chi cwedx guiniabil Dios, bayu lënü lidxil, basiaaw ro' port, dxel gurejdx gunab Dios bén za'në lüj. Abi' laaman cuguaa ni cayüjn lüjzi, laaman gunee ni rayalil.

<sup>7</sup> 'Chi rbejdx rniabidi Dios, ad radxi'di diidx guin guië'tzi guië't naabzi par gacxhiej xtiidxidi, zi'c rüjn ree bén ad nünbeet Dios. Din laa reeman naladx guial pien ni rniece reeman mazri guidxga' Dios laa reeman. <sup>8</sup> Ad güündi zi'c rüjn reeman, din xDadidi Dios ma ragbeeman xhie ryaadxidi chi gadidi guiniab laan. <sup>9</sup> Zeel chi cwedx guiniabidi Dios, gol güjdx:

Dad, lüj yu' xanyabaa,  
rayal yaya'p da'tan lajl respejt.

<sup>10</sup> Gac zi'c rniabeel.

Gac zi'c rënl loj guidxliuj zi'c rajc xanyabaa.

<sup>11</sup> Banee ni yadaawan guixie guixie.

<sup>12</sup> Been dunujn perdon gra ree ni mal ma baguieenan

zi'c raguieenan perdon bén rüjn ree dunujn ni mal.

<sup>13</sup> Ad guslaal dunujn yaguieenan dol,  
babëë dunujn loj gra ni mal.

**14** 'Din bal güundi perdon bén rüjn läjt ni mal, ziangajc xDadidi Dios bén yu' xanyabaa züjn gajcaman perdon xtolidi. **15** Per bal id züjndi perdon bén rüjn ree läjt ni mal, ziangajc xDadidi Dios ad züjntaman läjt perdon.

### *Xcwent guialrba'n*

**16** 'Chi rba'ndi ad güün lojdi naya, zi'c rüjn ree bén rusquiee din guguiaa bejn guial naba'n reeman. Naj rni lojdi, guial laazan naj ni rayal reeman. **17** Per lüj, chi rba'nl, gudiib lojl gudüjn tää guijquil **18** chitää gagbee ree bejn guial naba'nl. Tijbzi xDadil Dios bén za'në lüj naj bén gagbee laan, abi' laaman gunee lüj ni rayal tia'l.

### *Guialnaza'c yu' xanyabaa (Lc. 12:33-34)*

**19** 'Ad guto'pidi guialnaza'c loj guidxliuj guie lod zajc tiabe reen o xhin reen o chu' xingubaan cwan laa reen. **20** Zagdxeli gol been naguiejn gol been gan guialnaza'c yu' xanyabaa lod ad zacabet reen, lod ad zaxint reen, lod ad zu tää xingubaan cwan laa reen. **21** Lod gapil guialnaza'c guin yagaj su luxdool.

### *Guiaaloj bejn naj zi'c biani (Lc. 11:34-36)*

**22** 'Guiaaloj bejn naj zi'c tijb biani par xcuerpan. Zeel bal cayüjnl ni zagdxe, guidib xcuerpil rajp biani. **23** Per bal cayüjnl ni mal, guidib xcuerpil naj zi'c lod nacay, zi'c naj lod nacaybuu.

### *Dios ya o milia (Lc. 16:13)*

<sup>24</sup> 'Ad zile't chu güün sirv loj tio'p patron, din zadxe'chaman tijbaman abi' guiënman stijbaman, o gacaman benza'c con tijbaman abi' ad zëntaman stijbaman. Zeel ad zile't güündi sirv loj Dios në loj milia.

*Achetczi rayal chu' bejn xgab  
(Lc. 12:22-31)*

<sup>25</sup> 'Naj rni lëjt: Ad chu'di xgab por ni gawidi në por ni guië'di din guibandi, ni'qui por lajd ni gacwidi. Guialnaban mazri lasajc guial loj guialraw, abi' xcuerp bejn mazri lasajc guial loj xabaman. <sup>26</sup> Gol baguiaa ree be rzuj xanyabaa, ad rxübint reeb, ad rato'p tëët reeb guialnaza'c, ad naj tëët lod cu'chaaw reeb guialnaza'c guin. Per xDadidi Dios bén yu' xanyabaa rudëed ni raw reeb. Abi' mazri lasajquidi guial loj reeb. <sup>27</sup> Abi' tëë, ¿wen guial ru da'tidi xgab ma güün lëjt mazri ziool ya?

<sup>28</sup> ¿Chexquiza zeel däd rudi xgab por xabidi? Gol baguiaa xhienaa rni's ree guiaa dajn. Achet dxin rüjn reen ad rguib tëët reen, <sup>29</sup> per ni'qui rey Salomón ad guzujchaawt zi'c za'chaaw ree guiaa majsi mast guzujchaawaman. <sup>30</sup> Abi' bal gui'xh dajn ruzujchaaw Dios yan, majsi guixiezi che'can. Diidxgui lëjt bén ad rliladxza'ct ree laaman, nid zuneeman ni gacwidi ya. <sup>31</sup> Zeel ad rudi xgab xhie gawidi, o xhie guië'di, o xhie gacwidi. <sup>32</sup> Din bén ad nünbeet ree Dios rüjn zian, laa reeman ru xgab por gra ree ni guin. Per lëjt yu' xDadidi xanyabaa, abi' laaman ragbeechaaw xhienin ryaadxidi. <sup>33</sup> Per yalojxgaj gol baguili güündi zi'c rniabee Dios, gol been tëë zi'c rënman, dxel laaman gunee gra ree

ni ryaadxidi. <sup>34</sup> Ad chu'di xgab por ni gac guixie, gol basa'nan par guixie, zagdxeli gol guyu xgab tib dxejgaj.

## 7

*Xcwent guialrula'ch*  
(Lc. 6:37-38, 41-42)

<sup>1</sup> 'Ad gula'chidi bejn chitëë saquidi zian. <sup>2</sup> Din bal rula'chidi bejn ziangajc saquidi, zi'c rüjnnëdi bejn ziangajc güünnë reeman läjt. <sup>3</sup> Ad gula'chidi bén ren por falt dobëz ni rajpaman, zagdxeli gol guyu xgab por falt naroob ni rajpidi. <sup>4</sup> Abi' bal mazri falt naroob rajpidi, ¿xoza guiëbidi loj stiwb bejn: "Ad laat naj ni rüjnl"? <sup>5</sup> ¡Bén rusquiee! Yalojxgaj gol been zi'c rayal, chi ma rüjndi zian dxel ma zile' guiëbidi loj stiwb bejn: "Ad laat naj ni rüjnl."

<sup>6</sup> 'Ad güündi naguiejn güüncwent ree bén ad rënt güüncwent xtiidx Dios, chitëë xhie güünnë reeman läjt. Din bal güündi zian, laan naj zi'c chi ruzaal bejn tijb ni nagle' loj bë'cw, o chi ruzaal bejn tijb ni lasajc loj cüch abi' chë'pzib guijcan.

*Ni guiniabidi zaca'dan*  
(Lc. 11:9-13; 6:31)

<sup>7</sup> 'Naj rni läjt: Gol gunab loj Dios, abi' laaman gunee ni rniabidi. Gol baguiilaman, zadxejlidi laaman. Gol gurejdx gunabaman, züjncwantaman läjt. <sup>8</sup> Din bén rniab, zaca'man. Abi' bén rguil, zadxejlaman, guiáad bén rbejdx rniab laaman, züjncwantaman laaman.

<sup>9</sup> 'Lëjt najdi dad, ¿wen zudëëdi tijb guiaj loj xi'ndi ya chi guiniabix guiadxtil?, <sup>10</sup> ¿o zudëëdi tijb bëël

ya chi guiniabix bëjl? <sup>11</sup> Nacli lëjt najdi bëndol rajc rudëedi ni rën xi'ndi. jDiidxgui xDadidi bén yu' xanyabaa, nid zudëédaman ni zagdxe loj ree bén rniab laan ya!

<sup>12</sup> 'Gol beennë ree bejn zi'c rëndi güünnë reeman lëjt. Din zian rniabee xley Dios në ni bacaa ree bén badëë xtiidxaman loj ree bejn.

*Port nadëë  
(Lc. 13:24)*

<sup>13</sup> 'Gol been naguiejn din chu'di niz ro' port nadëë. Din port gulajg në nejz gulajg, laa reen naj ni zinë bejn loj nejz mal, abi' zien bejn zë loj nejz guin. <sup>14</sup> Per port nadëë guin në nejz nadëë guin laa reen naj ni rnë bejn lod yu' guialnaban tiblayaa, abi' ta'nzi ree bejn zë loj nejz guin.

*Por ni rüjndi zayünbee ree bejn lëjt  
(Lc. 6:43-44)*

<sup>15</sup> 'Gol gojp ciudad con ree bén rusquiee rëb rudëed reeman xtiidx Dios. Din rulüü däd bén chaawladx reen, per rüjnzi reeman par gusquiee reeman bejn. <sup>16</sup> Per zayünbeedi laa reeman por ni rüjn reeman, din ad rtiat uv loj yaquiëjch ad rtia tëét higo loj gui'xh guiëjch. <sup>17</sup> Zeel gra yag zagdxe rtia ni zagdxe lojn. Guiáad gra yag guijdx rtia ni guijdx lojn. <sup>18</sup> Ad rtiat ni guijdx loj yag zagdxe, ad rtia tëét ni zagdxe loj yag guijdx. <sup>19</sup> Gra yag ad rtiat ni zagdxe, rirugan dxel re'can. <sup>20</sup> Ziangajc lëjt zayünbeedi laa reeman por ni rüjn reeman.

*Ad grat bejn chu' lod rniabee Dios  
(Lc. 13:25-27)*

<sup>21</sup> 'Ad grat ree bén na lon: "Dad, Dad," chu' lod rniabee Dios, ganaxzi ree bén rüjn zi'c rën da

Dadan, bén yu' xanyabaa. <sup>22</sup> Dxejzii, zien ree bén na lon: "Dad, Dad, por lüj batie'chan xtiidxil, abi' guial baza'tan lajl balëen xindxab ree luxdoo ree bejn, baguieen tœen zien ree milagr guial baza'tan lajl." <sup>23</sup> Dxel guiën loj reeman: "Ad benbeetczan léjt, gol gubi'ca lon béndol."

*Tio'p loj cimiant  
(Lc. 6:47-49; Mr. 1:22)*

<sup>24</sup> 'Chutëöz bén rucaagdiajg da diidxan abi' rünman ni rën, laaman naj zi'c tijb bén nasin gules xcimiant lidx loj guiaj. <sup>25</sup> Abi' gol guia, dxel biguiajt nijs ro' gubi' tœë bidoxh, gulaj reen lad yu guin, per ad gulenxantan guial naj xcimiantan loj guiaj. <sup>26</sup> Per bén riguiejn da diidxan abi' ad rüjntaman ni rën, laaman naj zi'c tijb bén ad nasint bazoob lidx loj üx. <sup>27</sup> Abi' chi gol guia biguiajt nijs naroob, gubi' tœë bidoxh. Abi' gulaj reen lad yu guin zianz gulenxanan, ni'qui tibda'nan ad baya'nt.

<sup>28</sup> Chi gulox guneenë Jesús bén guin ree, graczi reeman badxa da't loj zi'c balüüman laa reeman, <sup>29</sup> guial rulüüman laa reeman zi'c bén rajp guialriabee, ad zi'c rulüüt ree mextr rajc ley.

## 8

*Rayüjn Jesús tijb bén rajc guialguijdx la lepra  
(Mr. 1:40-45; Lc. 5:12-16)*

<sup>1</sup> Chi baza Jesús ruguia' guin, däd zien bejn nal laaman. <sup>2</sup> Dxel gubig tijb bejn lojman rajcaman guialguijdx la lepra, abi' bazuxibaman lojman, rëbaman:

—Dad, bal tiëbil, zile' yayüjnl naj.

<sup>3</sup> Dxel basli yaa Jesús baqui'man laaman, rëbaman:

—Rënán. Bayajc.

Chi rëb Jesús zian, loj hor ziigajc biquied guial-guijdx guin abi' bayaman. <sup>4</sup> Dxel rëb Jesús lojman:

—Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël zi'c gunabee Moisejs, din gagbee gra ree bejn guial ma bayajquil.

*Bayajc xmojs tijb bén suldad rniabee ree suldad  
(Lc. 7:1-10)*

<sup>5</sup> Chi guyu Jesús luguidx Capernaum, tijb suldad Rom rniabee ree suldad bibig lojman, guzajcaman laaman liaadx, <sup>6</sup> rëbaman:

—Dad, laa da mojsan naga' lidxan ragxuux. Ad rile't chixchex, dák cusagzi guialguijdx guin laax.

<sup>7</sup> Dxel rëb Jesús lojman:

—Gan din yayünan laax.

<sup>8</sup> Badxi' bén rniabee ree suldad guinan, rëbaman:

—Dad, ad rayaltan chu'l lidxan, per gunee diizzd guie din yayajc da mojsan. <sup>9</sup> Din zi'c naj yu' ree bén rniabee naj, ziangajc naj yu' ree da suldadán xin rniabeen. Chi rën loj tijb reex: “Wej”, rejx, chi rën loj stibix: “Guda,” ri'tix. Abi' chi rë loj da mojsan: “Been ni guin”, rüjnzan.

<sup>10</sup> Chi biguiejn Jesús zian, dák badxalojman abi' rëbaman loj ree bén zinal laaman:

—Naj rni lojdi, ni'qui Israel ad wadxaaglojtan tijb bén rliladx Dios zi'c rliladx bén guin Dios.

<sup>11</sup> Naj rni lëjt, dák zien ree bén gralad yaval gawnë Abraham, né Isaac, né Jacob lod rniabee Dios.

<sup>12</sup> Guiáad ree bén rayal niu lod rniabee Dios, laa

reeman yayal lod nacay da't lod goon reeman lod gaw tëë lay reeman.

<sup>13</sup> Dxel rëb Jesús loj suldad rniabee guin:  
—Baguaj lidxil, gac tëë zi'c ma bililadxil.  
Abi' loj hor guin gajc bayajc xmojs bén guin.

*Rayüjn Jesús xnasuegr Béd  
(Mr. 1:29-31; Lc. 4:38-39)*

<sup>14</sup> Chi we Jesús lidx Béd, baguiaaman xnasuegr Béd naga'man yu'man xliaa. <sup>15</sup> Dxel gunaazaman yaaman, abi' bariiman xliaa guin, dxel bixcheman guzuloj cuyaanman laa reeman.

*Rayüjn Jesús zien ree bénragxuu  
(Mr. 1:32-34; Lc. 4:40-41)*

<sup>16</sup> Chi ma caxhin, binë ree bejn zien ree bén yu' xindxbab luxdoo loj Jesús. Abi' con tijb diidx ni guneman babëëman xindxbab guin luxdoo reeman, bayün tëëman gra ree bénragxuu. <sup>17</sup> Zian gojc persi gojc cumplid ni rëb Isaías, bén badëë xtiidx Dios loj ree bejn, chi rëbaman: “Laaman zignë dux guialguijdx ree, laa tëëman zignë dux guialzi ree.”

*Bén rën chinal Jesús  
(Lc. 9:57-62)*

<sup>18</sup> Chi baguiaa Jesús békenguixij nayaw laaman, gunabeeman tédaman stiblad ro' nijs naj yagaj.

<sup>19</sup> Dxel gubig tijb mextr rajc ley loj Jesús, rëbaman:  
—Mextr, rënan guidnaalan lüj bantëëz guin chel.

<sup>20</sup> Abi' rëb Jesús lojman:  
—Bëz ree yu' xbiliaa reeb, abi' ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

<sup>21</sup> Dxel rëb stijb ree bén zinal laaman:

—Dad, baslaa naj gabenë' da dadan xt chi  
guiëtaman.

**22** Per rëb Jesùs lojman:

—Tanal naj, basa'nman con ree bén ad rënt  
guidnal naj, laa reeman guquie'ch laaman chi  
guiëtaman.

*Racwëëz Jesùs bidoxh*  
(*Mr. 4:35-41; Lc. 8:22-25*)

**23** Guyu Jesùs loj barcw con ree xbejnman, **24** abi'  
la'tgaj zë reeman loj nijs guin dxejlczi gubi' tijb  
bidoxh, ma cazëebczi barcw guin xan nijs. Per  
Jesùs naga'yëjsaman. **25** Dixel bicwëën ree xbejn-  
man laaman, rëb reeman:

—¡Dad, gunaj dunujn! ¡Ma cayzëëban xan nijs!

**26** Badxi'man laan rëbaman:

—¿Chexc zeel dák rdxebidi?    ¿Chexc zeel ad  
rliladxza'ctidi naj?

Dixel bixcheman abi' gunabeeman bacwëëz bi  
guin në nijs guin. Loj hor ziigajc babedxe reen.

**27** Abi' ree xbejnman badxa da't loj reeman, zianz  
gunabdiidx loj lasa' reeman, rëb reeman:

—¿Chu bén guin, zeel xt bi në nijs ruzoob xtiidxa-  
man?

*Tio'p ree bén yu' xindxab luxdoo*  
(*Mr. 5:1-20; Lc. 8:26-39*)

**28** Chi bidxin Jesùs stiblad ro' nijs guin, loj  
xguidxliuj ree bén Gadara, dixel tio'p ree xin-  
guiaaw yu' xindxab luxdoo brii reex ląd ree baa  
abi' wej reex loj Jesùs. Dák nadoxh reex, zeel ad  
rile't chu tèd lunejz guin. **29** Chi baguiaa reex Jesùs,  
gurixdiaj reex rëb reex:

—¿Xhie rënl con dunujn, Jesús, Xi'n Dios? ¿Zëëdil guie ya din gusagzil dunujn chi gadli dxej guidxin?

<sup>30</sup> Per gajxh yagaj za' zien ree cüch, cayaw reeb,  
<sup>31</sup> abi' guzajc ree xindxab guin liaadx loj Jesús, rëb reex:

—Bal yabëël dunujn, banee mod yadxu'n lën ree cüch guin.

<sup>32</sup> Dxel rëb Jesús:

—Gol wej.

Dxel barii ree xindxab guin luxdoo ree bén guin bayu reex lën ree cüch guin. Abi' gra reeb guzuloj cuxüün zianz bitidia' reeb ro' tijb bala' xt loj nijs, lod gu' reeb nijs abi' güjt reeb.

<sup>33</sup> Abi' ree bén cayajp cüch guin ree, baxüün reeman. Dxel chi badxin reeman luguiedx guin, be reeman diidx gra ni goc në gra ni guzac ree bén yu' ree xindxab guin luxdoo. <sup>34</sup> Dxel gra ree bén guiedx guin brii wej lod za' Jesús, abi' chi baguiaa reeman laaman, guzajc reeman laaman liaadx, din yazaman ladx reeman.

## 9

*Bayüjn Jesús bén nëjt xcuerp*

*(Mr. 2:1-12; Lc. 5:17-26)*

<sup>1</sup> Dxel bayu Jesús loj tijb barcw, badëdaman stiblad ro' nijs guin abi' badxin ladxaman. <sup>2</sup> Yagaj binë ree bejn tijb xin nëjt xcuerp, naga'x loj da. Chi baguiaa Jesús guial rliladx reeman laaman, rëbaman loj xin ragxuu guin:

—Bagu' luxdool zagdxe, xi'n. Ma benan perdon xtolil.

<sup>3</sup> Dxel tio'p choon ree mextr rajc ley been reeman xgab: “Diosan rüjnx tiblad guial rnueex zian.”

<sup>4</sup> Per guial gogbee gajc Jesús xhie xgaban cayüjn reeman, dxel rëbaman loj reeman:

—¿Chexc zeel rüjndi xgabmal? <sup>5</sup> ¿Conin mazri nawéeg gac? ¿Guial guiën ya: “Ma benan perdon xtolil” o guiën: “Bixche, guza”? <sup>6</sup> Per yan, gulün lëjt guial naj, Bén guxhaal Dios ra'pan guialrniabee loj guidxliuj guie par günan perdon dol ree.

Dxel rëb Jesús loj xin ragxuu guin:

—Bixche. Baca' ni go'til loj. Baguiaj lidxil.

<sup>7</sup> Laa bixchegajquix zia lidxix. <sup>8</sup> Chi baguiaa ree bén guin zian, bidxeb reeman, abi' baza't reeman Dios zagdxe por guialrniabee ni badëëman loj ree bejn.

### *Rbejdx Jesús Matew*

(*Mr. 2:13-17; Lc. 5:27-32*)

<sup>9</sup> Chi baza Jesús yagaj ziaman, baguiaaman tijb xin la Matew. Zojbix lod ruquijxix impuest, abi' rëbaman lojx:

—Tanal naj.

Dxel bisu Matew zinalix laaman.

<sup>10</sup> Tijb dxej chi cayaw Jesús lidx Matew con zien ree bén ruquijx impuest në ree bén zëeb xtiidx ad nabant xnejz, gra reeman zojbnë Jesús xan mex con ree xbejnman. <sup>11</sup> Chi baguiaa ree bénfarisew zian, gunabdiidx reeman loj ree xbejn Jesús rëb reeman:

—¿Chexc zeel cayawnë xmextridi bén ruquijx ree impuest në ree bëndol?

<sup>12</sup> Chi biguiejn Jesús ni rëb reeman, dxel rëbaman:

—Bénnadaan ree ad ryaadxt reeman doctor, bénragxuu ree laa reeman ryaadx doctor. <sup>13</sup> Gol chej, gol basiid xhie rën guiëb loj xtiidx Dios lod

rëb: “Ni mazri rënan naj guial yaya lasa'di luar guidnëdi gon lon.” Yan, naj ad zialtan par ree benza'c, zialan par ree bëndol, din yayüjn reeman xgab por xtol reeman.

*Rniabdiidx reeman loj Jesús xcwent guialrba'n  
(Mr. 2:18-22; Lc. 5:33-39)*

<sup>14</sup> Dxel ree xbejn Waj, bén baroobnijs bejn ree, bibig reeman loj Jesús, zianz gunabdiidx reeman lojman, rëb reeman:

—¿Chexc zeel dunujn con ree bénfarisew dád zienvolt raba'nan, guiáad ree xbejnl ad rba'nt reeman?

<sup>15</sup> Badxi' Jesúsan rëbaman:

—Lod yu' guialruxhliaa, ¿wen runaya ree biooz ya chi za'në xin cuxhliaa guin laa reeman? Per guidxin dxej chiquiedix, dxel guiba'n reeman.

<sup>16</sup> 'Achut rata' lajd cüb loj lajd yojx din zaxü'n lajd cüb guin, abi' mazri quixya'n lajd yojx guin.

<sup>17</sup> Ad rgu' tëet reeman vin cüb lën anfr yojx din zaxy'a' anfr yojx guin, abi' zi'c anfr guin zi'c vin guin zaxin reen. Zeel naj guial chu' vin cüb lën anfr cüb, din ni'qui tijb reen ad zaxint.

*Bayajc xi'n Jairo nē bégunaa bagaal xab Jesús  
(Mr. 5:21-43; Lc. 8:40-56)*

<sup>18</sup> La'tgaj canee Jesús zian, bidxin tijb bén rniabee lën xyadoo ree bén Israel, abi' bazuxibaman loj Jesús, rëbaman:

—Yangajczi güjt da xi'ndxa'pan, per bal gui'til guixhioob yaal guijquim zabann.

<sup>19</sup> Dxel zinë Jesús laaman con ree xbejn Jesús.

<sup>20</sup> Abi' tijb bégunaa ragxuu ma gojc chiptio'p ijj ad rbëzt ryajbaman rejn, gubigaman niz xijch Jesús

abi' bagaalaman guia' xabaman, <sup>21</sup> guial gunal-adxaman: "Bal gugaalaman majsi xabzaman, za-yajcaman." <sup>22</sup> Per badxi' loj Jesús, abi' baguaadx-ijchaman béngunaa guin, dxel rëbaman lojman:

—Zagdxe bagu' luxdool, xi'n. Ma bayajquil guial bililadxil naj.

Abi' loj hor ziigajc bayajc bén guin.

<sup>23</sup> Chi bidxin Jesús lidx bén rniabee guin, baguaaman ma riga' ree xinrucwejdx din chiquie'ch reex xi'nman, abi' ree bejn roon rbixdiaj reeman guijquim. <sup>24</sup> Dxel rëb Jesús loj reeman:

—Gol barii guie, din ad güjtt bindo guin, naga'yëjszim.

Abi' baxijdxnë reeman laaman. <sup>25</sup> Chi ma barii reeman, zianz guyuman. Gunaazaman yaa bindo guin dxel bixchem. <sup>26</sup> Abi' guidib niz yagaj bire'ch diidx ni goc.

### *Rayüjn Jesús tio'p bénlutia'p*

<sup>27</sup> Chi baza Jesús yagaj, binal tio'p bénlutia'p laaman, rbixdiaj reeman, rëb reeman:

—¡Jesús, xdiaa Davi, baya dunujn!

<sup>28</sup> Chi badxin Jesús lod zojbaman, dxel bibig ree bén guin lojman, abi' gunabdiidxaman loj reeman, rëbaman:

—¿Rliladxidi ya guial zile' yayünan lëjt?

Badxi' reeman laan rëb reeman:

—Raliduladxan, Dad.

<sup>29</sup> Dxel bagaal Jesús guiaaloj reeman, rëbaman:

—Gac zi'c rliladxidi.

<sup>30</sup> Abi' bayajc guiaaloj reeman, dxel rëb Jesús loj reeman:

—Ad bal chu loj guiëbidi guial bayajc guiaalojdi.

<sup>31</sup> Per naabzi baza reeman yagaj, guzuloj catie'ch reeman diidx guidib niz yagaj ni been Jesús.

### *Rayüjn Jesús tijb bengop*

<sup>32</sup> Chi baza ree bén bayüjn Jesús guiaaloj, dxel bidxinnë ree bejn tijb bengop, yu' xindxab luxdooman. <sup>33</sup> Abi' guloxzi babëë Jesús xindxab guin luxdoo bengop guin, laa guzuloj gajc caneeman. Abi' dát badxaloj ree bejn, rëb reeman:

—Ad goct waguaa ree lasa' milagr guie niz Israel.

<sup>34</sup> Per ree bénfarisew rëb reeman:

—Bén guin rabëë xindxab luxdoo ree bejn por xguialrniabee gajc xindxab rniabee ree xindxab.

### *Raya Jesús bejn ree*

<sup>35</sup> Wej Jesús gra ree ciuda në ree guiedx ni riga' niz yagaj, abi' beegaj lod rejman ruman lën ree yadoo persi rulüüman bejn ree xtiidx Dios, rëbaman loj reeman xhienaaag rniabee Dios, rayüjn téeeman graloj guialrdoob në graloj guialguijdx ni rajc ree bejn. <sup>36</sup> Chi baguaa Jesús benzien guin ree, bayaman laa reeman, guial dát naya riga' reeman, riga' reeman zi'c xiil ad rya'pt. <sup>37</sup> Dxel rëbaman loj ree xbejnman:

—Walican zien bejn rën gucaagdajg xtiidx Dios, per ad zient bén gulüü laa reeman yu'. <sup>38</sup> Zeel gol gunab loj Dios din guixhiaalaman mazri ree bén gulüü laa reeman.

## 10

*Gulej Jesús chiptio'p ree apóstoles  
(Mr. 3:13-19; Lc. 6:12-16)*

<sup>1</sup> Gurejdx Jesús chiptio'p ree xbejnman, abi' badëeman guialrniabee loj reeman din yabëë reeman xindxab luxdoo ree bejn din yayüjn tëë reeman bejn ree graloj guialrdoob në graloj guialguidx.

<sup>2</sup> Bén guie ree naj guidxiptio'p ree xi apóstoles Jesús: Simón bén gulëëlajman Bëd, con bijchaman Andrejs, në Jacob con Waj, bén naj ree xi'n Zebedeo. <sup>3</sup> Në Felip, Tol, Tumajs con Matew bén baquix impuest, nëtëë Jacob xi'n Alfeo con Lebeo bén la gajc Tadeo <sup>4</sup> në Simón bén bi'ch loj ree bén Cananistas con Judas Iscariote bén yayü Jesús.

*Rxhiaal Jesús gra ree xbejnman chigliüü reeman  
xtiidx Dios*  
(*Mr. 6:7-13; Lc. 9:1-6*)

<sup>5</sup> Chi guxhaal Jesús guidxiptio'p ree xbejnman, rëbaman loj reeman:

—Ad chedi niz lod zojb ree bén ad najt bén Israel, ni'qui ree guiedx riga' niz Samaria, <sup>6</sup> gol chejli niz lod zojb ree bén Israel bén ad zinalt ree xnejz Dios. <sup>7</sup> Gol güjdx loj reeman guial ma zëëd gajxh xgualrniabee Dios. <sup>8</sup> Gol bayüjn bénragxuu ree, gol basban bén ma güjt ree, gol bayüjn bén rajc ree guialguidx la lepra, gol babëë tëë xindxab luxdoo ree bejn. Zi'cgajc cwa' lagajdi guialrniabee, ziangajc yayündi bejn lagajzi.

<sup>9</sup> 'Ad chinëdi or, ni'qui plajt, ni'qui cobr, <sup>10</sup> ni'qui guijxh. Ad bal chinë stib nejz xabidi, ni'qui stib nejz xgurëchidi, ni'qui yagrliadxidi, din bén rüjn dxiin rayal gudëëd ree bejn ni gawaman.

**11** 'Chi guidxindi tijb guiedx o tijb ciuda, gol gule'c ruson chu bén naj benza'c yaya'ndi lidx, yagaj gol bay'a'n xt chi yazadi luguiedx guin. **12** Abi' chi chu'di lënü guin, gol güjdx loj ree bén zojb yagaj: "Yabe'cdxe Dios luxdoodi." **13** Bal rayal reeman guialnaza'c guin, zaya'nán con laa reeman guíaad bal id rayal reeman laan zayejcan con lëjt. **14** Guiáad bal yu' guiedx o yu ya lod ad raca't reeman lëjt o bal id rën reeman gucaagdiajg reeman ni guiëbidi, gol baza yagaj, gol gudxijp guxyuj guia'di zi'c tijb sen guial ad bazoobt reeman xtiidxidi. **15** Naj rni lëjt guial dxej ni yadëed ree bejn cwent loj Dios, mazri casti naroob yayal reeman guial loj ree bén Sodoma né Gomorra.

### *Guialzi ni zéed*

**16** Rëb tëé Jesús loj ree xbejnman:

—Gol bacaagdiajg ni rnin, naj rxhial lëjt zi'c ree xill loj ree cuyojt. Zeel gol gojc nasin zi'c bëël, gol gojc tëé nadoo zi'c palom. **17** Gol gojp cudad din zayü ree bejn lëjt loj ree guxtis, zaguijn reeman lëjt lén ree yadoo. **18** Abi' xt chinë reeman lëjt loj ree gobernador né loj ree rey guial rliladxidi naj, zian güdi da diidxan loj reeman né loj ree bén ad zinalt xnejz Dios. **19** Per chi chinë reeman lëjt loj guxtis, ad chu'di xgab xhie guinieedi xhie tëé naag guinieedan, din chi guidxin hor guinieedi, Dios yazaladx lëjt diidx ni guinieedi. **20** Din ad lëjttan guiniee, xSprijt xDadidi Diosan guiniee por lëjt.

**21** 'Zadxin dxej yayü ree bejn laagajc bijch reeman par guiët reeman. Guiáad ree dad yayü laagajc xi'n reeman, abi' ree bejn zadxe'ch xdad reeman né xniaa reeman abi' yayü reeman laa

reeman par guiët reeman. <sup>22</sup> Gra bén guidxliuj guidxe'ch läjt guial najdi da bejnan, per bén sudxi'ch loj guial rliladxaman naj xt dxej chigra guibanman, laaman yayal xanyabaa. <sup>23</sup> Chi sunal reeman läjt tijb luguidex par güün reeman läjt xhienin, gol chej stiib guiedx, din naj rni lojdi, ad warat xguedx Israel chedi chi gui't Bén guxhaal Dios.

<sup>24</sup> 'Tijb bejn ad mast lasajc loj xmextraman, ni'qui tijb mojs ad mast lasajquix loj xpatronx. <sup>25</sup> Bén cusiid rayal xhienladxaman chi ma rajcaman zi'c rajc xmextraman guiáad tijb mojs rayal xhienladxix chi ma najx zi'c xpatronx. Nacli naj rniabeen lojdi, guléélaj ree bejn naj Beelzebú, idxgui läjt najdi da bejnan.

*Chu rayal guidxeb bejn  
(Lc. 12:2-9)*

<sup>26</sup> 'Ad guidxebidi bejn ree, din achet ni ralan yu' ni ad zaguient, ni'qui tijb ni naguie'ch ad yu't ni ad zagbeet bejn. <sup>27</sup> Ni canin läjt naguie'ch, gol güwdxan loj ree bejn, guiáad ni canin läjt ralan, gol güwdxan loj gra ree bejn. <sup>28</sup> Ad rdxebidi bén rën ree gugüjt läjt. Din zile' gugüjt reeman xcuerpidi, per xspriftidi ad zile't gugüjt reeman laan. Gol bidxebli Dios din laaman zile' gunijt xcuerpidi abi' guixhiaalaman xspriftidi gabijl.

<sup>29</sup> 'Läjt ragbee guial biguijndoo ree ad lasajct reeb wayëjx, per ni'qui tijb reeb ad zëjtt sin xpermis xDadidi Dios. <sup>30</sup> Guiáad läjt xt guidxgujquidi graczan nayab loj Dios. <sup>31</sup> Zeel ad rdxebidi din mazri lasajquidi guial loj zien da't ree biguijndoo.

*Bén rëb loj ree bejn guial najman xbejn Jesucrist  
(Lc. 12:8-9)*

<sup>32</sup> 'Bén guiëb niz loj ree bejn guial da bejnanan, ziangajc naj guië loj da Dadan Dios bén yu' xanyabaa guial da bejnanan. <sup>33</sup> Per bén guiëb niz loj ree bejn guial ad da bejntanan, ziangajc guië loj da Dadan Dios bén yu' xanyabaa guial ad da bejntanan.

*Por Jesús rlia' lasa' ree bejn  
(Lc. 12:51-53; 14:26-27)*

<sup>34</sup> Rëb tëë Jesús:

—Ad zialtan par yabecdxen luxdoo bejn, zialan din guial chililadx reeman naj chu' wadijl. <sup>35</sup> Din guial chililadx bejn naj, zadxe'ch xinguaaw xdadix, guiáad biinggaa zadxe'ch xniaam, abi' biinwalidx zadxe'ch xnasuegrim. <sup>36</sup> Abi' laagajc bén zojb ree lënülidxidi guidxe'ch läjt.

<sup>37</sup> 'Bén rën xdad o xniaa mazczi guial lon, ad zajct gacaman da bejnan. Ziengajc bén rën xi'ngaan o xi'ndxa'p mazczi guial lon, ad zajct gacaman da bejnan. <sup>38</sup> Bén rën guidnal naj, abi' ad rëntaman sagdiazman por naj, ad zile't gacaman da bejnan. <sup>39</sup> Bén rnajchi' guialnaban rajpaman loj guidxliuj guie, zadxin dxej gunijtaman laan, per bén guiët por naj, zajpaman guialnaban tiblayaa con Dios.

*Ni tia' ree bejn  
(Mr. 9:41)*

<sup>40</sup> 'Bén ridxga' läjt, najn ridxga'man, guiáad bén ridxga' naj, bén guxhaal najn ridxga'man. <sup>41</sup> Bén ridxga' tijb bén rudëe xtiidx Dios loj ree bejn, guial zëëdaman por Dios, zaca'man lasa' ni rayal tia' bén guin loj Dios. Ziengajc bén ridxga' tijb bén nabán

zi'c rën Dios, zaca'man lasa' ni rayal tia' bén guin loj Dios. <sup>42</sup> Abi' chutëëz bén gudëëd majsí tib xijgzi nijs naalyuj loj bejn guial najman da bejnan, naj rni lojdi guial yu' ni gudëëd Dios tia' reeman.

## 11

### *Bigneenë ree xbejn Waj Jesús (Lc. 7:18-35)*

<sup>1</sup> Chi gulox rëb Jesús loj guidxiptio'p ree xbejn-man con ree nin chiguieen reeman, dxel bazaman yagaj ziglüüman bejn ree xtiidx Dios loj ree guiedx riga' niz yagaj.

<sup>2</sup> Abi' Waj, la'tgaj yu'man ladxguiib, cwa'man ruson gra ree ni cayüjn Jesús. Dxel guxhaal tio'p choon ree xbejnman, <sup>3</sup> bignabdiidx reeman loj-man, rëb reeman:

—¿Lüj naj Cristo ya bén naj gui't, o yalëjzan ben ren ya?

<sup>4</sup> Dxel rëb Jesús loj reeman:

—Gol chej gol güwdx loj Waj ni cuguaadi në ni cucaagdiajguidi. <sup>5</sup> Gol güwdx lojman guial ma ruguiaa ree bénlutia'p, ma rajc rza ree benco, ma bayajc tëë ree bén rajc guialguwdx la lepra, ma riguiejn ree bén nacwa'l guiaad ree bengüt ma baban reeman, abi' ree bénprob ma caguiejn reeman xtiidx Dios. <sup>6</sup> Xiquilbaa ree bén ad zucwëëzt chililadx naj.

<sup>7</sup> Chi baza ree bén guxhaal Waj, dxel guzuloj Jesús caneeman loj ree bejn xcwent Waj, rëbaman:

—¿Chu naladxidi naj bén biquiaadi loj yujbidx?  
¿Naladxidi ya najman zi'c tijb biqui ni runiib bi?

<sup>8</sup> ¿O xhienaaq naj bén biquiaadi? ¿Najman tijb bén

najcw lajd zagdxe ya? Lëjt ragbee guial bén rajcw ree lajd zagdxe lën palas zojb reeman. <sup>9</sup> ¿Chuza biquiaadi? ¿Tijb bén rudëë xtiidx Dios loj ree bejn ya? Per naj rni lojdi guial biquiaadi tijb bén mazri zojbloj guial loj bén rudëëd xtiidx Dios loj ree bejn. <sup>10</sup> Wajn din laaman naj ben ruza't loj xtiidx Dios lod rëb:

Naj rxhial tijb bén ned lojl,  
ben güünchaaw xnejzil.

<sup>11</sup> Naj rni lëjt, loj graczi ree bénguidxliuj, ad wayut bén mazri zojbloj guial loj Waj. Per majsí zian, bén ad zojbloj loj xguialrniabee Dios, laaman mazri zojbloj guial loj Waj.

<sup>12</sup> 'Diizd chi bi't Waj xt yan, zien bejn rüjn da't naguiejn chu' lod rniabee Dios. Abi' ree bén rüjn da't naguiejn laa reeman chu' lod rniabeeman. <sup>13</sup> Diizd ley badëë Dios loj Moisejs con loj ree bén badëë xtiidx Dios loj ree bejn, xt Waj, laa reeman gunee xcwent xguialrniabee Dios. <sup>14</sup> Abi' bal chililadxidi ni ganin lëjt, naj rni guial Wajn naj Eliás bén badëë xtiidx Dios loj ree bejn. <sup>15</sup> Bén rën ree gucaagdiajg, gol bacaagdiajg.

<sup>16</sup> ¿Xhienaa ganin lëjt naj ree bén riga' loj guidxliuj guie yan? Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: <sup>17</sup> "Bacwejdxan bidxa, per ad bayatidi, badoolan ni naya ree per ad biintidi." <sup>18</sup> Din bi't Waj bén baroobnijs bejn ree, ad rawtaman ad rë' téeetaman vin, abi' rëbidi xindxbab yu' luxdooman. <sup>19</sup> Yan, bi't Bén guxhaal Dios, rawaman rë' téeeman vin abi' rëbidi nalaman ruladx téeeman guië'man, ruchajg téeeman bëndol ree con ree bén ruquijx impuest. Per ree bén ma ca' xguialrniabee Dios,

por laa reeman rguien guial gra ni rüjn Dios naj  
zagdxe.

*Bén ad bazoobt ree xtiidx Dios  
(Lc. 10:13-15)*

<sup>20</sup> Dxel guzuloj Jesús cadilëman bén zojb ree  
guedx lod beenman mazri zien ree milagr. Din  
bén guin ree ad bayüjnt reeman xgab por xtol  
reeman, abi' rëbaman loj reeman:

<sup>21</sup> —¡Probza läjt bén Corazín! ¡Probza läjt bén  
Betsaida! Din bal luguidex Tiro nē luguidex Sidón  
niajc ree milagr ni goc ladxidi, diizd gocli nayüjn  
reeman xgab por xtol reeman, niajcw reeman lajd  
ya's nuroob tēë cobdëj guijc reeman zi'c tijb sen  
guial ma bayüjn reeman xgab por xtol reeman.

<sup>22</sup> Per rnin läjt guial dxej yadëéd ree bejn cwent  
loj Dios, mazri casti naroob yayalidi guial loj ree  
bén Tiro nē ree bén Sidón. <sup>23</sup> Guiáad läjt bén  
Capernaum, ad naladxidi yayalidi xanyabaa, läjt  
yayal gabijl. Din bal luguidex Sodoma niajc ree

<sup>24</sup> milagr goc ladxidi, xt yan sta yu' guiedx guin.  
<sup>24</sup> Per rnin lojdi guial dxej yadëéd ree bejn cwent  
loj Dios, mazri casti naroob yayalidi guial loj ree  
bén Sodoma.

*Gol guda lon din yaziiladxidi  
(Lc. 10:21-22)*

<sup>25</sup> Lën ree dxejzii rëb Jesús:

—Dad, ruzatan lüj zagdxe, din ni baquie'chil loj  
ree bén rajc nē loj ree bén rignia', laan ma balüül  
loj ree bén ad rajct. <sup>26</sup> Zian gojc Dad, din zian  
guyënl.

<sup>27</sup> 'Da Dadan banee gra lon. Abi' achut nünbee  
Jesucrist xi'n Dios, tijbzi Dios, achu tēët nünbee

Dios, tibzzi Jesucrist xi'nman, con ree bén rënman güünbee Dios. <sup>28</sup> Gradi, bén ma badxag rüjn xhienin din yaya'ndi zagdxe loj Dios, ma badxag tħeedi nüü xtolidi. Gol guda lon, naj gune guialrazi-illadx lojdi. <sup>29</sup> Gol bazoob da diidxan, gol basiid tħee gaquidi benza'c nē bén chaawladx zi'c naj, din yabedxe luxdoodi loj Dios. <sup>30</sup> Din ad nawëegt guial guzoobidi da diidxan, ad nawëeg tħeed guial güündi zi'c rënān.

## 12

*Rgui'ch ree xbejn Jesús trigo dxej razieladx ree bén Israel*

(*Mr. 2:23-28; Lc. 6:1-5*)

<sup>1</sup> Tħib dxej razieladx ree bejn, chi cadēd Jesús con ree xbejnman loj tħib guinia lod yu' trigo, dxel calaan ree xbejnman abi' guzuloj cagui'ch reeman trigo persi cayaw reeman laan. <sup>2</sup> Abi' chi baguiaa ree bénfarisew ni cayüjn reeman, rēb reeman loj Jesús:

—Baguiaa ree xbejnl nial cayüjn reeman ni ad rayalt güün reeman dxej razieladx ree bejn.

<sup>3</sup> Dxel rēb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompiaraman? <sup>4</sup> Guyu Davi lēn xyadoo Dios abi' cwa'man guiadxtil ma nagle' ree gudawaman con ree xcompiaraman, ni ad rayalt niajw reeman, bixhiosi ree rayal gaw laa reen. <sup>5</sup> ¿O gadidi gool loj xley Moisejs ya guial achet dol rüjn ree bixhioz chi rüjn reeman dxiin lēn yadoo majsi ad razieladxt reeman dxej razieladx ree bejn? <sup>6</sup> Abi' naj rni lějt guial naj, bén za'nē lějt mazri lasajcan guial loj yadoo. <sup>7</sup> Bal

rignia'di xhie r n gui b loj xtiidx Dios lod r b: "Ni r nan naj guial yaya lasa'di, ad guial guneetidi gon lon." Bal rignia'di diidx guin ree ad zudxiibtidi guijc ree b n ad rajpt dol. <sup>8</sup> Abi' B n guxhaal Dios rajpaman guialrniabee dxej raziiladx ree bejn.

*Rayajc tijb b n n jt tiblad yaa  
(Mr. 3:1-6; Lc. 6:6-11)*

<sup>9</sup> Chi gud d gojc zian, dxel baza Jes s abi' guyuman l n tijb yadoo naj niz yagaj. <sup>10</sup> L n yadoo guin za' tijb b n n jt tiblad yaa. Abi' guial ree b nfarisew raguiil reeman mod xhie gudxiib reeman guijc Jes s, dxel gunabdiidx reeman lojman, r b reeman:

—¿Zile' yay jn bejn tijb b nragxuu dxej raziiladx bejn ya?

<sup>11</sup> Badxi' Jes san r baman:

—Bal tijb l jt rajp tijb xiil, abi' yabib l n bala' dxej raziiladx bejn. ¿Nid zab edi laab dxej guin ya?

<sup>12</sup> ¿Wen id mazri lasajc tijb bejn guial loj tijb xiil ya? Zeel achet g  nan zajc g  n bejn ni naj zagdxe dxej raziiladx bejn.

<sup>13</sup> Dxel r b Jes s loj b nragxuu yaa guin:

—Basli yaal.

Abi' basli yaa b n guin, loj hor ziigajc bayajc yaaman zi'c naj stibladan. <sup>14</sup> Per chi barii ree b nfarisew guin l n yadoo guin, guzuloj cay  reeman diidx xhienaa g  n reeman din gug jt reeman Jes s.

*B n gule Dios*

<sup>15</sup> Chi gogbee Jes s zian, laa zia gajcaman, abi' zien ree bejn binal laaman. Dxel bay jnman gra ree b nragxuu, <sup>16</sup> abi' gunabeeman laa reeman

chitëëe guitie'ch reeman diidx chu bayüjn laa reeman. <sup>17</sup> Zian guzobj xtiidx Isaías, bén badëë xtiidx Dios loj ree bejn, chi rëbaman:

<sup>18</sup> Gol baguiaa, bén guie naj bén gulen din güünman naj sirv,  
laaman naj bén rën da'tan,  
rabaanë' tëën laaman.  
Gudë da Sprijtan lojman  
abi' guiëbaman loj ree bënguidxliuj  
xhienaag naj da guialrniabean.

<sup>19</sup> Achut tilnëman,  
ad zabixdiaj tëétaman  
achut tëët guien cha'man niz lunejz.

<sup>20</sup> Ad zudëëdtaman casti bén ad za'dxi'cht  
ree loj da nejzan, në ree bén ad ridxga'za'ct naj,  
xt chi ma beenman gan gac guialguxtis.

<sup>21</sup> Abi' xt ree bén ad najt bén Israel  
cwëz reeman yabëëman laa reeman loj dol.

*Rëb ree bejn ca' Jesús xguialrniabee Beelzebú  
(Mr. 3:19-30; Lc. 11:14-23; 12:10)*

<sup>22</sup> Binë ree bejn tijb xinguaaw lod za' Jesús, yu' xindxab luxdoox, natia'p lojx naj tëëx gop. Dxel bayüjn Jesús laax abi' guzuloj rnieex ruguiaa tëëx.

<sup>23</sup> Graczi ree bejn däd badxaloj reeman, abi' rëb reeman:

—¿Id bén guinan zëëd loj xdiaa Davi ya?

<sup>24</sup> Chi biguiejn ree bénfarisew zian, dxel rëb reeman:

—Bén guin rabëë xindxab luxdoo ree bejn por xguialrniabee Beelzebú xin rniabee ree xindxab.

<sup>25</sup> Per Jesús gogbee gajcaman xgab cayüjn reeman, abi' rëbaman:

—Gra nacion o ciuda bal id nadxag riga' bejn, rlia' lasa' reeman, ziangajc tijb famil bal id nadxag riga' reeman, rlia' lasa' reeman. <sup>26</sup> Zianganjc bal xindxab su contr laagajquix, nayob nitix. <sup>27</sup> Lëjt na guial naj rabë xindxab luxdoo ree bejn por xguialrniabee Beelzebú, per bal zianan, ¿chuza rudëë guialrniabee loj xbejndi din yabëë reeman xindxab? Zeel laagajc reeman rulüü guial ad laat rnieddi. <sup>28</sup> Per naj, bal por xSprijt Dios rabën xindxab luxdoo ree bejn, rën guiëban guial ma za'në xguialrniabee Dios lëjt.

<sup>29</sup> 'Din ¿xhieza naag chu' tijb bejn lidx tijb bén gojl par cwanman ni rajpaman, bal id zaxhiixgajman laaman? Zian güünman din chile' cwanman ni rajpaman.

<sup>30</sup> 'Bén ad za't con naj, za'man contr naj. Guiáad bén ad ruto'pt bejn par naj, rtie'chaman laa reeman.

<sup>31</sup> 'Zeel rnin lëjt: Züjn Dios perdon xhietëëz dolan, në ree diidxguijdx ni rnietzi ree bejn, per ad züjntaman perdon bén rnieguijdx ree xSprijt Dios. <sup>32</sup> Chutëëz bén guinieeguijdx Bén guxhaal Dios, zajcaman perdon, per bén guinieeguijdx xSprijt Dios ad zajctaman perdon yan, ni'qui chi yaguilan.

*Nünbee bejn tijb yag por ni rtia lojn  
(Lc. 6:43-45)*

<sup>33</sup> 'Lëjt ragbee, bal tijb bejn ruzuj tijb yag zagedxe, rtia ni zagedxe lojn, per bal guzujman tijb yag guijdx, rtia ni guijdx lojn. Din tijb gaj yag nünbee bejnan por ni rtia lojn. <sup>34</sup> ¡Xi'n xindxab! ¿Xoza guinieedi diidx zagedxe ree awa benmal

läjt? Din ni yu' luxdoo bejn laan rnieeman.  
**35** Benza'c rnieeman diidxza'c, din laan yu' luxdooman. Guiáad benmal rnieeman diidxmal din laan yu' luxdooman. **36** Per naj rni läjt guial dxej ni güün xguialguxtis Dios, gra ree bejn yadëed cwent lojman por gra ree diidxgуйdx ni rngee reeman.  
**37** Din por xtiidx gajc bejn guiguien bal rayalaman xcasti Dios o ad rayaltaman laan ya.

*Rniab ree bénfarisew tijb milagr*

(Mr. 8:12; Lc. 11:29-32)

**38** Yu' ree bénfarisew con ree mextr ni rajc ley, rëb loj Jesús:

—Mextr, rayënan yaguiaan güünl tijb milagr.

**39** Badxi' Jesúsan rëbaman:

—Lëjt benmal, bén ad rüjnt ni rën Dios abi' rëndi günan tijb milagr. Per achetri guguaadi, tijbzi zi'c guzac Jonás bén badëë xtiidx Dios loj ree bejn.

**40** Din zi'c guyu Jonás lën bëjl naroob choon dxej choon guiaal, ziangajc Bén guxhaal Dios, choon dxej choon guiaal chu'man lën baa. **41** Abi' chi yadëed ree bejn cwent loj Dios, bén guban ree Nínive zaban reeman abi' guiëb reeman guial ree bén riga' yan, yayal reeman xcasti Dios. Din bén Nínive ree bayejc reeman loj Dios chi bacaagdiajg reeman xtiidx Dios ni gunee Jonás. Abi' yan, bén za'në läjt mazri lasajcaman guial loj Jonás.

**42** Ziengajc bén goc reina niz sur, zabanman chi yadëed ree bejn cwent loj Dios, dxel guiëbaman guial ree bén riga' yan, yayal reeman xcasti Dios. Din laaman däd zift guzaman persi bicaagdiajgamán xguialrajc rey Salomón. Abi' yan, bén za'në läjt mazri lasajcan guial loj Salomón.

*Xindxab ni rayejc  
(Lc. 11:24-26)*

<sup>43</sup> 'Chi rarii tijb xindxab luxdoo tijb bejn, abi' rzax niz loj yujbidx rguilix lod yaziiladxix. Abi' chi ad rdxejlt lod yaziiladxix, dxel rüjnx xgab naladxix: <sup>44</sup> "Zagdxeli yaye'can lod guzaan." Abi' chi rayejquix ruguaax luxdoo bén guin najn zi'c tijb lënü lod achut zojb, lod bilioob lod najcchaaw tée. <sup>45</sup> Dxel rica'x za gajdx xindxab naj ree mazri xinmal guial lojx. Abi' ru gra reex luxdoo bén guin. Dxel mazri benmal gacaman guial loj ni gocaman yaloj. Ziangajc sac ree benmal riga' loj guidxliuj yan.

*Xniaa Jesús con ree bijchaman  
(Mr. 3:31-35; Lc. 8:19-21)*

<sup>46</sup> Sta canee Jesús loj ree bejn, bidxin xniaaman con ree bijchaman, za' reeman lule', rën reeman guinieenë reeman laaman. <sup>47</sup> Abi' yu' tijb bén rëb lojman:

—Laa xniaal con ree bijchil za' lule' guin, rën reeman guinieenë reeman lüj.

<sup>48</sup> Per Jesús badxi'man xtiidx bén guin rëbaman:

—¿Chu naj da nan chu tée ree nin naj da bichan?

<sup>49</sup> Dxel con yaaman balüü ree xbejnman rëbaman:

—Bén guie ree naj da nan në ree da bichan.

<sup>50</sup> Din chutëëz bén rüjn zi'c rën da Dadan bén yu' xanyabaa, laaman naj da bichan, da zanan, në da nan.

## 13

*Xcwent bén rtie'ch bin  
(Mr. 4:1-9; Lc. 8:4-8)*

<sup>1</sup> Dxejzii brii Jesús yu lod zojbaman, bisobaman ro' nijs Galilea. <sup>2</sup> Abi' guial dád zien ree bejn bido'p yagaj, beenan naguiejn wé'p Jesús loj tijb barcw dxel gurejman lojn, guíaad ree bén guin za' reeman ro' nijs guin. <sup>3</sup> Zien ree ni guzuloj culüüman laa reeman, per con ganax zi'c cwent ree, rëbaman loj reeman:

—Tijb bejn, briiman bigtie'chaman bin loj xguiniaaman. <sup>4</sup> Chi catie'chaman bin guin, ta'nan biajb loj nejz, abi' bi't ree biguijn gudaw reeb laan. <sup>5</sup> Sta'nán biajb loj ree guiaj lod ad riga't zien yuj, cari gulejnan guial ad zient yuj riga!. <sup>6</sup> Per chi brii gubijdx, baze'can laan, abi' guial ad yu't liujn gubidxan. <sup>7</sup> Dxel sta'nán biajb loj ree yaquiéjch, chi guni's ree yaquiéjch guin banidloj reen laan. <sup>8</sup> Per sta'nán biajb loj yuj za'c, abi' dád gojcan. Yu'n cwa tibgayuu bin loj, yu'n cwa gayojn yu' téeën cwa gajlbichii. <sup>9</sup> Bén rën gucaaggdiajg, gol bacaaggdiajg.

*Chexc zeel rulüüü Jesús con ni naj ree zi'c cwent  
(Mr. 4:10-12; Lc. 8:9-10)*

<sup>10</sup> Dxel gubig ree xbejn Jesús lojman rëb reeman:  
—¿Chexquiza zeel rulüüл bejn ree con ganax zi'c cwent ree?

<sup>11</sup> Badxi' Jesús laan rëbaman:  
—Lëjt, Dios ma basa'n lëjt din chignia'di xhien-aag naj xguialrniabeeman, per bén guin ree ad basa'nt Dios laa reeman chignia' reeman laan. <sup>12</sup> Din Bén ma rignia', gusnuu chignia'man mazri, abi' zignia' da'taman. Per bén ad rignia'za'ct ad rüjn téeetaman naguiejn chignia'man mazri, xt ta'n ni rignia'man zayanladxaman. <sup>13</sup> Zeel rnienë'n

laa reeman con ganaxzi zi'c cwent ree. Din majsi rani loj reeman per rüjn reeman zi'c bén ad ruguaat, abi' majsi riguiejn reeman per rüjn reeman zi'c bén ad riguiejnt, bén ad rignia' tēët.  
<sup>14</sup> Zian rzojb xtiidx Isaías, bén badëë xtiidx Dios loj ree bejn, chi rëbaman:

Majsi riguiejn reeman, per achetczi chignia' reeman.

Abi' majsi rani loj reeman, per ad ruguaat reeman.

<sup>15</sup> Din ma been luxdoo reeman gojl,  
 nayaaw guidiajg reeman,  
 nayaaw tēë guiaaloj reeman.

Chitëë guguaa reeman,  
 guiguiejn reeman,  
 chignia' tēë reeman.

Din ad rënt reeman gui't reeman lon din günan laa  
 reeman perdon.

<sup>16</sup> 'Per xiquilbaadi cuguaadi caguiejn tēëdi.

<sup>17</sup> Din naj rni lojdi guial däd zien ree bén badëë xtiidx Dios loj ree bejn, nē ree bén guban zi'c rayal, guyën reeman nuguiaa reeman ni cuguaadi per ad baguaat reeman laan. Guyën reeman niguiejn reeman ni caguiejndi per ad biguiejnt reeman laan.

*Rusignia' Jesús xcwent bén rtie'ch bin  
 (Mr. 4:13-20; Lc. 8:11-15)*

<sup>18</sup> 'Yan gol bacaagdiajg xhie rën guiëb ni rnin lojdi xcwent bén bigtie'ch bin. <sup>19</sup> Bén riguiejn xtiidx Dios abi' ad rignia'taman laan, laaman naj zi'c bin biajb loj nejz, guial laa ri't gajc xindxab rquiedix ni bacaagdiajgaman. <sup>20</sup> Guiáad bin biajb loj ree guiaj naj zi'c bén riguiejn xtiidx Dios, abi' däd nix ru

luxdooman riguiejnman laan, <sup>21</sup> per guial najman zi'c cwaan ni ad yu't xliuj, ad rzudxi'chtaman. Chi rzagdajman o rdxe'ch ree bejn laaman por xtiidx Dios, laa rusa'n gajcaman ni rliladxaman. <sup>22</sup> Abi' bin biajb loj ree yaquiejch naj zi'c bén riguiejn xtiidx Dios, per guial mazri ruman xgab por ni yu' loj guidxliuj guie, rusquiee guialnaza'c riga' loj guidxliuj guie laaman, abi' zianzi rucwëëz rucaagdajgaman xtiidx Dios achet sirv been ni bacaagdajgaman. <sup>23</sup> Per bin biajb loj yuj za'c naj zi'c bén riguiejn xtiidx Dios abi' rignia'man laan rüjn téeeman zi'c rën Dios, zi'c ni cwa tibgayuu bin loj o zi'c ni cwa gayojn o ni cwa gajlbichii.

### *Trigo con gui'xhguijdx*

<sup>24</sup> Be Jesús stijb ni naj zi'c cwent loj reeman, rëbaman:

—Xguialniabee Dios naj zi'c tijb bén badxe' ganax bin zagdxe loj xguinia. <sup>25</sup> Per la'tgaj naga'yëjs gra reeman, bidxin bén rdxe'ch laaman guxübinman gui'xhguijdx ree loj trigo guin dxel ziaman. <sup>26</sup> Abi' chi gulen trigo guin brii tée dojn lojn në ree gui'xh guin ma yu' lojn. <sup>27</sup> Dxel bi-cojn ree xmojs bén naj xguinia laan laaman, rëb reeman: “Dad ¿nid ganax bin zagdxe badxe' loj xguiniaal ya? yan, ¿banza guza gui'xh yu' lojn?” <sup>28</sup> Badxi'man laan rëbaman: “Wed tijb bén rdxe'ch naj bidgadxe' laan.” Dxel gunabdiix ree mojs guin lojman rëb reeman: “¿Xhie nal zudojxhan gui'xh guin ree ya?” <sup>29</sup> Dxel rëbaman loj reeman: “Yajqui, chitëë guial gaxhidi gui'xh guin gaxhidi në trigo guin. <sup>30</sup> Zagdxeli gol basa'nan din ni'snën trigo guin xt chi ma gojcan. Abi' chi guidxin dxej yado'p

trigo guin guiën loj ree bén guto'p laan din yalojx-gaj gui'xh guin yato'p reeman din guixhii reeman lënan zianz che'can. Dxelri yato'p reeman trigo guin din cu'chaaw reeman laa reen lod ruchaaw reen.”

*Xcwent xhaj moxtajs  
(Mr. 4:30-32; Lc. 13:18-19)*

<sup>31</sup> Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c xhaj moxtajs, ni rudxe' tijb bejn loj xguiniaaman. <sup>32</sup> Abi' bin guin naj mazri ni wit loj gra ree bin, per chi rni'san laan rajc mazri ni naroob loj gra ree cwaan. Abi' guial naroob da't rajcan, xt rüjn xguixbitia's ree biguijn xidxan.

*Xcwent levadur  
(Lc. 13:20-21)*

<sup>33</sup> Be tée Jesús stijb ni naj zi'c cwent loj reeman, rëbaman:

—Xguialrniabee Dios naj zi'c levadur ni rugo'ch tijb béngunaa choon midid harin, abi' laan rusaaguij gra cob guin.

*Chezc zeel rulüü Jesús con ni naj ree zi'c cwent  
(Mr 4:33-34)*

<sup>34</sup> Gra ree ni balüü Jesús bejn ree, balüüman laa reeman con ganax ree ni naj zi'c cwent, achet balüüman laa reeman con ni ad najt ree zi'c cwent.

<sup>35</sup> Zian gojc persi guzobj xtiidx bén badëë xtiidx Dios loj ree bejn, chi rëbaman:

Con ganaxzi ni naj ree zi'c cwent gulün bejn ree, guiën loj reeman ni gad reeman gagbee diizd chi gocchaaw guidxliuj.

*Rusignia' Jesús xcwent gui'xhguijdx*

<sup>36</sup> Chi ma bazaadiidxnë Jesús benzien guin ree, dxel bayuman lënü con ree xbejnman, abi' gunab-diidx reeman lojman, rëb reeman:

—Basignia' dunujn xcwent gui'xhguijdx ni gulen loj guiniaa guin.

<sup>37</sup> Badxi' Jesúsan rëbaman:

—Bén rudxe' bin zagdxe guin naj Bén guxhaal Dios, <sup>38</sup> abi' guiniaa guin naj guidxliuj. Guiáad bin zagdxe guin naj ree bén naj par loj xguialrniabee Dios. Abi' ree gui'xh guin naj bén naj ree par xindxab. <sup>39</sup> Guiáad bén rdxe'ch, bén guxübin trigo guin naj xindxab. Abi' guial rado'p guialnaza'c guin rën guiëb chi nit guidxliuj, guiaad ree bén yato'p guialnaza'c guin naj ree xianjl Dios. <sup>40</sup> Zian zi'c rado'p ree gui'xhguijdx guin par che'c reen, zian gac chi nit guidxliuj. <sup>41</sup> Bén guxhaal Dios guixhiaal ree xianjlaman din yabëë reeman bén rayal ree yarii loj xguialrniabeeman, bén ruzaal-guiiw bejn ree din güün reeman dol në gra ree bén cayüjn dol. <sup>42</sup> Abi' guzaal reeman laa reeman loj bajl lod goon reeman xt gaw lay reeman. <sup>43</sup> Dxel bén nabán ree zi'c rën Dios, guidiin reeman bacha' loj xguialrniabee xDad reeman Dios, zi'c rdiin gubijdx bacha'. Bén rën gucaagdiajg, gol bacaagdiajg.

*Xcwent ni lasajc*

<sup>44</sup> 'Xguialrniabee Dios naj zi'c tijb ni lasajc da't, ni naguie'ch loj tijb guidxliuj. Abi' rdxejl tijb bejn laan zianz ruquie'chaman laan stijb, lod gulëëman laan. Abi' däd rabaaman ruto' gra ni rajpaman persi rsiiman guidxliuj guin.

*Xcwent perl*

<sup>45</sup> 'Rni tēēn lējt: Xgualrniabee Dios naj zi'c tijb bén rguil perl zagdxe din siiman laan. <sup>46</sup> Chi rdxejlanan tijb perl lasajc, ruto' gra ni rajpaman abi' rsiiman laan.

*Xcwent guijxh rniaaz bëjl*

<sup>47</sup> 'Abi' tēē xgualrniabee Dios naj zi'c tijb guijxh ni ruzaal reeman loj nijs abi' rniaazan graloj bëjl. <sup>48</sup> Dxel chi ma gudxa guijxh guin rabëë reeman laan ro' nijs guin, abi' rbej reeman rabe reeman loj bëjl guin, dxel ragu' reeman be zagdxe lēn dxüm guiaad be ad najt zagdxe rusëëb reeman. <sup>49</sup> Zian gac dxej nit guidxliuj, gui't ree xianjl Dios yabe reeman benmal loj ree benza'c. <sup>50</sup> Abi' guzaal reeman benmal guin ree loj bajl lod goon reeman abi' xt gaw lay reeman.

*Bén rbe nicüb nē ni yojx*

<sup>51</sup> Dxel gunabdiidx Jesús loj ree xbejnman, rëbaman:

—¿Rignia'di gra ni canin lējt ya?

Badxi' reeman laan rëb reeman:

—Rayignia'nan, Dad.

<sup>52</sup> Dxel rëb Jesús loj reeman:

—Gra ree mextr ni rajc ley, abi' cusiid reeman xhienaag naj xgualrniabee Dios, laa reeman naj zi'c tijb bén rbe nicüb nē ni yojx loj gra ni rajpaman.

*Badxin Jesús Nazaret*

(Mr. 6:1-6; Lc. 4:16-30)

<sup>53</sup> Chi gulox gunee Jesús loj reeman zian, zianz bazaman. <sup>54</sup> Dxel badxin ladxaman, ni guzuloj

culüüman bejn ree lén xyadoo reeman. Abi' dád badxaloj ree bén guin, rëb reeman:

—¿Ban guin basiidaman gra ree ni rajcaman?  
 ¿Chexquiza zeel rajc rüjnman milagr ree? <sup>55</sup> ¿Nid laaman naj xi'n carpinter ya, abi' xniaaman naj Li, guiáad ree bijchaman naj Jacob, Xiëb, Simón, nè Judas? <sup>56</sup> ¿Nid luguiidx guie zojb ree bizanman ya? ¿Banza guin basiidaman gra ree ni rajcaman?

<sup>57</sup> Abi' ad bidxga't reeman Jesús. Per rëbaman loj reeman:

—Bantëëz guin rajp ree bejn respejt tijb bén rudëë xtiidx Dios loj ree bejn, per ladxaman achut rajp laaman respejt ni'qui lidxaman.

<sup>58</sup> Abi' ad zient milagr beenman yagaj guial ad bililadxt reeman laaman.

## 14

*Güjt Waj Bén baroobnijs bejn ree  
 (Mr. 6:14-29; Lc. 9:7-9)*

<sup>1</sup> Tiampzii Herodes bén canabee niz Galilea, biguiejnman ni cayüjn Jesús. <sup>2</sup> Abi' rëbaman loj ree xbejnman:

—Waj bén baroobnijs bejn ree, laaman baban zatijb, zeel rajpaman guialrniabee rüjnman milagr ree.

<sup>3</sup> Rëb Herodes zian guial laaman gunabee bini-aaz Waj, abi' bixiiman con caden dxel badxe' reeman laaman ladxguiib. Been Herodes guin zian por Herodías lacheel bijchaman bén la Felip, <sup>4</sup> guial rëb Waj guin loj Herodes:

—Ad laat guial zojbnél laagajc lacheel bijchil.

<sup>5</sup> Guyën Herodes nugüjtaman Waj, per bidxe-baman xhie nüjn ree bejn laaman guial graczi

reeman rëb Waj naj tijb bén rudëëd xtiidx Dios loj ree bejn. <sup>6</sup> Per chi baza' Herodes ijj, brii xi'n Herodías baya'm loj ree xbioozaman. Abi' däd bayuladx Herodes zi'c baya'm, <sup>7</sup> dxel rëb Herodes gudëëdaman xhietëëz ni guiniabim. <sup>8</sup> Abi' xniaam rëb lojm xhie guiniabim, dxel rëbim loj Herodes:

—Banee guijs Waj bén ruroobnijs bejn ree, banen loj tijb pliajt.

<sup>9</sup> Däd guyunaya rey Herodes, per guial mal baya'n reeman diidx niz loj gra ree xbioozaman, gunabeeman xsuldadaman gudëëd reeman ni gunabim. <sup>10</sup> Dxel gunabeeman guitü' reeman guijs Waj lën ladxguiib guin, <sup>11</sup> abi' bidxinnë reeman laan loj tijb pliajt badëëd reeman laan lojm, dxel bayümin loj xniaam.

<sup>12</sup> Zianz bidxin ree xbejn Waj baca' reeman xcuerpaman persi biquie'ch reeman laaman. Dxel bicojn reeman Jesús.

*Ruyaan Jesús gaay mil bejn*  
(Mr. 6:30-44; Lc. 9:10-17; Jn. 6 :1-14)

<sup>13</sup> Chi gogbee Jesús zian, guyuman loj tijb barcw zëman niz lod achutdzi zojb din su laazaman. Chi gogbee ree bejn, dxel brii ladx reeman zë guia'zi reeman lod guidxinman. <sup>14</sup> Chi barii Jesús loj barcw guin baguiaaman bén guixiuj ree riga' yagaj, bayaman laa reeman abi' bayüjnman bénragxuu zinë reeman. <sup>15</sup> Chi ma gudxe, gubig ree xbejnman lojman rëb reeman:

—Ma gudxe yan, abi' achut bejn zojb niz guie. Güjdx loj ree bén guin ma gojl yaguiaj reeman, din che reeman guiedx lod sii ni gaw reeman.

<sup>16</sup> Per badxi' Jesúsan rëbaman:

—Ad rüjnt naguiejn yaguiaj reeman, lëjt gol badëe ni gaw reeman.

<sup>17</sup> Badxi' reeman laan rëb reeman:

—Per gaayzi guiadxtil naca'n con zatio'p bëjl.

<sup>18</sup> Dxel rëb Jesús loj reeman:

—Gol tanë reen guie.

<sup>19</sup> Dxel gunabeeman gurej gra ree bén guin loj guixya'. Abi' cwa'man guigaay guiadxtil guin con grop bëjl guin. Dxel gules lojman xanyabaa badëëman quixtëé loj Dios, abi' gula'man guiadxtil guin badëëman laan loj ree xbejnman persi gudi's reeman laan loj gra ree bén guin. <sup>20</sup> Gra reeman gudaw xt bigdxinladx reeman, abi' staczi bacha reeman za chiptio'p dxüm ni baya'n. <sup>21</sup> Bén gudaw guin ree naj reeman cost gaay mil xinguaaw garenqui ree béngunaa con ree xindoo.

### *Riza Jesús loj nijs*

(Mr. 6:45-52; Jn. 6:16-21)

<sup>22</sup> Dxel gunabee Jesús xbejnman guyu reeman loj barcw din ned reeman téd gaj reeman stiblad ro' nijs guin, la'tgaj cuzaadiidx néman benzien guin ree. <sup>23</sup> Chi ma gulox bazaadiidx néman laa reeman, dxel zë xtijbaman guijc tijb guia' din cwedx guiniabaman Dios. Chi gure guiaal xtijbzaman za' guijc guia' guin. <sup>24</sup> Guiáad barcw guin zift ma zén loj nijs, däd rliaro' xtüjp nijs guin laan guial rliaj bi niz loj barcw guin. <sup>25</sup> Chi ma cayreguiaal, zibig Jesús loj ree xbejnman rzaman loj nijs guin. <sup>26</sup> Dxel baguiaa ree xbejnman laaman rzaman loj nijs guin, däd bidxeb reeman abi' gurixdiaj reeman rëb reeman:

—Tijb anman!

**27** Per guneenë Jesús laa reeman rëbaman:

—¡Gol bagu' luxdoodi! ¡Najn, ad rdxebidi!

**28** Badxi' Bëdan rëbaman:

—Dad, bal lüjn, gunabee gazan loj nijs guin guialan lojl.

**29** Abi' rëb Jesús lojman:

—Guda.

Dxel baguiajt Bëd loj barcw guin, rzaman loj nijs guin zëman loj Jesús. **30** Per chi baguaaman bidoxhan cabi' dxel bidxebaman, abi' guial guzuloj cazeëbaman xan nijs guin guridxa'man rëbaman:

—¡Gognë naj, Dad!

**31** Loj hor ziigajc basli yaa Jesús gunaazaman yaa Bëd, rëbaman lojman:

—¿Chexc zeel ad rliladxza'ctil, chexc zeel yu' nawëëguil?

**32** Abi' chi bayë'p reeman loj barcw guin, laa bacwëëz gajc bi guin. **33** Guiáad ree bén yu' loj barcw guin bazuxib reeman loj Jesús, rëb reeman:

—Diidxliczi lüjn naj xi'n Dios.

### *Rayüjn Jesús bénragxuu ree Genesaret*

(Mr: 6:53-56)

**34** Chi gudëd reeman loj nijs guin dxel bidxin reeman xyuj ree bén Genesaret. **35** Abi' ree bén niz ni bayünbee reeman Jesús, abi' guidibczi niz yagaj gutie'ch reeman diidx guial za'man ni. Dxel binë ree bejn bénragxuu ree lojman, **36** guzajc reeman liaadx lojman din tiëbaman guagaal reeman majsi guia'zi xabaman. Abi' gra ree bén bagaal xabaman bayajc.

# 15

*Ni rüjn persi rajc bejn béndol  
(Mr. 7:1-23)*

<sup>1</sup> Bénfarisew ree con ree mextr rajc ley, bén za ree Jerusalén, gubig reeman loj Jesús abi' gunabdiidx reeman lojman, rëb reeman

<sup>2</sup> —¿Chexc zeel ad zinalt ree xbejnl costumbr ni basa'n dux bengulal ree? ¿Chexc zeel ad zinalt reeman costumbr zi'c rayal gunaa reeman chi gad reeman gaw?

<sup>3</sup> Dxel rëb Jesús loj reeman:

—Laadx läjt, ¿chexc zeel rüjndi xtiidx Dios tiblad persi zinal xcostumbridi? <sup>4</sup> Din Dios rëb: “Gojp respejt xDadil con xnial”, abi' “Bén rniecee díidxgуйdx loj xdadaman o xniaaman ya, rayal guiëtaman.” <sup>5</sup> Per läjt rëb zile' guiëb bejn loj xdadaman o xniaaman: “Ad zile't günan lüj yudar, din gra ni ra'pan naj par Dios.” <sup>6</sup> Rëbidi guial bén guiniee zian, ad zile't güün yudar xdadaman con xniaaman, abi' zian rbëéladxidi xtiidx Dios persi zinal xcostumbridi. <sup>7</sup> ¡Bén rusquiee! ¡Rüjnzidi guial nabandi xnejz! Waliqui ni gunee Isaías, bén badëë xtiidx Dios loj ree bejn, chi rëbamani:

<sup>8</sup> Bén guie ree rëbzi reeman rniajchi' reeman naj, per ad rënt reeman naj con guidib luxdoo reeman.

<sup>9</sup> Xlia'czi rniajchi' reeman naj,  
abi' rulüü reeman bejn ree ganaxzi ni rbëëguijc  
ree benguidxliuj.

<sup>10</sup> Dxel gurejdx Jesús ben zien riga' ree yagaj,  
abi' rëbamani loj reeman:

—Gol bacaagdiajg, gol bignia' tēē ni ganin lojdi.  
**11** Ad ni rawt bejn rüjn laaman béndol, ni ririi ro'man laan rüjn laaman béndol.

**12** Dxel gubig ree xbejn Jesús lojman, rëb reeman:

—¿Gogbeel ya bidxe'ch ree bénfarisew chi bigueijn reeman ni guneel?

**13** Badxi' Jesús laan rëbaman:

—Gra ni ad zëëdt por da Dadan Dios bén yu' xanyabaa, yu' dxej nitan. **14** Zeel gol basa'n reeman din laa reeman naj zi'c tijb bénlutia'p rulüü stijb bénlutia'p ban niz cheman. Abi' bal tijb bénlutia'p gulüü stijb bénlutia'p guin, zayajb grop reeman ro' bala'!

**15** Dxel rëb Bëd loj Jesús:

—¿Basingnia' dunujn xhie rën guiëb ni guneel?

**16** Badxi' Jesúsan rëbaman:

—¿Wen, ni'qui läjt ad rignia'tan ya? **17** ¿Id rignia'di ya guial gra ni raw bejn rej lënman abi' rariin? **18** Per diidx ririi ro' bejn, luxdooman zan, abi' laan rüjn laaman béndol. **19** Din luxdoó bejn za graloj ree xgabmal, guialrugüt bejn, guial rüjn nidxuudx, guialrzunë lacheel ben ren, guialrban, guialrusquiee në guialrniee diidxguijdx loj lasa'. **20** Gra ree ni guie naj ni rüjn bejn béndol. Per guial ad zunaat bejn zi'c naj costumbr ni rayal güün bejn chi gadaman gaw, ad laatan naj ni rüjn laaman béndol.

*Tijb bégunaan Canaán bililadx Jesús  
 (Mr. 7:24-30)*

**21** Chi baza Jesús yagaj zëman niz Tiro në niz Sidón. **22** Abi' yagaj zojb tijb bégunaan za niz Canaán, briiman, rbixdiajman rëbaman loj Jesús:

—;Dad, xdiaa Davi, baya naj! Da xi'ndxa'pan yu' bendxbab luxdoom, dd rusagziman laam.

<sup>23</sup> Abi' Jesus ad badxi'taman xtiidx bengunaa guin. Dxel gubig ree xbejnman lojman, reb reeman:

—Bidxga' bengunaa guin, din yaguiajman, din rbixdiajman nalaman dunuj ree.

<sup>24</sup> Dxel reb Jesus:

—Dios guxhaal naj din gunan yudar ganaxzi ree ben Israel ze loj nejz mal.

<sup>25</sup> Per bengunaa guin bigzuxibaman loj Jesus, rebaman:

—;Dad, gogne naj!

<sup>26</sup> Badxi' Jesusan, rebaman:

—Ad zagdxet naj chiquied bejn guiadxtil loj xi'nman din gudedaman laan loj ree be'cw.

<sup>27</sup> Badxi' bengunaa guinan, rebaman:

—Waliquil, Dad, per ne ree be'cw ruto'p guiadxtil laay ni ryajb xan xmex ben naj xbe'cw laa reeb.

<sup>28</sup> Dxel reb Jesus lojman:

—;Na, waliquil rliladxil con guidib luxdool! Gac zi'c renl.

Loj hor guin gajc bayajc xi'n ben guin.

### *Rayijn Jesus zien ree benragxuu*

<sup>29</sup> Baza Jesus yagaj, bidxinman ro' nijs Galilea, dxel wepaman guijc tijb guia' abi' gurejman yagaj. <sup>30</sup> Dad zien bejn bido'p lod za'man. Bine reeman bencoj ree, ne ree benlutia'p, ne ree ben ad rujnt xu'c dxiin, con ree bengop ne zien ree benragxuu ren ree, badxig reeman laa reeman loj Jesus, abi' bayijnman laa reeman. <sup>31</sup> Dad badxa loj ree bejn chi baguiaa reeman ma rniecee ree bengop, ma bayajc xu'c ree ben ad rujnt dxiin

xu'c, guiáad ree bencoj ma rza reeman abi' ree bénlutia'p ruguiaa reeman. Zianz guzuloj cuza't reeman zagdxe xDios ree bén Israel.

*Ruyaan Jesús tajp mil bejn  
(Mr. 8:1-10)*

**32** Abi' gurejdx Jesús bén naj ree xbejnman, rëbaman loj reeman:

—Rayan bén guin ree, din ma gojc choon dxej za' reeman con naj, abi' achet ni gaw reeman. Ad rëntan yagu'nejzan laa reeman sin guialraw ad nial yadaj reeman niz lunejz.

**33** Dxel rëb ree xbejnman lojman:

—Per ¿ban guin yuca'n ni gaw ree benzien guin, zi'c naj guie lod achutdzi bejn zojb?

**34** Gunabdiidx Jesús loj reeman, rëbaman:

—¿Bël guiadxtil ca'di?

Badxi' reeman laan rëb reeman:

—Gajdx guiadxtil con zatio'p choon bëjl.

**35** Dxel gunabee Jesús gurej gra ree bén guin luyuj. **36** Abi' cwa'man guigajdx ree guiadxtil guin con ree bëjl guin, badëëman quixtëë loj Dios.

Dxel gula'man laa reen, badëëman laa reen loj ree xbejnman persi gudi's reeman laa reen loj gra ree bén guin. **37** Gra reeman gudaw xt bigdxinladx reeman. Abi' staczi bacha reeman gajdx dxüm ni baya'n. **38** Bén gudaw ree naj reeman tajp mil xinguaaw, garenqui ree béngunaa con ree xindoo.

**39** Dxel bazaadiidxnë Jesús laa reeman, abi' guyuman loj barcw ziaman niz Magadán.

# 16

*Rniab reeman güün Jesús tijb milagr  
(Mr. 8:11-13; Lc. 12:54-56)*

<sup>1</sup> Bénfarisew ree con ree bénaducew bidxin reeman lod za' Jesús, abi' par güün reeman laaman prueb gunab reeman lojman din güünman tijb milagr din guiguien guial Dios guxhaal laaman.

<sup>2</sup> Per badxi' Jesús laan rëbaman:

—Wadxe ree chi ruguaadi naxnia xanyabaa, rëbidi: “Zagdxe gac guixie din naxnia xanyabaa.”

<sup>3</sup> Guiáad rsil chi naxnia xanyabaa yu' téezaj, rëbidi: “Ad laat gac yandxej.” ¡Bén rusquiee!, bal ragbeedi xhie rën guiëb sen yu' xanyabaa, ¿chexc ad rignia'tidi xhie rën guiëb gra ni cuguaadi yan?

<sup>4</sup> Bén mal, ad rliladxtidi abi' rniabidi günan tijb milagr, per achet guguaadi, tijbzzi zi'c guzac Jonás.

Dxel basa'n Jesús laa reeman, ziataman.

*Xlevadur ree bénfarisew  
(Mr. 8:14-21)*

<sup>5</sup> Dxel gudëdnë ree xbejnman stiblad ro' nijs guin, per bayanladx ree xbejnman ninë reeman guiadxtil. <sup>6</sup> Abi' rëb Jesús loj reeman:

—Gol gojp ciudad con xlevadur ree bénfarisew në ree bénaducew.

<sup>7</sup> Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

<sup>8</sup> Gogbee Jesús ni canee reeman abi' rëbaman loj reeman:

—¿Chexc zeel rëbidi guial ad ca'tidi guiadxtil?

Ta'nnijt rliladxidi naj. <sup>9</sup> ¿Staczi ad rignia'tidi ya? ¿Nid rusaaladxidi ya chi gudi'san gaay guiadxtil loj gaay mil bejn, abi' zabël dxüm ni baya'n bato'pidi?

**10** ¿Nid zaladx t  edi ya chi gudi'san gajdx guiadxtil loj tajp mil bejn, abi' zab  l dx  uman bato'pidi?  
**11** ¿Chexc zeel ad rignia'tidi guial ad guiadxtiltan cuzatan lojdi, chi rnin lojdi gapidi ciudad con xlevadur ree b  nfarisew n   ree b  nsadusew?

**12** Dxel bignia' ree xbejnman guial ad xlevadurt guiadxtilan cuza'taman loj reeman, r  baman zian din gap reeman ciudad con ni rul  y ree b  nfarisew n   ree b  nsaducew.

*R  b B  d guial Jes  s naj Cristo*

(*Mr. 8:27-30; Lc. 9:18-21*)

**13** Chi bidxin Jes  s niz Cesarea de Filipo, gunabdiidxaman loj ree xbejnman, r  baman:

—¿Chu r  b ree bejn, naj B  n guxhaal Dios?

**14** Badxi' reeman laan, r  b reeman:

—Yu' reeman r  b guial Wajn, b  n baroobnijs bejn ree. Yu'za reeman r  b guial El  asan, b  n bad     xtiidx Dios loj ree bejn, yu' t     reeman r  b guial Jerem  asan, b  n bad     xtiidx Dios loj ree bejn o stijb ben ren ya, b  n bad     xtiidx Dios loj ree bejn.

**15** Dxel r  baman loj reeman:

—Laadx l  jt, ¿xhie nadi, chu naj?

**16** Badxi' Sim  n B  dan, r  baman:

—L  jn naj Cristo. L  jn naj Xi'n Dios nabani.

**17** Dxel r  b Jes  s lojman:

—Xiquilbaal, Sim  n, xi'n Jon  s, din ad b  nguidxliujt guna lojl ni guinieel, da Dadan b  n yu' xanyabaa laaman naj b  n guna lojl. **18** Abi' naj rni lojl, B  d, (r  n gui  ban “guiaj”) l  j naj zi'c tijb guiaj ni gacn   lidxan, din por l  j grii ree b  n gac da bejnan abi' ni'qui guialg  jt ad zunijtt laa reeman.

**19** Naj gune l  j guialrniabee ni za xanyabaa, abi'

gra ni tiëbil gac loj guidxliuj guie ma naj gacan xanyabaa, guiáad ni ad zatiëjbt gac loj guidxliuj guie ad najt gacan xanyabaa.

<sup>20</sup> Dxel gunabee Jesús loj gra ree xbejnman guial achu loj guiëb reeman guial laaman naj Cristo.

*Rugojn Jesús guiëtaman  
(Mr. 8:31–9:1; Lc. 9:22-27)*

<sup>21</sup> Diizd nadxel guzuloj Jesús bagojn ree xbejnman guial naj cheman Jerusalén, abi' ree guxtis Israel con ree bixhioz rniabee ree bixhioz nē ree mextr rajc ley, laa reeman naj bén gusagzi laaman, gugüjt reeman laaman, per ni yayon dxej yabanman. <sup>22</sup> Dxel gulëëcaan Bëd laaman, rëbaman lojman:

—¡Dios ad zabëéladxt lüj, Dad! ¡Laaman ad zatiëjbt saquil zian!

<sup>23</sup> Per badxi' loj Jesús, rëbaman:  
—¡Basa'n naj, xindxabl!, ad rüjn nawëëguil lon. Din ad por Diost zëed ree xgab ni rüjnl, xixgab bënguidxliujn rüjnl.

<sup>24</sup> Dxel rëb Jesús loj ree xbejnman:  
—Bal yu' bén rën gac da bejnan ad zajct güünman zi'c naj xixgabaman, siibnejzaman guialzi ni tèdzaman abi' guidnalaman naj. <sup>25</sup> Din bén mazri rën xguialnaban ni rajpaman loj guidxliuj guie zadxin dxej gunijtaman laan. Per bén guiët por naj, zajpaman guialnaban tiblayaa con Dios. <sup>26</sup> Xhiéczi gan gap bejn gra ni yu' loj guidxliuj, abi' nitaman loj Dios. Din ad zile't sii bejn xguialnabanman xanyabaa. <sup>27</sup> Abi' Bén guxhaal Dios, gui'taman con xguialrniabee xDadaman Dios nē ree xianjl Dios din gudëëman ni rayal tijbgaj bejn,

bal gonin been bejn. <sup>28</sup> Diidxliczi rnin lojdi guial yu' ree bén riga' guie ad zétt reeman chi gad reeman guguaa Bén guxhaal Dios, gui'taman con xgualrniabeeman din nabeeman.

## 17

*Bidxaa Jesús loj choon ree xbejnman  
(Mr. 9:2-13; Lc. 9:28-36)*

<sup>1</sup> Chi gudëd xho'p dxej, binë Jesús Bëd, në Jacob con Waj bijch Jacob, binëman laa reeman guijc tijb guia' ya. <sup>2</sup> Ni bidxaa Jesús niz loj reeman. Dád balaa bacha' lojman zi'c rulaa gubijdx bacha', guíad xabaman bayajcan naquich, balaa tëen bacha' zi'c guij. <sup>3</sup> Abi' loj hor guin baguiaa reeman Moisejs con Elías cayünë reeman Jesús diidx. <sup>4</sup> Dxel rëb Bëd loj Jesús:

—Dad, ɿagdxe naj nadxu' ree guie! Bal rënl, gunan choon ranch, tijban par lüj, tijban par Moisejs, stijban par Elías.

<sup>5</sup> La'tgaj canee Bëd zian, biguiajt tijb zaj xt guijc reeman ridiinan bacha', loj zaj guin brii cha' bejn rëbaman:

—Bén guie naj da Xi'nan, bén rën da'tan, bén rabaanë' tëen, gol bacaagdiajg xtiidxaman.

<sup>6</sup> Chi biguiejn ree xbejn Jesús diidx guin ree, bazuxib reeman basajb loj reeman xt luyuj, dád bidxeb reeman. <sup>7</sup> Dxel gubig Jesús lod za' reeman, baqui'man laa reeman, rëbaman:

—Gol guzuli, ad ridxebidi.

<sup>8</sup> Abi' chi gules loj reeman achutri baguiaa reeman, tijbzi Jesús za' yagaj.

<sup>9</sup> La'tgaj cayguajt reeman ruguia' guin, rëb Jesús loj reeman:

—Achuczi loj guiëbidi ni baguiaadi, xt chi yaban Bén guxhaal Dios.

<sup>10</sup> Dxel gunabdiidx ree xbejnman lojman, rëb reeman:

—¿Chexquiza zeel rëb ree mextr rajc ley guial yaloj Elías gui't?

<sup>11</sup> Badxi' Jesúsan, rëbaman:

—Walican guial yaloj Elías gui't, laaman guzuxnejz gra. <sup>12</sup> Per naj rni läjt guial mal bi't Elías, abi' ad bayagbeet ree bejn laaman, beennë reeman laaman ni guyëntzi reeman. Abi' ziangajc gusagzi reeman Bén guxhaal Dios.

<sup>13</sup> Dxel gogbee ree xbejnman guial Wajn bén baroobnijs bejn ree cuza'taman.

*Rayüjn Jesús tijb xin rëjtya'  
(Mr. 9:14-29; Lc. 9:37-43)*

<sup>14</sup> Chi badxin Jesús con guiyon ree xbejnman, lod cabëz ree ben pien laaman bibig tijb xinguaaw lojman, bazuxibix lojman rëbix:

<sup>15</sup> —Dad, baya da xi'nan, din däd rzagdiajx rëjtya'x. Bëlczi volt riyajbix lojguij o lojnijs ya.

<sup>16</sup> Bidnë'n laax loj ree xbejnl, per ad rajct rayüjn reeman laax.

<sup>17</sup> Badxi' Jesúsan, rëbaman:

—¡Benguijdx, bén ad rliladxt! ¿Xt goc gazunë'n läjt? ¿Xt goc gadaanan läjt? Gol tanë xinzii guie.

<sup>18</sup> Dxel gudilë Jesús xindxab guin, babëëman laax luxdoo xin guin. Loj hor guin gajc bayajquix.

<sup>19</sup> Abi' gunabdiidx ree xbejn Jesús lojman lood ren, rëb reeman:

—¿Chexc zeel ad gojct nalëën xindxab guin luxdoo xin guin?

<sup>20</sup> Dxel rëb Jesús loj reeman:

—Guial ta'nzi rliladxidi. Naj rni lojdi bal naj xguialrliladxidi majsi zi'ctzi naj xhaj moxhtajs, zile' guiébidi loj guia' guin: “Bisüd guie, bisob lood ren”, zucaagdajgan xtiidxidi. Achetczi gac nawëég par lëjt. <sup>21</sup> Per par yarii lasa' ree xindxbi guie ryaadx chu cwedx guiniab Dios guiba'n tëë.

*Rugojn Jesús zatijb guial guiëtaman  
(Mr. 9:30-32; Lc. 9:43-45)*

<sup>22</sup> La'tgaj za' Jesús niz Galilea con ree xbejnman, rëbaman loj reeman guial yayü reeman Bén guxhaal Dios loj ree bejn, <sup>23</sup> abi' gugüjt reeman laaman, per ni yayon dxej yabanman. Chi biguiejn ree xbejnman zian, däd guyu naya reeman.

*Ni rajx par yadoo*

<sup>24</sup> Chi badxin Jesús con ree xbejnman guiedx Capernaum, bén ruquijx ree impuest par yadoo wej reeman loj Bëd bignabdiidx reeman, rëb reeman:

—¿Rguijx xmextril impuest par yadoo ya?

<sup>25</sup> Badxi! Bëdan, rëbaman:

—Riguijxcaman laan.

Dxel chi bayu Bëd lënü lod za' Jesús, yalojli Jesús gunabdiidx lojman, rëbaman:

—¿Xhie naladxil, Simón? ¿Chu rguijx impuest loj ree rey yu' loj guidxliuj guie? ¿Xi'n reeman ya o benzit ree?

<sup>26</sup> Badxi! Bëd laan rëbaman:

—Benzit ree.

Dxel rëb Jesús:

—Abi' ree bén ladx reeman ad rguijxt reeman laan. <sup>27</sup> Per chiteëe guidxe'ch reeman, wej ro' nijs, bazaal xiānsuelil, dxel bëjl yaloj ni guiniaazil

babëëb. Ro' bëjl guin guidxelil tijb cintabl, con laan bitijx dux impuest.

## 18

*¿Chu mazri zojbloj?*  
(*Mr. 9:33-37; Lc. 9:46-48*)

<sup>1</sup> Lën ree dxejzii bidxin ree xbejn Jesús lod za'man, abi' gunabdiidx reeman lojman, rëb reeman:

—¿Chu mazri zojbloj lod rniabee Dios?

<sup>2</sup> Dxel gurejdx Jesús tijb xindoo, bazujman laax galay reeman, <sup>3</sup> abi' rëbaman:

—Diidxliczi rnin lojdi bal id zayüjndi xgab por xtolidi, bal id zajc téedì zi'c tijb xindoo, ad zutidi lod rniabee Dios. <sup>4</sup> Bén güün naya loj Dios, gac tée'man zi'c xindo guie, laaman gac bén mazri zojbloj lod rniabee Dios. <sup>5</sup> Abi' bén yaca' tijb xindoo, por naj, najn raca'man.

*Bén rüjn persi ryajb ree bejn loj dol*  
(*Mr. 9:42-48; Lc. 17:1-2*)

<sup>6</sup> 'Bal chu gusajb tijb bén qui rliladxri naj loj dol, zagdxeli guixhii reeman tijb guiajro' yëjnman guzaal reeman laaman xt xan nijs. <sup>7</sup> ¡Probza bénguidxliuj guial yu' da't ni rusajb laaman loj dol! Zianczi yu' ni mal guin loj guidxliuj, per ¡probza bén gusajb bejn ree loj dol!

<sup>8</sup> 'Zeel, bal laagajc yaal o guia'l rusajb lüj loj dol, zagdxeli gutü'n bazaalan zift, din zagdxeli chu'l xanyabaa con tibladzi yaal o con tibladzi guia'l, luar chu'l con groplad yaal o groplad guia'l loj bajl ni ad yu't dxej yayü'. <sup>9</sup> Abi' bal laagajc guiaaloj rusajb lüj loj dol, gulëen bazaalan zift, zagdxeli

chu'l con tibladzi guiaalojl xanyabaa, luar chu'l con gropladan loj bajl yu' gabijl.

*Xcwent xiil gunit  
(Lc. 15:3-7)*

<sup>10</sup> 'Ad guiniajgaadi loj ree bén qui rliladxri naj. Din diidxliczi rnin läjt guial xanyabaa yu' ree anjl rniaj laa reeman zianczi za' reeman loj da Dadan Dios bén yu' xanyabaa. <sup>11</sup> Guiáad Bén guxhaal Dios zëédaman par ree bén ad zinalt xnejz Dios din laa reeman loj dol.

<sup>12</sup> ¿Xhie naladxidi? Bal tijb bejn rajp tibgayuu xiil, abi' rizëëb tijbib, ¿nid zusa'nman zatajpga-jlchiinbitapib dajn ya din chigdilaman be bizëëb guin? <sup>13</sup> Abi' bal yadxejlaman laab, diidxliczi rnin mazri yabaanëman laab guial loj tajpgajlchi-inbitap be ad bizëëb guint. <sup>14</sup> Ziangajc dux Dad ree Dios bén yu' xanyabaa ad rëntaman nit ni'czi tijb ree bén qui rliladxri laaman.

*Xhienag yaguieen perdon du lasa' ree  
(Lc. 17:3)*

<sup>15</sup> 'Bal xhie tijb ni mal güün lasa'l lüj, guneenëman lüjzi din gagbeeman xhie falt badxe'man. Bal guidxga'man xtiidxil, ma beenl gan yaneenël laaman zagdxe. <sup>16</sup> Bal id ridxga'man lüj, binë zatijb o zatio'p bejn, din chigneenëdi laaman din con xtiidx tio'p o choon bejn guiguien guial ma bigneenël laaman. <sup>17</sup> Dxel bal ni'qui xtiidx reeman ad ridxga'taman, bagojn ree bén zinal xnejz Dios, abi' bal ni'qui xtiidx reeman ad ridxga'taman, dxel ma guguaadi laaman zi'c tijb bén ad rliladxt Dios o zi'c tijb bén ruquijx impuest par Rom.

**18** 'Diidxliczi rmin, gra ni ad zatiëjbtidi gac loj guidxliuj guie ad rajctan xanyabaa, guiáad ni tiëbidi gac loj guidxliuj guie mal rajcan xanyabaa.

**19** 'Rni tēen läjt: Bal yaya'n tio'pidi diidx loj guidxliuj guie, par guiniabidi xhienin loj da Dadan bén yu' xanyabaa, laaman gunee laan.  
**20** Din lod rado'p tio'p o choon bejn por naj, laa naj za' galay reeman.

**21** Dxeł gubig Bëd gunabdiidxaman loj Jesúś, rëbaman:

—Dad, ¿bël volt rayal günan perdon lasa'n, bal güünman naj xhienin? ¿Xt gajdx volt ya?

**22** Badxi' Jesúsan rëbaman:  
 —Ad gajdx voltizi rayal güün lasa'l perdon, rayal güünl perdon gajdx volt gayojnchii.

### *Xcwent bén ad rüjnt perdon lasa'*

**23** 'Xguialrniabee Dios naj zi'c tijb rey ni been xgab guial ma gojl yaguijx ree xmojsaman lojman.

**24** Chi guzulojman caybëéman cwent guin, bidxin tijb xmojsaman lojman bén ral zro' da't.

**25** Abi' guial achet rajp bén guin din yaguijxaman ni ralaman, gunabee rey guin to'man lojree bejn në lacheelaman con ree xi'nman nëtëeë gra ni rajpaman din chile' yaguijxaman di'n guin.

**26** Dxeł bazuxibaman loj rey guin, beenman naya rëbaman: “Dad, gojp naj pacens zaguixcan graczi ni ralan lojl.”

**27** Zianz baya rey guin laaman, beenman laaman perdon gra ni ralaman, abi' baslaaman laaman ziaman.

**28** Per chi barii mojs guin yagaj, badxajgaman tijb bén rüjnnëman dxiin,

ralaman ta'nzi milia lojman. Dxeł gunaazaman laaman guzuloj caguiajman yëjnman, rëbaman:

“¡Baguijx ni ralil lon!” <sup>29</sup> Dixel bazuxib bén guin lojman beenman naya rëbaman: “Gojp naj pacens zaguixcan graczi ni ralan lojl.” <sup>30</sup> Per ad guyënt bén guin, badxe'man laaman ladxguiib xt lodzi yaguijxaman di'n guin. <sup>31</sup> Chi baguiaa ree los demazri ree xmojs rey guin, dák gognaa luxdoo reeman, abi' wej reeman biguiedx reeman lojman gra ni goc. <sup>32</sup> Dixel gurejdx rey guin mojs guin, zianz rëbaman lojman: “¡Mojs guijdx! Benan perdon gra ni ralil lon guial beenl naya. <sup>33</sup> ¿Nid nëgajc lüj rayal naya xcompniaril ya, zi'cgajc bayan lüj?” <sup>34</sup> Abi' guial tant balen rey guin, gunabeeman badxe' reeman laaman ladxguiib xt lodzi baguijx gra ni ralaman.

<sup>35</sup> Basnuu Jesús rëbaman:

—Ziangajc güünnë da Dadan lëjt, bén yu' xanyabaa, bal id züjn perdon lasa'di con guidib luxdoodi ni rüjnnë reeman lëjt.

## 19

*Rulüü Jesús xcwent guial rala' lasa'*

(*Mr. 10:1-12; Lc. 16:18*)

<sup>1</sup> Chi gulox gunee Jesús zian, bazaman niz Galilea, zëman niz Judea, niz stiblad ro' guiw Jordán. <sup>2</sup> Zien ree bejn binal laaman, yagaj bayüjnman bénragxuu ree.

<sup>3</sup> Abi' tio'p choon ree bénfarisew bibig loj Jesús, dxel par güün reeman laaman prueb, gunabdiidx reeman lojman rëb reeman:

—¿Zile' yala' bejn lacheelaman por xhiedxitzinin ya?

<sup>4</sup> Badxi' Jesúsan rëbaman:

—¿Nid wayoolidi loj xtiidx Dios ya, guial diizd guia'xchej Dios “been xinguaaw nē bengunaa”?

<sup>5</sup> Rēb tēēman: “Zeel xinguaaw gusa'n xdad xniaax din guibannē lacheelix, dxel grop reex ma gac zi'c tijbzi bejn.” <sup>6</sup> Zianan zeel ad najtri reex tio'p, ma naj reex tijbzi. Zeel benguidxliuj ad rayalt yala'man lasa' ni ma bachajg Dios.

<sup>7</sup> Dxel rēb ree bénfarisew guin loj Jesús:

—¿Chexquiza zeel rēb Moisejs guial zile' yala' lacheel bejn, con gudëēdaman gui'ch guial ma bala' lasa' reeman?

<sup>8</sup> Badxi' Jesúsan, rēbaman:

—Cwējb Moisejs gojc zian guial ad rëntidi guzoobidi diidx, per ad ziant gojc diizd guia'xchej.

<sup>9</sup> Naj rni lojdi. Xin yala' lacheel, bal id za'nē lacheelix xin ren, abi' tia'x ben ren dolan cayünx. Ziangajc xin tia' bén qui bala'ri lasa' guin dolan cayünx.

<sup>10</sup> Dxel rēb ree xbejn Jesús lojman:

—Bal zian naj xcwent guial ru lacheel, zagdxeli ad zut lacheel bejn

<sup>11</sup> Badxi' Jesúsan rēbaman:

—Ad grat bejn zile' chignia' ni canin, bén ca'zi ree quiarguejn par chignia' reeman laan. <sup>12</sup> Yu' bejn diizd rajlaman ad zéëdtaman loj guidxliuj par guxhliaaman, yu'za reeman, bejn rüjn laa reeman zian. Abi' yu' reeman rüjn xgab guial zagdxeli guite'ch reeman xtiidx Dios luar guxhliaa reeman. Bén rēn chignia', gol bignia'.

*Rüjnle' Jesús xindoo ree  
(Mr. 10:13-16; Lc. 18:15-17)*

**13** Binë ree bejn xindoo ree lod za' Jesús, din guixhioob yaaman guijc reex cwedx guiniab tēéman Dios por laa reex, per ree xbejnman guzuloj cadilë reeman bén zinë ree laa reex. **14** Dxel rëb Jesús loj reeman:

—Gol baslaa gui't reex lon, ad bal rudxoondi, din lod rniabee Dios naj par ree bén naj zi'c laa reex.

**15** Abi' guxhoob yaa Jesús guijc ree xindo guin, dxel ziaman.

### *Tijb xinrijcw*

(*Mr. 10:17-31; Lc. 18:18-30*)

**16** Bidxin tijb xin guin loj Jesús, abi' gunabdiidxix lojman, rëbix:

—Mextr, ¿xhie ni zagdxe günan din ga'pan guialnaban tiblayaa con Dios?

**17** Dxel rëb Jesús lojx:

—¿Chexc zeel rniabdiidxil lon conin naj ni zاغدxe? Achut naj benza'c, tijbzi Dios. Per bal rënl gapil guialnaban tiblayaa con Dios, been zi'c rëb ree mandamient.

**18** Dxel gunabdiidxix loj Jesús rëbix:

—¿Con ree mandamientan?

Badxi' Jesúsan, rëbaman:

—Ad gugüjtil bejn, ad sunël lacheel ben ren, ad cwanl, ad cwëél xtiidx bejn, **19** gojp respejt xdad xniaal, guyën tēé ree lasa'l zi'c rën lüj gajc.

**20** Dxel rëbix:

—Gra ree ni guin cayünan diizzd najn xindoo, ¿xhieri ryaadx günan yan?

**21** Badxi' Jesúsan, rëbaman:

—Bal rënl gaquil benza'c loj Dios, bigto' gra ni rajpil dxel gudëél milia guin loj ree bénprob. Zian gapil guialnaza'c xanyabaa. Zianz guidnalil naj.

<sup>22</sup> Chi biguiejn xin guin zian, dád guyu nayax ziax, guial dád xinrijcwan.

<sup>23</sup> Dxel rëb Jesúz loj ree xbejnman:

—Diidxliczi rnin lojdi: Dád nawëég chu' benrijcw lod rniabee Dios. <sup>24</sup> Naj rni lëjt. Adli nawëëgt tèd tijb camell xan gagux, guial chu' tijb benrijcw lod rniabee Dios.

<sup>25</sup> Chi biguiejn ree xbejn Jesúz zian, dád badxaloj reeman, abi' rëb reeman:

—¿Chuza zajc gac perdon loj Dios?

<sup>26</sup> Dxel baguiaa Jesúz loj reeman, rëbaman:

—Nawëég gac zian par benguidxliuj, per par Dios achet ni nawëég yu'!

<sup>27</sup> Abi' rëb Bëd lojman:

—Ma basa'nan graczi ni raya'pan, persi zud-naalan lüj. Abi' ¿xhieza yayalan?

<sup>28</sup> Badxi' Jesúsan, rëbaman:

—Diidxliczi rnin lojdi chi guidxin dxej yacüb gra, guidxin tèë dxej cwe Bén guxhaal Dios luar lod nabeeman, në lëjt, guial zidnalidi naj, c wedi loj chiptio'p ree luar lod nabeedi, din güün xguial-guxtisidi loj guidxiptio'p ree xdiaa Israel. <sup>29</sup> Abi' gra ree bén basa'n lidx, bijch, bizan, xdad, xniaa, xi'n, o guidxliuj ree por naj, zaca' reeman tib-gayuu volt mazri guial loj ni basa'n reeman, zajp tèë reeman guialnaban tiblayaa con Dios. <sup>30</sup> Per zien ree bén naj bén yaloj, gac reeman bén bigra, abi' zienza ree bén naj bén bigra, gac reeman bén yaloj.

# 20

## *Xcwent ree bén rüjn dxiin*

<sup>1</sup> Rëb tëé Jesús:

—Xguialniabee Dios naj zi'c tijb bén rajp tijb guiniaaro', rsildoo briiman zitiilaman mojs güün dxiin loj xguiniaaman. <sup>2</sup> Baya'nnëman laa reeman diidx plac quixaman tijb gaj reeman tibdxej, dxel guxhaalaman laa reeman loj xguiniaaman. <sup>3</sup> Dxel briiman stijb cost raca gaa rsil, abi' baguiaaman ben ren ree za' reeman galay luguiedx, achet xchiin reeman. <sup>4</sup> Zianz rëbaman loj reeman: “Gol biguieen dxiin loj da guiniaan, naj gaguix läjt zi'c rayal.” Dxel zë reeman. <sup>5</sup> Cost garol dxej briiman stijb, abi' brii gajman cost raca choon wadxe ziangajc rëbaman loj ree bén riga' yagaj, bén achet xchiin. <sup>6</sup> Cost raca gaay wadxe wejman galay luguiedx guin stijb, abi' bidxaaglojman ben ren ree, bén achet ree xchiin, gunabdiidxaman loj reeman, rëbaman: “¿Chexc zeel za'di guin gudëdchej ad cayüjntidi dxiin?” <sup>7</sup> Badxi' reeman laan rëb reeman: “Achut wanee dxiin yaguieenan.” Dxel rëbaman loj reeman: “Në läjt gol biguieen dxiin loj da guiniaan naj gaguix läjt zi'c rayal.” <sup>8</sup> Chi ma gurej guiaal, rëb bén naj xguiniaan loj bén naaz dxiin guin: “Gurejdx ree mojs guin din quixil laa reeman, per yalojxgaj gudijx ree bén bigra guyu, zianz quixil bén guyu ree yaloj.” <sup>9</sup> Chi bidxin ree bén guyu loj dxiin guin raca gaay wadxe, gojx tijbgaj reeman xieen tibdxej. <sup>10</sup> Dxel chi bidxin ree bén guyu loj dxiin diizd rsil, gunaladx reeman niajx reeman mazri, per nëgajc reeman gojx xieen tibdxej. <sup>11</sup> Abi'

chi cayajx reeman, guzuloj cadxe'ch reeman bén naj xguiniaa laan, <sup>12</sup> rëb reeman lojman: “Bén bigra guyu ree, been reeman dxiin tib horzi abi' zi'cgajc caguijxil dunujn gudixil laa reeman, abi' dunujn badaanan baguieenan dxiin dëchej loj guialnalaa.” <sup>13</sup> Per rëb bén guin loj tijb reeman: “Achet ni mal cayünan lüj. ¿Nid bay'a'n diidx ya plac gunen tia'l tibdxej? <sup>14</sup> Cwa' ni bayalil baguiaj. Din naj rënan gaguixan bén bigratë guyu zi'c gudixan lüj, <sup>15</sup> zajc günnë' da milian ni rëntzan. ¿O nadëdlojl ya guial najn benza'c?” <sup>16</sup> Zianan zeel bén naj ree bén bigra gac reeman bén yaloj, guiáad ree bén yaloj gac reeman bén bigra.

*Bayon volt bagojn Jesús guial guiëtaman  
(Mr. 10:32-34; Lc. 18:31-34)*

<sup>17</sup> Chi zë Jesús Jerusalén, gurejdx guidxiptio'p ree xbejnman tiblad, rëbaman loj reeman:

<sup>18</sup>—Ganin läjt, ziyo' ree Jerusalén, lod yayü reeman Bén guxhaal Dios, loj ree bixhioz rnabee ree bixhioz në loj ree mextr rajc ley, abi' laa reeman nabee guiëtaman, <sup>19</sup> yayü reeman laaman loj ree benzit, din guze' reeman laaman quin tëe reeman laaman, abi' gucaa reeman laaman loj crüjz, per yayon dxej yabanman.

*Ni gunab xniaa Jacob con Waj  
(Mr. 10:35-45)*

<sup>20</sup> Gubig lacheel Zebedeo loj Jesús con grop ree xi'nman, bazuxibaman lojman din guiniabaman ni rënman. <sup>21</sup> Gunabdiidx Jesús lojman, rëbaman:

—¿Xhie rënl?

Badxi' bén guinan, rëbaman:

—Rënan nabeel cwe tijb da xi'nan xladbeel, sti-jbim xladruvejsil, chi ma canabeel.

<sup>22</sup> Dxel rëb Jesús:

—Ad ragbeetidi ni rniabidi. ¿Wen zajc tëdidi guialzi zi'c naj ni gadëëdan ya?

Badxi' reeman laan, rëb reeman:

—Zayajcan.

<sup>23</sup> Abi' rëbaman:

—Diidxliczi rnin zajc tëdidi guialzi zi'c naj ni gadëëdan, per guial cwedi da ladbeen o da ladruvejsan ya ad najt rayal ganabee, din ma najn parree bén bacaabee da Dadan.

<sup>24</sup> Chi biguiejn zachii ree xbejn Jesús zian dák balen reeman grop bijch reeman. <sup>25</sup> Per gurejdx Jesús laa reeman, rëbaman:

—Lëjt ragbee, bén rniabee ree loj guidxliuj, rniabee reeman bejn ree zi'ctzi rën reeman, guíaad ree bén zojbloj rüjnnë reeman bejn ree zi'ctzi rën reeman por guialniabee ni rajp reeman. <sup>26</sup> Per con lëjt ad rayalt gac zian. Bal chu rën gac bén rniabee lojdi, rayal güünman sirv lojdi. <sup>27</sup> Ziengajc bén rën gac bén zojbloj lojdi, rayal güünman sirv lojdi zi'c bén nado!. <sup>28</sup> Zi'c Bén guxhaal Dios ad bi'ttaman par güün reeman sirv lojman, bi'taman par güünman sirv gudeëë tée xguialnabanman din laa zien bejn loj dol.

*Rayüjn Jesús tio'p ree bénlutia'p*

*(Mr. 10:46-52; Lc. 18:35-43)*

<sup>29</sup> Chi bazaman luguiedx Jericó con ree xbejniman, dák zien ree bejn binal laaman. <sup>30</sup> Dxel tio'p ree bénlutia'p zojb cwë' nejz chi biguiejn reeman cadëd Jesús niz yagaj, gurixdiaj reeman rëb reeman:

—¡Dad, xdiaa Davi, baya dunujn!

<sup>31</sup> Abi' rdilë ree ben guin laa reeman din yacwëëz ro' reeman, per mazri ribixdiaj reeman rëb reeman:

—¡Dad, xdiaa Davi, baya dunujn!

<sup>32</sup> Dxel guzudxe Jesús, gurejdxaman laa reeman, gunabdiidxaman loj reeman, rëbaman:

—¿Xhie rëndi günan por läjt?

<sup>33</sup> Badxi' reeman laan, rëb reeman:

—Dad, rayënan yaxal du lojn.

<sup>34</sup> Dxel baya Jesús laa reeman, abi' baqui'man loj reeman. Loj hor zii baxal loj reeman, dxel binal reeman Jesús.

## 21

### *Ru Jesús Jerusalén*

(*Mr 11:1-11; Lc. 19:28-40; Jn. 12 :12-19*)

<sup>1</sup> Chi ma cadxin Jesús con ree xbejnman Jerusalén, niz guiedx la Betfagé, gajxh ruguia' Olivos, guxhaal Jesús tio'p ree xbejnman, <sup>2</sup> rëbaman loj reeman:

—Golchej guiedx riga' lad ni, ni guidxaaglojdi tijb bur, caduunë xi'nb. Gol guxhiec reeb gol tanë reeb guie. <sup>3</sup> Abi' bal chu xhie na lojdi, gol güjdx guial Dad Jesús cayaadx laa reeb, gandoo yaxhaalaman laa reeb.

<sup>4</sup> Zian gojc persi gojc cumplid ni gunee bén badëë xtiidx Dios loj ree bejn, chi rëbaman:

<sup>5</sup> Gol güjdx loj ree bén Sión:

“Gol baguiaa laa xreydi zëëd lojdi,  
ad zëëdtaman nabë, dxiibaman tijb bur,  
tijb burdoo xi'n tijb be rüü.”

**6** Dxel wej ree xbejn Jesús abi' been reeman zi'c rëbaman loj reeman, **7** binë reeman bur guin con xi'nb, abi' badxiib xab reeman xijch reeb zianz gudxib Jesús burdo guin. **8** Abi' guial zien ree bejn, yu' reeman rguijxh xab lunejz, zien tëë reeman ritü' xidx ree yag persi rguijxh reeman laa reen lod cadëdaman. **9** Abi' zi'c ree bén ned zi'c ree bén zidnal laaman, rbixdiaj reeman, rëb reeman:

—¡Benza'c bendxoon naj xdiaa rey Davi! ¡Nüjne' Dios bén guxhaalaman! ¡Benza'c bendxoon naj Dios bén yu' xanyabaa!

**10** Chi guyu Jesús luguiedx Jerusalén, gra ree bén luguiedx guin badxaloj, abi' riniabdiidx loj lasa' reeman, rëb reeman:

—¿Chu bén guin?

**11** Dxel rëb ree benzien guin:

—Laaman naj Jesús, bén rudëë xtiidx Dios loj ree bejn, bén Nazaret guiedx riga' niz Galilea.

*Rabëë Jesús bén ruto' ree lën yadoo Jerusalén*

*(Mr. 11:15-19; Lc. 19:45-48; Jn. 2:13-22)*

**12** Chi bidxin Jesús ro' yadooro' Jerusalén, guzu-loj caybëëman bén cuto' ree në ree bén cazii. Barexguiataman xmex ree bén cuchaa milia në xmex ree bén cuto' palom. **13** Dxel rëb Jesús loj reeman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per läjt nüjndan zi'c lidx ree xingubaan.

**14** Dxel bénlutia'p ree con ree bencoj bibig reeman loj Jesús lën yadoo guin abi' bayünman laa reeman. **15** Per chi baguiaa ree bixhioz rniabee ree bixhioz con ree mextr rajc ley milagr cayüjn Jesús, biguiejn tëë reeman rëb ree xindoo lën yadoo

guin: “Benza'c bendxoon naj xdiaa rey Davi”, dxel dd bidxe'ch reeman. <sup>16</sup> Abi' rb reeman loj Jess:  
—¿Rguiejnl ni canee ree xindo guin ya?

Badxi' Jessan, rbaman:  
—Rguiejncan. Per ¿gadidi gool loj xtiidx Dios ya?  
Lod rb:  
Luj baded ni gool ree xindoo n ree xindobz sta  
r' dud,  
din guilies reex xvaloril.

<sup>17</sup> Dxel basa'n Jess laa reeman, zman Betania ni baya'nman guxhin guin.

*Tijb yag higo ni gubidx  
(Mr. 11:12-14, 20-26)*

<sup>18</sup> Chi bareguiaal rsil la'tgaj z Jess Jerusaln stijb, guzuloj gulaanman. <sup>19</sup> Abi' baguiaaman zojb tijb yag higo cw' nejz, dxel gubigaman cw'n, per ganaxzi balag ca lojn. Zianz rbaman loj yag higo guin:

—¡Ad yu'tri dxej tial higo!  
Loj hor guin gajc gubidx yag guin. <sup>20</sup> Chi baguiaaa ree xbejnman zian, dd badxaloj reeman abi' gun-abdiidx reeman loj Jess, rb reeman:  
—¿Xhienagaag gojc zeel laa gubidx gajc yag higo guin?

<sup>21</sup> Badxi' Jessan, rbaman:  
—Naj rni lojdi, bal rliladxidi Dios abi' ad zunawegtidi, ad ni bentzan con yag higo guin zajc gundi, zajc guibidi loj guia' guie: “Biquied guie, bisob loj nijsdoo”, abi' zajc gajc zian. <sup>22</sup> Gra ni guiniabidi loj Dios, bal rliladxidi laaman, zuneman laan.

*Xguialrniabee Jesús  
(Mr. 11:27-33; Lc. 20:1-8)*

<sup>23</sup> Chi guyu Jesús lén yadooro' Jerusalén, la'tgaj culüuman bejn ree. Bixhioz rniabee ree bixhioz con ree guxtis Israel, gubig reeman loj Jesús, abi' gunabdiidx reeman, rëb reeman:

—¿Chu na güünl ni guin ree? ¿Chu banee guialrniabee lojl?

<sup>24</sup> Badxi' Jesúsan, rëbaman:

—Ziangajc naj yu' tijb ni ganabdiidxan lojdi, bal yadxi'dan dxel ganin läjt chu banee guialrniabee günan ni guin ree. <sup>25</sup> ¿Chu guxhaal Waj chigroobnijSAMAN bejn ree, Dios ya o bénguidxliuj?

Dxel guzuloj cayü reeman diidx, rëb reeman:

—Bal yague'ch ree, “Dios guxhaal laaman”, zanaman: “¿Chexza zeel ad bililadxtidi laaman?”

<sup>26</sup> Abi'za bal yague'ch ree: “bénguidxliuj guxhaal laaman”, radxeb ree yalen ree bejn din gra reeman rliladx guial Waj naj bén badëed xtiidx Dios loj ree bejn.

<sup>27</sup> Dxel rëb reeman loj Jesús:

—Ad rayagbeetan.

Badxi' Jesúsan, rëbaman:

—Ni'qui naj ad zanitan lojdi chu banee guialrniabee günan ni guin ree.

*Tijb bén guyu tio'p xi'n*

<sup>28</sup> Basnuu Jesús rëbaman loj ree bixhioz rniabee ree bixhioz në loj ree guxtis Israel.

—¿Xhie nadi ni ganin läjt? Tijb bejn guyu tio'p xi'nman, dxel rëbaman loj tijbix: “Xi'n, wej yandxej biguieen dxiin loj guiniaa yu' uv.” <sup>29</sup> Badxi'xan, rëbix: “Ad zatan.” Per dxelri bayüjnx xgab zianz

wejx. <sup>30</sup> Abi' rëbaman loj stijb xi'nman din chex, badxi'xan, rëbix: "Yo dad, gazacan." Per ad wejtix.

<sup>31</sup> Yan, ¿chu loj grop reex been ni rën xdad reex?

Badxi' reeman laan, rëb reeman:

—Xin rëbaman loj yaloj guin.

Dxel rëb Jesús loj reeman:

—Diidxliczi rnin, bén ruquijx ree impuest con ree béngunaa naban nadxuudx, yalojl laa reeman chu' lod rniabee Dios guial lojdi. <sup>32</sup> Din bi't Waj, bén baroobnijs bejn ree par gulüüman läjt xhienaaag guibandi, per ad bililadxtidi xtiidxaman. Guiáad ree bén ruquijx impuest con ree béngunaa naban nadxuudx, bililadx reeman xtiidxaman. Per läjt majsí baguiaadi gra ree ni guin, ad bayüjntidi xgab por xtoldi din nililadxidi laaman.

*Xcwent ree mojs guijdx  
(Mr. 12:1-12; Lc. 20:9-19)*

<sup>33</sup> Rëb tëë Jesús loj reeman:

—Yan, gol bacaagdiajg ganin läjt stijb ni naj zi'c cwent. Guyu tijb bejn guxübinman uv ree loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' bazoobaman tijb yu ya da't din guiya'p guidib guinia guin.

'Zianz badëédaman laan garol loj ree bén güün dxiin lojn, zëtaman zift. <sup>34</sup> Chi bidxin dxej yaru' ree uv guin, guxhaalaman tio'p choon ree xmojsaman chigxii reeman ni rayalaman. <sup>35</sup> Per ree bén rüjn dxiin loj guinia guin gunaaz reeman mojs guin ree. Tijbaman gudijn reeman, stijbaman bagüjt reeman, stijbaman bacaaguiaj reeman. <sup>36</sup> Dxel

bén naj xguiniaan guxhaalaman mazri ree mojs  
guial loj ree bén we yaloj, per ziangajc beennë ree  
bén guin laa reeman.

<sup>37</sup> 'Ni bigra, guxhaal xi'nman guial gunaladxa-  
man: "Zajpqui reeman da xi'nan respejt." <sup>38</sup> Per  
chi baguiaa ree bén guin xi'nman, rëb loj lasa'  
reeman: "Xin guinan naj xin tia' guidxliuj guin,  
yagüjt reex din gacan du xieen ree." <sup>39</sup> Abi' gunaaz  
reeman laax, babëë reeman laax loj guiniaaa guin  
dxel bagüjt reeman laax.

<sup>40</sup> Dxel gunabdiidx Jesús loj ree bén caneenëman,  
rëbaman:

—Chi yadxin bén naj xguidxliuj laan, ¿xhie nal-  
adxidi güünnëman bén guin ree?

<sup>41</sup> Abi' rëb reeman loj Jesús:

—Ad zayataman gugüjtaman bén guin ree, dxel  
gudëëman guidxliuj guin garol loj ree ben ren, bén  
yayü ni rayalaman chi guidxin dxej yaru' ree uv  
guin.

<sup>42</sup> Dxel rëb Jesús loj reeman:

—¿Id wayolczidi loj xtiidx Dios ya? Lod rëb:  
Guiaj ni gulëëgo'n ree bén rüjn yu.

Laan goc ni mazri been sirv gojcnë yu guin.

Laan naj ni been Dios,

abi' däd radxa du loj ree.

<sup>43</sup> Zeel rnin lojdi, zariicadi loj xguialrniabee  
Dios abi' ben ren ree yayu xluaridi, bén wali ree  
güün zi'c rënman. <sup>44</sup> Abi' chutëëz bén yab guijc  
guiaj guin, zarooxaman, guíaad bal yab guiaj guin  
guijcaman zanidlojman.

<sup>45</sup> Chi biguiejn ree bixhioz rniabee ree bixhioz  
con ree bénfarisew guin ni cayü Jesús zi'c cwent,  
dxel gogbee reeman guial laa reeman cuza'taman.

<sup>46</sup> Abi' guyën reeman niniaaz reeman laaman, per bidxeb reeman bejn ree guial rliladx reeman laaman naj bén rudëéd xtiidx Dios loj ree bejn.

## 22

### *Xcwent guialruxhliaa*

<sup>1</sup> Basnuu Jesús beman zi'c cwent loj reeman rëbaman:

<sup>2</sup>—Xguialrniabee Dios naj zi'c tijb rey bén been lanijro' chi baxhliaa xi'nman. <sup>3</sup> Abi' guxhaalaman mojs ree bignee reeman biooz ree, per biooz guin ree ad guyënt reeman niej reeman. <sup>4</sup> Dxel guxhaalaman mojs ren ree, rëbaman loj reeman: “Gol güjdx loj ree biooz guin ma naj guialraw, ma gunabeen güjt ree da go'nan në ree beren, bero' ree. Ma najcchaaw graczi, gol güjdx loj reeman din gui't reeman loj guialruxhliaa guin.”

<sup>5</sup> Per biooz guin ree ad bidxga't reeman xtiidx rey guin, yu' reeman zë loj xguiniaa, yu' reeman zë xmandad, <sup>6</sup> yu' tëë reeman gunaaz mojs guin ree gudijn reeman laa reeman abi' bagüjt reeman laa reeman. <sup>7</sup> Chi gogbee rey guin zian, däd bidxe'chaman. Guxhaalaman bén naj ree xsuldadaman persi bagüjt reeman bén guin ree baze'c tëë reeman lidx reeman. <sup>8</sup> Dxel rëbaman loj ree xmojsaman: “Graczi ma najcchaaw par loj guialruxhliaa guin, per ree bén gunen ad najt guial ni't reeman. <sup>9</sup> Yan, gol wej lod radxaag lasa' ree nejz, gol güjdx loj ree bén guidxaalojtzidi din gui't reeman loj guialruxhliaa guin.” <sup>10</sup> Abi' brii ree mojs guin wej reeman lunejz guin ree, bato'p reeman gra ree bén bidxaalojtzí reeman, zi'c ree

benmal zi'c ree benza'c, zian gudxa ree biooz lidx  
rey guin.

<sup>11</sup> 'Per chi guyu rey guin din guguaaman biooz  
guin ree, baguiaaman tijb bén ad najcwt xab ni  
rayal gacwaman loj guialruxhliaa guin. <sup>12</sup> Abi'  
rëb rey guin lojman: "Laadx lüj, ¿xhienaaag beenl  
guyul guie abi' ad najcwt xabil ni rayal gacwil loj  
guialruxhliaa?" Dxel achet badxejl niëjb bén guin.  
<sup>13</sup> Zianz rëb rey guin loj ree bén cagui's guialraw:  
"Gol guxhii guia'x në yaax, gol bazaal tëëx xchu  
lod nacay da'l lod goonx gaw tëë layix." <sup>14</sup> Din zien  
ree bejn rdxejl, per ad grataman chu!.

*¿Rayal gax impuest ya?  
(Mr. 12:13-17; Lc. 20:19-26)*

<sup>15</sup> Dxel baza ree bénfarisew yagaj, abi' baya'n  
reeman diidx xhie guiniabdiidx reeman loj Jesús  
din guidoon xhie guiëbaman, zian chile' gutedia'  
reeman laaman. <sup>16</sup> Abi' guxhaal ree xbejn reeman  
con ree xbejn Herodes, rëb reeman lojman:

—Mextr, dunujn rayagbee guial lüj rniecee diidxli,  
abi' walil rulüül guial xhienaaag rën Dios guiban  
bejn, ad ridxga' tëëtil chu naj bejn. Din lojl tiblojzi  
naj bejn. <sup>17</sup> Guna du lojn: ¿Zagdzen ya yadijxan  
impuest loj César o ad zagdxtan ya?

<sup>18</sup> Per gogbee gajc Jesús xgabmal ni cayüjn ree-  
man, abi' rëbaman loj reeman:

—Bén rusquiee, ¿chexc zeel raguiilidi mod  
xhienaaag gutidia'di naj? <sup>19</sup> Gol balüü tijb cintabl  
lon ni rguijxnëdi impuest.

Dxel badëëd reeman tijban lojman, <sup>20</sup> abi' gun-  
abdiidx Jesús loj reeman, rëbaman:

—¿Chu loj ca lojn chu tëë laj ca lojn?

**21** Badxi' reeman laan, rëb reeman:

—Laj César në lojman.

Dxel rëbaman:

—Gol badëed loj César ni naj xieen César, guiáad loj Dios gol badëed ni naj xieen Dios.

**22** Chi biguiejn reeman zian, däd badxaloj reeman, dxel basa'n reeman laaman, zianz zia reeman.

*Gunabdiidx reeman xcwent guial yaban ree bengüt*

(*Mr. 12:18-27; Lc. 20:27-40*)

**23** Dxejzii gajc tio'p choon ree bénsadusew wej reeman bignaj reeman Jesúś, bénsadusew guin ree ad rliladxt reeman guial yaban ree bengüt, zeel rëb reeman loj Jesúś:

**24** —Mextr, Moisejs rëb guial bal guiet tijb xinguaaw abi' achut xi'n reex guyu con lacheelix, bijch xingüt guin guxhliaanë béngunaa bizëjb guin din chu' xi'n reex luar bijchix. **25** Du lojn guyu tijb famil lod gojc reex gajdx bijch. Baxhliaa xin yaloj guin, per güjtix abi' guial ad guyut xi'n, dxel bijch barojpix baxhliaanë béngunaa guin. **26** Per ziangajc guzajc xin barojp guin abi' ziangajc guzajc xin bayon guin, xt bagajdx reex guzajc zian. **27** Chi bara reex güjt dxel güjt béngunaa guin. **28** Yan, chi yaban ree bengüt, loj guigajdx reex, ;chu gac xbéngunaa laaman guial gra reex baxhliaanë laaman?

**29** Badxi' Jesúsan, rëbaman:

—;Ragdxadi guial ad nünbeetidi xtiidx Dios ad nünbee téejadi xhienaag naj xguialrniabeeman!

**30** Din chi yaban ree bengüt, ad zuxhliaatri reeman ad zudëed téeetri xi'n reeman guxhliaa, ma

gac reeman zi'c ree anjl yu' xanyabaa. <sup>31</sup> Abi' xcwent ni yaban ree bengüt, ḡadidi gool ya lod ca guial Dios gajc rēb: <sup>32</sup> “Naj naj xDios Abraham, xDios Isaac nē xDios Jacob”? Abi' Dios ad najtaman xDios ree bengüt, najman xDios ree bén naban.

<sup>33</sup> Chi biguiejn ree bejn zian, dád badxaloj reeman zi'c rulüuman laa reeman.

### *Mandamient mazri zojbloj*

(*Mr. 12:28-34*)

<sup>34</sup> Chi gogbee ree bénfarisew guial achet badxejl niējb ree bénasadusew loj Jesús, dxel baya'n reeman diidx badxaag lasa' reeman. <sup>35</sup> Abi' tijb ree bénfarisew guin, bén naj mextr rajc ley, gunabdiidxaman loj Jesús din guidoon xhie guiēbaman, rēbaman:

<sup>36</sup>—Mextr, ḡcon mandamientan mazri zojbloj loj gra ree mandamient ni zéed loj ley?

<sup>37</sup> Badxi' Jesúsan rēbaman:

—“Guyēn xDadil Dios guidiblagaa guidib guijc guidib ladxil.” <sup>38</sup> Laan naj mandamient mazri zojbloj. <sup>39</sup> Ziangularc naj mandamient rarojp ni rēb: “Guyēn ree bejn zi'c rēn lüj gajc.” <sup>40</sup> Con grop ree mandamient guie, ma cayüjn bejn cumplid gra ley bacaa Moisejs nē ree ni bacaa ree bén badëë xtiidx Dios loj ree bejn.

### *Chu loj xdiaa za Cristo*

(*Mr. 12:35-37; Lc. 20:41-44*)

<sup>41</sup> La'tgaj nadxag lasa' ree bénfarisew guin, gunabdiidx Jesús loj reeman, rēbaman:

<sup>42</sup>—¿Xhie xgab rüjndi por Cristo? ¿Chu loj xdiaa zaman?

Badxi' reeman laan rëb reeman:

—Loj xdiaa Davi.

**43** Dxel rëb Jesús loj reeman:

—Per, ¿chexquiza zeel por xSprijt Dios rëb Davi lojman, Dad? Din Davi rëb:

**44** Dios rëb loj bén rniabee naj:

“Gurej da ladbeen, xt gabecan  
xin rdxe'ch ree lüj guia'l.”

**45** Yan, bal xi'n Davi naj Cristo, ¿chexquiza zeel rëb Davi lojman Dad?

**46** Achutdzi gojc nadxi' xtiidx Jesús, ni'czi tijb diidx. Abi' diizd dxejzii achutdzi bayax niniabdiidx xhienin lojman.

## 23

*Ni rüjn ree mextr rajc ley në ree bénfarisew  
(Mr. 12:38-40; Lc. 11:37-54; 20:45-47)*

**1** Rëb Jesús loj ree bejn në loj ree xbeijnman:

**2** —Mextr rajc ree ley con ree bénfarisew rulüü reeman xhie rën guiëb ni ca loj xley Moisejs. **3** Zeel gol bazoob xtiidx reeman, gol been tëé gra ni na reeman lojdi, per ad güundi zi'c rüjn reeman, din laa reeman ni ren na reeman abi' ni ren rüjn reeman. **4** Rniabee reeman güün bejn ni nawëeg da't, per rniabeezi reeman güün bejn zian, guiáad laa reeman ni'qui ta'n ad rüjnt reeman bejn yudar din güün reeman zi'c rën reeman. **5** Gra ni rüjn reeman, rüjn reeman laan din yadxaloj bejn laa reeman. Ruladx reeman *guixhii* lucwaj reeman në xu'c reeman tijb cint ni ca xtiidx Dios loj, ruladx tëé reeman gacw reeman lajd zagdxe. **6** Ruladx reeman cwe reeman lod rayal rbej ree bén zojbloj,

loj tijb guialraw, abi' ziangajc rüjn reeman lén ree yadoo. <sup>7</sup> Ruladx tēë reeman gugajpdioz bejn laa reeman zagdxe niz lunejz guiëb tēë reeman loj reeman mextr.

<sup>8</sup> 'Per läjt ad sëébladxidi guiniee bejn läjt mextr, din tijbzi naj gradi, tijbzi mextr rajpidi abi' laaman naj Cristo. <sup>9</sup> Ni'qui tijb loj bënguidxliuj, bén ad najt xdadidi, ad guiëbidi dad, din tijbzi xdadidi yu', laaman yu' xanyabaa. <sup>10</sup> Ad güün tēëdi naguiejn yayagbee ree bejn läjt zi'c bén rniabee, din tijbzi bén rniabee yu', laaman naj Cristo. <sup>11</sup> Bén mazri zojbloj lojdi, laaman rayal güün sirv lojdi. <sup>12</sup> Din bén rlies xvalor gajc achet lasajcaman. Guiáad bén rüjn naya, zajs xvaloraman.

<sup>13</sup> 'Probza läjt mextr rajc ley në läjt bénfarisew, bén rusquiee!, ad rtiëjbtidi gagbee ree bejn xhien-aag din gac reeman xbejn Dios, ni'quiza läjt ad rüjntidi naguiejn gaquidi xbejn Dios, abi' rudxoondi gac xbejn Dios bén rën ree gac xbejnman.

<sup>14</sup> 'Probza läjt mextr rajc ley në läjt bénfarisew, bén rusquiee!, din raca'di lidx ree bëngunaa bizëjb, abi' din guiëb bejn guial benza'c läjt dák xchej rbejdx rniabidi Dios. Zeel mazri castiro' yayalidi.

<sup>15</sup> 'Probza läjt mextr rajc ley në läjt bénfarisew, bén rusquiee!, zizadi guidibdoo rguilidi bén gac ree xbejndi, abi' chi ma beendi gan tijbaman al mazri xi'n xindxab rüjndi laaman guial lojdi.

<sup>16</sup> 'Probza läjt, bénlutia'p!, rëbidi: "Achet güünan bal id züjn bejn ni guneman, majsi ma baza'taman yadooro' Jerusalén, per bal guza'taman ni or yu' ree lén yadoo guin, dxel ma rüjn naguiejn güünman ni guneman."

<sup>17</sup> Natontidi, wed natia'p lojdi! ¿Conin mazri lasajc:

Or guin ya o yadoo beenle' or guin? <sup>18</sup> Rëb tëëdi: "Achet güünan bal id züjn bejn ni guneeman majsi ma baza'taman xialtar yadoo guin, per bal guza'taman gon dxiib loj altar guin, rüjn naguiejn güünman ni guneeman." <sup>19</sup> ;Bénlutia'p! ¿Conin mazri lasajc par läjt: Gon guin ya o altar beenle' gon guin? <sup>20</sup> Bén ruza't altar guin ad altar quintzan ruza'taman, négajc gra ni dxiib lojn ruza'taman. <sup>21</sup> Guiáad bén ruza't yadoo guin, ad yadoo quintzan ruza'taman, Diosan ruza'taman din lidxaman naj yadoo guin. <sup>22</sup> Abi' bén ruza't xanyabaa, Diosan ruza'taman në lod zojbaman.

<sup>23</sup> ;Probza läjt mextr rajc ley në läjt bénfarisew, bén rusquiee!, rbëécadi bidxtil, anís nëtëë comin ni rayal gudëëdi loj Dios, abi' ad ruzoobtidi xley Moisejs ni mazri zojbloj, ad rüjntidi zi'c rayal, ad rayat lasa'di, ad za'dxi'ch téeëtidi loj xnejz Dios. Laa reen rayal güündi, per ad cwëéladxidi gudëëdi ni rayal loj Dios. <sup>24</sup> ;Bénlutia'p, rajpidi cudad chitëë guïebidi tijb bizëdlajs, abi' rguiëjbidi tijb camell!

<sup>25</sup> ;Probza läjt mextr rajc ley në läjt bénfarisew, bén rusquiee!, rusiadi xijch ree vajs në xijch ree pliajt naj nadxuudx, guiáad luxdoodi guidxa ni dxuudx, në guialgubaan nëtëë guialrdxe'ch lasa'. <sup>26</sup> ;Bénfarisew lutia'p: Yalojxgaj gol basia, zian guiguien waliquidi nayadi loj Dios!

<sup>27</sup> ;Probza läjt mextr rajc ley në läjt bénfarisew, bén rusquiee!, najdi zi'c baa nayë' culor naquich, guijcan rguien nix da't, per lënan guidxa ree xdxijt bengüt në graloj ree ni dxuudx. <sup>28</sup> Zian najdi, niz loj ree bejn, rulüüdi benza'c, per luxdoodi guidxa guialrusquiee në guialnaladx.

<sup>29</sup> ;Probza läjt mextr rajc ley në läjt bénfarisew, bén rusquiee!, rüjndi xbaa ree bén badëë xtiidx Dios loj ree bejn, abi' rüjnchaawidi xbaa ree bén goc benza'c, <sup>30</sup> dxel rëbidi: "Bal nabajnan xtiamp ree dux bengulalan, ad nët dunujn nagüjt bén badëë ree xtiidx Dios loj ree bejn." <sup>31</sup> Abi' con ni guin ree, rayünbeegajquidi guial loj xdiaa bén bagüjt ree bén badëë xtiidx Dios loj ree bejn zëëdidi. <sup>32</sup> ;Gol balooxza ni guzuloj been xbéngulalidi!

<sup>33</sup> ;Béndol, xi'n xindxab! ¿Xhienaa laadi loj castiro' ni yu' gabijl? <sup>34</sup> Zeel gaxhalan lojdi bén gudëë ree xtiidx Dios, bén rajc ree në ree mextr. Per yu' reeman gugüjtidi, yu' reeman gucaadi loj crüjz, yu' tëë reeman quindi lën ree xyadoodi abi' sunalidi laa reeman guiedx por guiedx din güündi laa reeman xhienin. <sup>35</sup> Zianan zeel guijquidi yab xtol gra ree bén bagüjt bén goc ree benza'c diizd Abel bén guban xnejz loj Dios xt Zacarías xi'n Berequías, bén bagüjt reeman lule' yadooro' Jerusalén. <sup>36</sup> Diidxliczi rnin läjt, xcasti gra ree ni guin yab guijc ree bén riga' loj guidxliuj yan.

### Roon Jesús por Jerusalén

(Lc. 13:34-35)

<sup>37</sup> Rëb tëë Jesús:

—;Bén Jerusalén, bén Jerusalén, rugüjtidi bén rudëë ree xtiidx Dios loj ree bejn abi' rucaaguiajdi bén rxhiaal Dios lojdi! ;Bélcz volt guyënan nuchagan lasa'di, zi'c rüjn tijb guid ruchajg lasa' ree xi'nb lën xhiilib, per ad gutiéjbtidi! <sup>38</sup> Zianan zeel yaya'n ladxidi zi'c tijb guiedx lod achut zojb. <sup>39</sup> Abi' rnin läjt diizd yan ad zuguaatridi naj, xt chi

guidxin dxej guiëbidi: “¡Nüjnle! Dios bén guxhaalamán!”

## 24

*Rëb Jesús guialyaze'nyadooro'*

*(Mr. 13:1-2; Lc. 21:5-6)*

<sup>1</sup> Chi barii Jesús lén yadooro' Jerusalén, ziaman, bibig ree xbejnman lojman balüü reeman gra ree xyu yadoo guin lojman. <sup>2</sup> Abi' rëb Jesús loj reeman:

—Diidxliczi rnin, gra ni cuguaadi yu' dxej ni'qui tijb guiaj guin ad zaya'nt guijc stijban, gran yaze'n.

*Ni gac chi gad guidxliuj nit*

*(Mr. 13:3-23; Lc. 21:7-24; 17:22-24)*

<sup>3</sup> La'tgaj zojb Jesús guijc guia'la Olivos, gubig ree xbejnman lojman, rëb reeman:

—Rayënan nal goc gac zian. ¿Xhie ree sen gac chi ma zidyob guiltil stijb, në chi ma zidyob nit guidxliuj?

<sup>4</sup> Dxel rëb Jesús loj reeman:

—Gol gojp ciudad achu gusquiee läjt. <sup>5</sup> Din zien ree bejn gui't guiëb reeman guial por naj zëed reeman, guiëb tëe reeman: “Naj naj Cristo”, abi' zien bejn gusquiee reeman. <sup>6</sup> Per läjt chi guiguiejndi cayajc wadijl o zëeb diidx guial gac wadijl, ad guidxebidi din zian naj gac. Per ad wadxint dxej nit guidxliuj. <sup>7</sup> Din til nacion con stijb nacion, në bén rajp guialrniabee con stijb bén rajp guialrniabee. Abi' gui't xodoxh në gubijn niz ni niz guie.

<sup>8</sup> Gra ree nine ree gac chi ma suloj guialzi guin.

<sup>9</sup> 'Dxel yayü ree bejn läjt loj ree bén gusagzi läjt, gugütj reeman läjt, abi' gra ree benguidxliuj

guidxe'ch läjt guial najdi da bejnan. <sup>10</sup> Chi gac zian pien ree bejn gusa'n guialrliladx reeman naj, guidxe'ch lasa' reeman abi' yayü lasa' reeman loj ree bén ralen laa reeman. <sup>11</sup> Gui't tëë pien ree bén gusquiee, guiëb reeman guial rudëëd reeman xtiidx Dios, abi' pien bejn gusquiee reeman. <sup>12</sup> Abi' guial däd pien ni mal gac, pien da't bén ad zëntri ree lasa!. <sup>13</sup> Per bén sudxi'ch loj guialrliladxa-man naj, xt dxej chigra guibanman, laaman yayal xanyabaa. <sup>14</sup> Abi' xtiidx Dios ni canin läjt yan guire'chan guidibczi guidxliuj din gagbee gra bej-nan, dxelri nit guidxliuj.

<sup>15</sup> 'Zianan zeel chi guguaadi zojb tijb ni dxuudx, ni ad rüjnt sirv lén yadooro' Jerusalén, zi'c gunee Daniel bén badëë xtiidx Dios loj ree bejn (bén gool gui'ch guie ree, gol bignia'), <sup>16</sup> guial bén zojb ree Judea rayal guxüün reeman che reeman dajn. <sup>17</sup> Guiáad ree bén yë'p guijc yulidx dxejzii, ad yayu lénülidx reeman par tia' xhie xieen reeman. <sup>18</sup> Abi' ree bén za' dajn, ad yayejc reeman chigxii xab reeman. <sup>19</sup> jProbza ree bengunaa nüü xi'n o bén ca' ree xindobëz lén ree dxejzii! <sup>20</sup> Gol gurejdx gunab Dios chitëë gac zian tiamp nayaag o dxej raziiladx ree bejn ya. <sup>21</sup> Din nadxel däd guialziro' chu', zi'c ad wayajctczi diizd guia'xchej chi gad guidxliuj gacchaaw ad yu' tëët dxej gac zian. <sup>22</sup> Abi' bal id Dios gucwëëz guialzi chu' lén ree dxej guin, ni'qui tijb bejn ad zalaat, per gucwëëzaman laa reen por ree bén guleman.

<sup>23</sup> 'Lén ree dxejzii bal chu na lojdi: "Gol baguiaa, laa Cristo za' guie", o "Gol baguiaa laaman za' ni", ad bal chililadxidi. <sup>24</sup> Din zi't pien ree bén gusquiee

na guial laa reeman naj bén guxhaal Dios o na reeman guial laa reeman naj bén rудеёд xtiidx Dios. Abi' züjn reeman milagrree nё graloj ni yadxaloj bejn din gusquiee reeman laa reeman, abi' bal zile'n xt nё ree bén gulej Dios gusquiee reeman. <sup>25</sup> Ma rni xgajn lojdi ni gac. <sup>26</sup> Zeel bal chu na lojdi: "Gol baguiaa laa Cristo za' niz loj yujbidx", ad bal chedi o na reeman lojdi: "Laa Cristo yu' lënu' ni", ad bal chililadxidi. <sup>27</sup> Din zi'c chi rё'p nijs, abi' rulaan bacha' niz lod rliejn gubijdx xt lod rёézan, ziangajc gac dxej gui't Bén guxhaal Dios stijb. <sup>28</sup> Bén rliladx ree naj gui't reeman lon, zi'c chi rado'p ree golbich lod naga'tijb begüt.

### *Gui't Bén guxhaal Dios stijb*

(*Mr. 13:24-37; Lc. 21:25-33; 17:26-30, 34-36*)

<sup>29</sup> Chi ma gudёd ree dxej ni gac ree guialzi guin, guicajy loj gubijdx, ad zusnit bёёw, guiyajb ree bajl xanyabaa abi' gra ree ni yu' xanyabaa guiniib. <sup>30</sup> Dxel guiguien tijb sen xanyabaa guial ma gui't Bén guxhaal Dios. Abi' gra ree бénguidxliuj goon da't chi guguaa reeman Bén guxhaal Dios, rdiiman bacha' зёёдаман loj zaj con xguialrniabee-man. <sup>31</sup> Dxel guixhiaal ree xianjlaman, abi' rejs da't gucwejdx reeman trompejt, din yadxajg lasa' ree bén guleman, bén za' ree gralad guidiblagaa guidxliuj.

<sup>32</sup> Yan, gol baguiaa xhienaa rajc con tijb yag higo. Chi ma naquie'n xidxan, chi ma caydxib ree xbalagan, лёjt ragbee guial ma зёёд tiamp nalaa. <sup>33</sup> Ziangajc chi guguaadi ma cayajc ree ni guin, gagbeedi guial ma zidyob gac zi'c rnin

lëjt. <sup>34</sup> Diidxliczi rnin lëjt guial gra ree ni guin gac chi gad ree bén naban yan guiët. <sup>35</sup> Guidxliuj në xanyabaa zanijt reen, per da diidxan ad zanijttan.

<sup>36</sup> 'Per achut ragbee xhie dxejn në xhie horan gac zian, ni'qui ree anjl yu' xanyabaa, ni'qui Xi'n Dios ad ragbeet. Tijbzi da Dadan Dios ragbee.

<sup>37</sup> 'Zi'c goc gulal chi guban Noé, zian gac chi yaguiaad Bén guxhaal Dios. <sup>38</sup> Din chi gad Dios guixhiaal guiadoxh loj guidxliuj, bejn ree, raw reeman, rë' reeman, ruxhliaa reeman, rudëë tëë xi'n reeman ruxhliaa, xt chi bidxin dxej guyu Noé lën barcwro' ni beenman. <sup>39</sup> Abi' ad bidxgatczi reeman, dxejlczi gol guiadoxh abi' zinë nijs laa reeman, ziangajc gac chi yaguiaad Bén guxhaal Dios. <sup>40</sup> Dxej guin, lod za'tio'p ree xinguaaw dajn, tijbix yaza, stijbix yaya'n. <sup>41</sup> Guiáad lod cayojt tio'p ree bengunaa, tijbaman yaza, stijbaman yaya'n.

<sup>42</sup> 'Zeel gol guzujsin din ad ragbeetidi xhie dxej yaguiaad xDadidi. <sup>43</sup> Gol been xgab, bal tijb bejn ragbee xhie guxhin xhie tëë horan chu' xingubaan lidxaman cwanx, zabejnaaman abi' ad zatiëjtaman chu' xingubaan guin lidxaman. <sup>44</sup> Zianan zeel gol guzujsin, din ad ragbeetidi dx-ejlczi yaguiaad Bén guxhaal Dios.

*Mojs za'c në mojs guijdx  
(Lc. 12:41-48)*

<sup>45</sup> '¿Chu lëjt naj zi'c tijb mojs rusa'n xpatronx lidxaman din gulenx gra ree mojs, gudeëë tëëx ni gaw reeman chi gal hor? <sup>46</sup> Xiquilbaa mojs cayüjn dxiiñ zi'c rayal chi yadxin xpatronx. <sup>47</sup> Din diidxliczi rnin lëjt, patron guin zusa'n gra xieenman

loj mojs guin. <sup>48</sup> Per bal naj mojs guin mojs dxu-  
udx, naladxix: “Zaglaari da patronan.” <sup>49</sup> Zianz  
suloj gusagzix los demazri ree mojs guin, suloj  
gawix, guië'në tëëx xingu' ree. <sup>50</sup> Abi' yadxin xpa-  
tronx tijb dxej ni ad ragbeetix ad rbëz tëëtix laa-  
man. <sup>51</sup> Dxel däd castiro' gudëëd patron guin laax,  
guixhiaal tëëman laax lod rayal ree bén rusquiee,  
lod goonx gaw tëë layix.

## 25

### *Xcwent chii biinxdiüb*

<sup>1</sup> Basnuu Jesús rëbaman:

—Loj xgualniabee Dios gac zi'c guzac ree chii  
biinxdiüb we loj tijb guialruxhliaa cwa' tijbgaj  
xgуй reem bilëz reem xin cuxhliaa guin. <sup>2</sup> Gaay  
reem been xgab xhie güün reem, per za gaay reem  
ad beent xgab. <sup>3</sup> Biin ad beent ree xgab guin  
binë xgуй reem per ad binët reem mazri sejt ni  
che'cnë ree guij guin. <sup>4</sup> Guiáad ree biin been xgab  
guin xhie güün reem, binë reem za tib lumejtgaj  
sejt con xgуй reem. <sup>5</sup> Abi' guial goglaa badxin  
xinruxhliaa guin, bi't bacaal loj gra reem, abi'  
goodyëjs reem. <sup>6</sup> Cost garol guiaal, biguien cha'  
tijb bejn rëbaman: “¡Laa xinruxhliaa guin ma ziaad,  
gol tagchaaglojx!” <sup>7</sup> Dxel bixche gra ree biinxdiüb  
guin, abi' beenchaaw xgуй reem. <sup>8</sup> Abi' gaay ree  
biin ad beent xgab guin xhie güün reem, rëb reem  
loj za gaay biin been xgab guin: “Gol baneesii  
tibda'n xsejtid, din dux guijn ma cayü' reen.”  
<sup>9</sup> Per badxi' reemin rëb reem: “Yajqui, din dool ad  
zadaantan par läjt ni'qui par dunujn. Zagdxeli gol  
wëj lod rdo'n din siidan par läjt gajc.” <sup>10</sup> Abi' la'tgaj

zë reem zisii reem sejt, bidxin xinruxhliaa guin, abi' za gaay ree biin been xgab guin guyunë reem laax loj guialruxhliaa guin dxel bida'cw ro' port. **11** Dxel chi badxin za gaay biin bisii ree sejt guin, rëb reem: “¡Dad, dad, guxhal din yadxu'n!” **12** Per badxi'xan rëbix: “Diidxliczi rnin, ad nünbeetan läjt.”

**13** Dxel basnuu Jesús rëbaman:

—Zeel gol guzusin din ad ragbeetidi goc yaguaad Bén guxhaal Dios.

### *Xcwent bén badëëd milia*

**14** Dxel rëb tëe Jesús:

—Xguialrniabee Dios naj zi'c tijb bén ma grii cheman zift, abi' gurejdx ree xmojsaman, basa'n xmiliaman loj reeman. **15** ’Loj tijbaman badëëman gaay mil cintabl, loj zatijbaman badëëman zatio'p milan, guiáad loj zatijbaman badëëman za timilan. Loj tijbgaj reeman badëëdaman ni naladxaman zajc güünnë reeman dxiin, dxel briitaman zëman zift. **16** Abi' mojs cwa' gaay mil cintabl guin beennëman laan dxiin abi' beenman gan za ziant gajcan. **17** Ziangajc been mojs cwa' tio'p milan, beenman gan za tio'p mil gajcan. **18** Per mojs cwa' timil cintabl guin bitëënman luyuj persi baquie'chaman cintabl guin ni badëëd xpatronman.

**19** ’Gojc xchej da't dxel badxin patron guin abi' babëëman cwent con la reeman. **20** Yaloj bidxin mojs cwa' gaay mil cintabl guin abi' bayüman zagaay milan, rëbaman: “Dad, lüj banee gaay milan lon, yan, laa za gaay milan guie ni benan gan.” **21** Dxel rëb patron guin lojman: “Zagdzen, mojsza'c, zagdxe beenl, guial zagdxe beenl con

tibda'n ni banen, yan, gunen mazri guial loj ni banen. Guyu, babaa con naj.” <sup>22</sup> Zianz bidxin mojs cwa' zatio'p mil cintabl guin rëbaman: “Dad, lüj banee tio'p milan lon, yan, laa zatio'p milan guie ni benan gan.” <sup>23</sup> Dxel rëb patron guin lojman: “Zagdxen, mojsza'c, zagdxe beenl, guial zagdxe beenl con tibda'n ni banen, yan, gunen mazri guial loj ni banen. Guyu, babaa con naj.”

<sup>24</sup> ’Per chi bidxin mojs cwa' timil cintabl guin, rëb loj xpatronman: “Dad, naj ragbee guial ad rayatil bejn, rabëël guialnaza'c lod ad rgu'til bin, rato'p tëél guialnaza'c lod ad rtie'ctil bin. <sup>25</sup> Zeel bidxeban abi' biquiechan xmiliañ lën liuj, yan, laa xmiliañ guie.” <sup>26</sup> Badxi' patron guinan, rëbaman: “Mojs mal, mojs ploj, bal ragbeel rabëñ guialnaza'c lod ad rgu'tan bin, ratop tëén guialnaza'c lod ad rtiechtan bin. <sup>27</sup> Adil nilu' da milian lën bancw, din chi naguialan naca'nan con xi'nan ni beenan gan.” <sup>28</sup> Dxel rëb patron guin loj ree bén za' yagaj: “Gol biquied timil cintabl guin lojx, gol badëëdan loj xin rajp chii milan. <sup>29</sup> Din bén rajp zaca'man mazri, abi' gapaman zro' da't, per bén rajp ta'nzi, xt ni rajpaman chiquied lojman. <sup>30</sup> Abi' mojs ad rünjt sirv guin gol bazaalix xchuni lod nacay, lod goonx, lod gaw tëé layix.”

### *Xguialguxtis Jesús*

<sup>31</sup> ’Chi gui't Bén guxhaal Dios, gui'taman con xguialniabeeman, në con gra ree xianjlaman din cweman lod nabeeman. <sup>32</sup> Dxel gra ree bënguidxliuj yado'p lojman, abi' cweman laa reeman zi'c rüjn tijb bén rajp xiil chi rabëëcaman xiil

ree loj ree dxib. <sup>33</sup> Abi' guzujman bén naj ree xbejnman xladbeeman, guiáad ree bén ad najt xbejnman guzujman xladruvejsaman. <sup>34</sup> Dxel guiëb rey guin loj ree bén za' xladbeeman: "Gol guda bén ma nünle' da Dadan. Gol guyu loj guialrniabee najcchaaw par lëjt, diizd chi go'tchaaw guidxliuj. <sup>35</sup> Din chi gulaanan, baneedi ni gudawan, chi we'can nijs, baneedi ni gu'n, chi bizaan zi'c tijb benzit, baneedi lod bay'a'nan. <sup>36</sup> Chi byaadx da xaban, lëjt banee ni go'tan, chi gogxuun, bidgatixlojdi naj, abi' chi guyu'n ladxguiib, bidganajdi naj." <sup>37</sup> Dxel guiëb ree bén za' ladbee guin: "Dad, ¿goc baguaan lüj rliaanl, abi' baneen ni gudawil?, ¿o goc baguaan lüj we'quil nijs, abi' baneen nijs gu'l? <sup>38</sup> ¿Goc baguaan lüj zizal zi'c tijb benzit, abi' baneen lod bay'a'nl, o goc biyaadx xabil, abi' baneen ni gotil? <sup>39</sup> ¿Abi' goc baguaan lüj ragxuul, o guyul ladxguiib, abi' budganajn lüj?" <sup>40</sup> Dxel guiëb rey guin loj reeman: "Diidxliczi rnin lojdi, gra yudar beendi da bejn reen majsi ad najt reeman bén lasajc, najn beendi yudar."

<sup>41</sup> 'Dxel guiëbaman loj ree bén za' xladruvejsaman: "Gol biquied lon, benmal gol chej loj bajl ni ad yu't dxej yayü' ni ma naj par xindxbab nö ree xbejnx. <sup>42</sup> Din chi gulaanan, ad baneetidi ni niawan, chi we'can nijs, ad baneetidi ni nië'n. <sup>43</sup> Chi bizaan zi'c benzit, ad baneetidi lod naya'nan, chi biyaadx da xaban, ad baneetidi ni nia'cwan. Abi' chi gogxuun nö chi guyu'n ladxguiib, ad bidganajtidi naj." <sup>44</sup> Dxel guiëb reeman lojman: "Dad, ¿goc baguaan lüj rliaanl o re'quil nijs, o zizal zi'c tijb benzit, o goc baguaan lüj ryaadx xabil, o ragxuul,

o yu'l ladxguiib, abi' ad bayidxga'tan lüj?" <sup>45</sup> Abi' yadxi'man laan guiëbaman: "Diiidxliczi rnin lëjt, gra ni ad beentidi din nüjndi yudar da bejn reen majsi ad najt reeman bén lasajc, najn ad beentidi yudar." <sup>46</sup> Laa reeman yayal loj casti tiblayaa, guíaad ree bén been zi'c rayal, laa reeman rayal guialnaban tiblayaa con Dios.

## 26

*Bay'a'n reeman diidx xhienaaag guiniaaz reeman Jesús*

(*Mr. 14:1-2; Lc. 22:1-2; Jn. 11:45-53*)

<sup>1</sup> Chi gulox gunee Jesús diidx guin ree, dxel rëb loj ree xbejnman:

<sup>2</sup> —Lëjt ragbee guial ryaadx zatio'p dxejzi guial guidxin lanij pascw, abi' Bén guxhaal Dios yayü ree bejn laaman din tiaman loj crüjz.

<sup>3</sup> Lën ree dxejzii badxaag lasa' ree bixhioz rnabee ree bixhioz, con xguxtis ree bén Israel, lidx Caifás quijb bixhioz zojbloj. <sup>4</sup> Ni baya'n reeman diidx xhienaaag gusquiee reeman Jesús din guiniaaz reeman laaman, abi' gugüjt reeman laaman. <sup>5</sup> Per rëb reeman:

—Ad zaguieent ree zian loj lanij guin chitëë gac naquie' luguiedx guin.

*Ruroob tijb béngunaa perfum guijc Jesús*

(*Mr. 14:3-9; Jn. 12:1-8*)

<sup>6</sup> Chi za' Jesús luguiedx Betania lidx Simón, bén rninee reeman Leproso, <sup>7</sup> bidixin tijb béngunaa ca'man tijb lumejt guidxan perfum ni lasajc wayëjx. Abi' la'tgaj zojb Jesús xan mex, baroobaman perfum guin guijc Jesús. <sup>8</sup> Chi baguiaa ree

xbejn Jesús ni been békunaa guin, dád bidxe'ch reeman, abi' rëb reeman:

—¿Chexc zeel bixie' perfum guin? <sup>9</sup> Zile' nido'n zro' da't din nüjnan yudar bénprob ree.

<sup>10</sup> Chi biguiejn Jesús ni canee reeman, rëbaman loj reeman:

—¿Chexc zeel rdxe'chidi békunaa guin? Zagdxe naj ni beenman naj. <sup>11</sup> Din bénprob guin ree zianczi za'në reeman lëjt, sa'n naj ad ziantczi gazunë'n lëjt. <sup>12</sup> Abi' ni baroobaman perfum guin guican, rën guiëban guial ma beenchaaw xgajman naj par chi guiguie'chan. <sup>13</sup> Diidxliczi rnin, bantëéz guin guire'ch xtiidxza'c Dios loj guidxliuj, zü ree bejn gra ni been békunaa guin por naj, din gusaaladx reeman laaman.

### *Rayü Judas Jesús*

(*Mr. 14:10-11; Lc. 22:3-6*)

<sup>14</sup> Loj guidxiptio'p ree xbejn Jesús, bén la Judas Iscariote, bigneenëman bixhioz rniabee ree bixhioz, <sup>15</sup> rëbaman loj reeman:

—¿Plac guneedi din yanen Jesús lojdi?

Abi' badëéd reeman gajlbichii milia plajt lojman. <sup>16</sup> Diizd dxejzii guzulojman raguiilaman mod xhienaa yayüman Jesús.

### *Gudawnë ree xbejn Jesús xche*

(*Mr. 14:12-25; Lc. 22:7-23; Jn. 13 :21-30; 1Co.11 :23-26*)

<sup>17</sup> Dxej ni guzuloj lanij ni raw ree bejn guiadxtil ni ad yu't levadur, gubig ree xbejn Jesús lojman, rëb reeman:

—¿Ban guin rënl yaguieenchaawan ni yadaaw ree guxhin lanij pascw?

**18** Badxi' Jesúsan rëbaman:

—Gol chej Jerusalén lidx bén guin, gol biguiedx lojman: “Na Mextr: Ma bidxin xihoraman abi' rënman tédaman pascw lidxil con ree xbejnman.”

**19** Dxel been ree xbejnman zi'c rëbaman, been tée reeman ni gaw reeman guxhin lanij pascw.

**20** Chi gure guiaal, zobj Jesúsan mex con guidx-iptio'p ree xbejnman. **21** Abi' la'tgaj cayaw reeman, rëbaman loj reeman:

—Diidxliczi rnin, tijb gajc läjt yayü naj.

**22** Abi' däd guyunaya reeman, zianz guzuloj rni-abdiidx tijbgaj reeman loj Jesúsan, rëb reeman:

—¿Najn ya, Dad?

**23** Badxi' Jesúsan, rëbaman:

—Bén cayaw loj pliajt ni cayaw gajcan, laaman yayü naj. **24** Walican, Bén guxhaal Dios naj guial sacaman zi'c rëb loj xtiidx Dios. Per iprobza bén yayü laaman!, zagdxeli naj par laaman ad niutaman loj guidxliuj.

**25** Dxel Judas bén yayü Jesúsan, gunabdiidxaman rëbaman:

—Mextr, ¿wen najn ya?

Badxi' Jesúsan, rëbaman:

—Lüjn.

**26** La'tgaj cayaw reeman, cwa' Jesúsan guiadxtil, badëëdaman quixtëe loj Dios. Dxel gula'man guiadxtil guin gudi'saman laan loj ree xbejnman, rëbgajman:

—Gol gudaw guiadxtil guie, laan naj da cuerpan.

**27** Dxel cwa'man tib cojp vin, chi gulox badëëdaman quixtëe loj Dios, badëëdaman cojp guin loj reeman, rëbgajman:

—Gol gu' gradi loj cojp guie. <sup>28</sup> Din laan naj da rejnan ni gaxhie'n chi guiëtan por zien ree benguidxliuj. Din por da guialgüjan guixal tijb nejz cüb xhiennaag gap ree bejn perdon loj Dios por xtol reeman. <sup>29</sup> Abi' diidxliczi rrin lëjt ad yu'tri dxej guië'n vin rajcchaawnë uv, xt chi guidxin dxej guië'në'n lëjt vin cüb lod rniabee da Dadan.

*Rëb Jesús guial guiëb Bëd ad nünbeetaman laaman*  
*(Mr. 14:26-31; Lc. 22:31-34; Jn. 13:36-38)*

<sup>30</sup> Chi gulox biil reeman tijb cant par Dios, dxel zë reeman guijc guia' Olivos. <sup>31</sup> Abi' rëb Jesús loj reeman:

—Gradi zabëëladx naj yan guxhin, zi'c ca loj xtiidx Dios lod rëb: “Gugüjtan bén rajp ree xiil, dxel guire'ch ree xiil guin.” <sup>32</sup> Per chi yabanan, yaloj naj ganeed ga gajn Galilea dxelri gui'tidi.

<sup>33</sup> Dxel rëb Bëd lojman:

—Majsi gra reeman cwëëladx lüj per naj ad yu't dxej gabëladxan lüj.

<sup>34</sup> Per rëb Jesús lojman:

—Diidxliczi rrin lojl, yan guxhin gajc chi gad guïd cwidxa', mal rëbil choon volt guial ad nünbeetil naj.

<sup>35</sup> Abi' rëb Bëd lojman:

—Majsi guiëtnë'n lüj, per ad yu't dxej guiën guial ad nünbeetan lüj.

Abi' gra ree xbejn Jesús ziangajc rëb reeman.

*Gurejdx gunab Jesús Dios lod la Getsemani*  
*(Mr. 14:32-42; Lc. 22:39-46)*

<sup>36</sup> Chi bidxin Jesús con ree xbejnman tijb luar la Getsemani, rëbamana loj reeman:

—Gol gurejsii guie, la'tgaj gan ni din gabedx ganaaban Dios.

<sup>37</sup> Dxel zinëman Bëd con grop ree xi'n Zebedeo, zianz guzuloj cayunayaman abi' ad nixtri yu' luxdooman. <sup>38</sup> Zianz rëbaman loj reeman:

—Dád yu'naya luxdoon, rulüü ma gugüjt guialyu'naya guin naj. Gol baya'n guie ad gaayëjsidi.

<sup>39</sup> Dxel zë Jesùs mazri delant abi' gurerulojman gurejdx gunabaman Dios, rëbaman:

—Dad, bal zile' yabëël naj loj guialzi ni gadëëdan, per ad gac zi'c rënan, gac zi'c rënl.

<sup>40</sup> Dxel baguajman lod za' ree xbejnman, abi' baguiaaman naga'yëjs reeman, zianz rëbaman loj Bëd:

—¿Wen ni'qui tib hor ad bile't natie'ch xbacaalidi ya, din sunëdi naj? <sup>41</sup> Gol batie'ch xbacaalidi gol gurejdx gunab tëë Dios, chitëë güün xindxab läjt gan, din rënquidi güündi zi'c rayal, per xcuerpidi ad rtiëjbtan.

<sup>42</sup> Ni barojp volt wejman gurejdx gunabaman Dios, rëbaman:

—Dad, bal id zile' tëd guialzi ni naj gadëëdan, bal rüjn naguiejn gadëëdanan gacri zi'c rënl.

<sup>43</sup> Chi badxinman lod za' ree xbejnman stijb, laa reeman naayëjs guial däd guidxa bacaal loj reeman. <sup>44</sup> Dxel basa'nman laa reeman stijb, zëman, bayon volt cabejdx canabaman Dios con diidx guin gajc ree. <sup>45</sup> Chi badxinman lod za' ree xbejnman, rëbaman loj reeman:

—¿Sta naga'yëjsidi ya, cayziiladx tëëdi? Guiáad Bén guxhaal Dios ma bidxin hor yayü reeman laaman loj ree bëndol. <sup>46</sup> Gol bixche, yo' ree, gol baguiaa laa bén yayü naj ma zëed gajxh.

*Gunaaz reeman Jesús**(Mr. 14:43-50; Lc. 22:47-53; Jn. 18 :2-11)*

<sup>47</sup> Sta caneenë Jesús bén naj ree xbejnman, chi bidxin Judas bén naj gajc tijb xbejn Jesús. Bidx-innëman zien ree bejn, ca' reeman espad në yag. Guxhaal ree bixhioz rnocabee ree bixhioz con ree xguxtis ree bén Israel laa reeman. <sup>48</sup> Abi' Judas bén bayü laaman mal rëbxgajman loj ree bén guin: "Bén gawan xid xhajg, laaman raguiilidi, gol gunaazaman." <sup>49</sup> Chi bidxin Judas bibigaman loj Jesús, dxel rëbaman:

—;Xchan, Mextr!

Laa gudaw gajcaman xid xhajgaman.

<sup>50</sup> Abi' rëb Jesús lojman:

—Judas, been ni zidguieenl.

Dxel gubig ree bén guin, gunaaz reeman Jesús persi zinë reeman laaman.

<sup>51</sup> Per tijb ree bén za'në Jesús yagaj, gulëë xies-padaman dxel gutü'man guidiajg xmojs quijb bixhioz zojbloj. <sup>52</sup> Dxel rëb Jesús lojman:

—Bagu'chaaw xiespadil xluaran. Din bén rdil con espad, con espad rëjtaman. <sup>53</sup> ¿Wen, id ragbeel ya guial zajc gabedx ganaab da Dadan, abi' laa guixhiaal gajcaman por mil ree xianjlaman din gagnë reeman naj? <sup>54</sup> Per ¿xoza gac cumplid zi'c ca loj xtiidx Dios ni rëb guial rüjn naguiejn gac ree ni cayajc?

<sup>55</sup> Loj hor guin gajc rëb Jesús loj ree benzien guin:

—¿Chexc zeel zëëdidi con espad në con yag din guiniaazidi naj zi'c tijb xingubaan? Guixie guixie guzunë'n lëjt lën yadooro' Jerusalén balün lëjt xtiidx Dios, abi' ad gunaaztidi naj. <sup>56</sup> Per gra ree

ni guie cayajc din gac cumplid ni bacaa ree bén  
badëe xtiidx Dios loj ree bejn.

Loj hor guin gajc baxüün ree xbejn Jesúś,  
guro'nladx reeman laaman.

*Za' Jesúś loj ree guxtis Israel*

(*Mr. 14:53-65; Lc. 22:54-55, 63-71; Jn.18 :12-14, 19-24*)

<sup>57</sup> Bén gunaaz ree Jesúś binë reeman laaman lidx Caifás, quijb bixhioz zojbloj, yagaj badxaag lasa' ree mextr rajc ley con ree xguxtis ree bén Israel. <sup>58</sup> Abi! Bëd zift zift nalaman Jesúś, xt lule' lidx bixhioz guin. Dxel guyuman abi' gurejnëman bén rajp ree lidx bixhioz guin, din guguaaman xhie güünnë ree bén guin Jesúś.

<sup>59</sup> Guiáad ree bixhioz rniabee ree bixhioz con gra ree guxtis guin raguil reeman xhie gusquiee reeman din gutedia' reeman Jesúś din nabee reeman guiétaman. <sup>60</sup> Per ad radxejlt xhienaaag gutedia' reeman laaman majsi zien ree bén basquiee. Dxel bibig zatio'p reeman, <sup>61</sup> rëb reeman:

—Bén guie rëb: “Zile' yase'nan xyadoo Dios abi'  
loj choon dxejzi yayünanan.”

<sup>62</sup> Dxel guzuli quijb bixhioz zojbloj guin,  
rëbaman loj Jesúś:

—¿Nid zadxi'lán ya? ¿Waliqui ni canee ree bén  
guin contr lüj ya?

<sup>63</sup> Per achet rëb Jesúś. Dxel rëb bixhioz guin  
lojman:

—Por Dios bén naban, rniabeen lüj guna diidxli.  
Guna bal lüjn naj Cristo, Xi'n Dios.

<sup>64</sup> Badxi' Jesúsan rëbaman:

—Wалиquil. Rni тීën лějt, zuguaadi Bén guxhaal Dios zojbaman xladbee Dios bén rajp guialrniabee abi' zuguaia тීёди gui'taman loj zaj xanyabaa.

<sup>65</sup> Chi biguiejn bixhioz guin zian, gudixya' xabaman, rëbaman:

—Diosan caneeguijdx bén guin. ¿Xhie mazri rüjn naguiejn yadiil ree testiw? Lëjt gajc ma biguiejn guial rniecegijdxaman Dios. <sup>66</sup> Yan, ¿xhie nadi?

Badxi' ree bén guinan rëb reeman:

—Rayal guiëtix.

<sup>67</sup> Dxel bacojp xhiejn reeman lojman, gudijn reeman laaman, yu' тීёё reeman wëëz ro'man, <sup>68</sup> rëb reeman lojman:

—Bal lüjn naj Cristo, gunneya' chu gudin lüj.

*Rëb Bëd ad nünbeetaman Jesús*

(*Mr. 14:66-72; Lc. 22:56-62; Jn. 18 :15-18, 25-27*)

<sup>69</sup> La'tgaj zojb Bëd lule! lidx bixhioz guin, gubig tijb biin rüjn dxiin yagaj, rëbim lojman:

—Në lüj nal Jesús, bén Galilea.

<sup>70</sup> Per Bëd gurexuman, rëbaman niz loj gra reeman:

—Ad ragbeetan xhienin rnieel.

<sup>71</sup> Chi zëman niz ro' port baguiaa stijb biin rüjn dxiin yagaj laaman, abi' rëbim loj ree bén riga' yagaj:

—Në bén guin nal Jesús bén Nazaret.

<sup>72</sup> Per Bëd gurexuman stijb, xt baza'taman Dios, rëbaman:

—Ad nünbeetan bén guin.

<sup>73</sup> Dxel ad gojct xchej, gubig ree bén riga' yagaj loj Bëd, rëb reeman lojman:

—Laa rguien gajc nē lüj naj xbejn reeman, din zi'cgajc rniee reeman rnieel.

<sup>74</sup> Per Béd baza'taman Dios, rëbaman loj reeman:

—Dios gudëed naj casti bal rusquieen, per ad nünbeetan bén guin.

Hor guin gajc guridxa' tijb guíd. <sup>75</sup> Abi' basaal-adxaman guial rëb Jesú斯 lojman: "Chi gad guíd cwidxa', mal rëbil choon volt ad nünbeetil naj." Dxel barii Béd yagaj abi' dát naya biinman.

## 27

### *Binë reeman Jesú斯 loj Pilato*

(*Mr. 15:1; Lc. 23:1-2; Jn. 18:28-32*)

<sup>1</sup> Chi bani luyuj, gra ree bixhioz rniabee ree bixhioz con ree guxtis Israel bayá'n reeman diidx xhienaa güün reeman din guiët Jesú斯. <sup>2</sup> Dxel guxhii reeman laaman abi' binë reeman laaman loj gobernador Pilato.

### *Güjt Judas*

<sup>3</sup> Dxel Judas, bén bayü Jesú斯, chi baguiaaman guial ma naj guiët Jesú斯, guyunayaman, abi' bayüman gajlbichii milia plajt guin loj ree bixhioz rniabee con loj ree guxtis Israel, <sup>4</sup> rëbaman loj reeman:

—Ma benan dol guial banen tijb bén achet dol rajp.

Badxi' reeman laan rëb reeman:

—Xhieczi yaguieenan, jlüj gunaj!

<sup>5</sup> Abi' bazaal Judas milia guin lén yadooro' Jerusalén zianz bariiman wejman bigxhii yéjnman.

**6** Dxel bato'p ree bixhioz rniabee guin milia guin, abi' rëb reeman:

—Ad rayalt yadxe' ree milia guin lën lod ru gon, din con laan bio' bén guiët.

**7** Dxel be reeman diidx, abi' con milia guin guzii reeman xguidxliuj bén rüjn trast bajn ree, din gacan lod guiguie'ch ree benzit. **8** Zeel xt yan la guidxliuj guin Yuj Rejn. **9** Zian gojc cumplid ni gunee Jeremías, bén badëe xtiidx Dios loj ree bejn, chi rëbaman: “Cwa' reeman gajlbichii milia plajt, prejs ni rëb ree bén Israel lasajcaman, **10** abi' con milia guin guzii reeman xguidxliuj bén rüjn trast bajn ree, zi'c gunabee Dios naj.”

### *Rniabdiidx Pilato loj Jesús*

(*Mr. 15:2-5; Lc. 23:3-5; Jn. 18:33-38*)

**11** Dxel badxig reeman Jesús loj gobernador Pilato, abi' gunabdiidxaman loj Jesús, rëbaman:

—¿Lüjn naj xrey ree bén Israel ya?

Badxi' Jesúsan, rëbaman:

—Najcan.

**12** Abi' chi cutedia' ree bixhioz rniabee ree bixhioz con ree guxtis Israel laaman, achetczi radxi'man. **13** Dxel rëb Pilato lojman:

—¿Nid riguejnl gra ni canee reeman contr lüj ya?

**14** Per Jesús ni'qui tijb diidx ad badxi'taman, zeel dák badxa loj gobernador guin.

### *Gunabee reeman guiët Jesús*

(*Mr. 15:6-20; Lc. 23:13-25; Jn. 18:38-19:16*)

**15** Lën ree dxej lanij, ruslaa gobernador Pilato tijb bén yu' ladxguiib bén guiëb ree bénguiedx guin laa, zi'c naj xcostumbr reeman. **16** Lën ree dxejzii

yu' Barrabás ladxguiib, tijb bén nünbee ree bejn niz ni niz guie. <sup>17</sup> Abi' chi badxaag lasa' gra ree bejn, gunabdiidx Pilato loj reeman, rëbaman:

—¿Chu rëndi guslaan? ¿Barrabás ya, o Jesús, bén rëb ree bejn naj Cristo?

<sup>18</sup> Rëbaman zian guial gogbeeman ganaxzi guial-nadëdlojn zeel bayü reeman Jesús.

<sup>19</sup> La'tgaj zojb Pilato lod rüjnman guialguxtis, bidxin xruson lacheelaman, rëbaman lojman: "Adxhie güünnél bén guin achet dol rajpaman, din däd nadxuudx gune'xchalan laaman nuche."

<sup>20</sup> Per bixhioz rniabee ree bixhioz con ree guxtis Israel, badxe' reeman diidx gra ree bejn persi gunab reeman guslaaman Barrabás, guiáad Jesús guïétaman. <sup>21</sup> Gunabdiidx Pilato loj reeman stijb, rëbaman:

—¿Chu loj grop reeman rëndi guslaan?

Badxi' reeman laan rëb reeman:

—Barrabás.

<sup>22</sup> Abi' rëb Pilato loj reeman:

—¿Xhieza günné'n Jesús, bén rëb ree bejn naj Cristo?

Badxi' gra reeman laan rëb reeman:

—¡Bacaaman loj crüjz!

<sup>23</sup> Abi' rëb Pilato loj reeman:

—¿Xhieza ni mal beenman?

Per laa reeman mazri rejs rbixdiaj reeman, rëb reeman:

—¡Bacaaman loj crüjz!

<sup>24</sup> Chi baguiaa Pilato guial achet rile' güünman, al mazri naquie' cayüjn ree bén guin, dxel cwa'man nijs abi' banaaman delant loj gra reeman, rëbaman:

—Achet dol ra'pan guial guiët bén guie, xcwendidan.

<sup>25</sup> Badxi' gra ree bén guinan rëb reeman:

—¡Du guijcan, në guijc du xi'nan cwiban guial guiëtaman!

<sup>26</sup> Dxel baslaa Pilato Barrabás, zianz gunabee-man gudijn reeman Jesús abi' bayüman laaman din gucaa reeman laaman loj crüjz.

<sup>27</sup> Zianz xsuldad ree gobernador guin binë reeman Jesús lën palas lod bado'p gra ree suldad, gadëd lod za'man. <sup>28</sup> Dxel gulëe reeman xabaman bascajcw reeman laaman tijb lajd xnia. <sup>29</sup> Abi' beenchaaw reeman tijb coron guiejch badxe' reeman laan guijcaman, zianz baga's reeman tijb yag ladxaaman ladbee. Dxel bazuxib reeman lojman, ruze' reeman laaman, rëb reeman:

—¡Guibanri xrey ree bén Israel!

<sup>30</sup> Abi' rucojp xhiejn reeman lojman, laagajc tée yag ni ca'man rugaz reeman guijcaman. <sup>31</sup> Chi gu-lox baze' reeman laaman, dxel babëe reeman lajd xnia guin ladaman, bascajcw reeman xabaman, zianz zinë reeman laaman din gucaa reeman laaman loj crüjz.

### *Cwa Jesús loj crüjz*

(*Mr. 15:21-32; Lc. 23:26-43; Jn. 19:17-27*)

<sup>32</sup> Chi zinë reeman Jesús, badxaagloj reeman tijb bén Cirene, laman Simón, abi' been reeman laaman naguiejn byaaman xcrüjz Jesús.

<sup>33</sup> Chi bidxin reeman tijb luar la Gólgota (rën guiejban Xluar Calaver), <sup>34</sup> ni badëed reeman vin, no'chan nijs nala da't guie' Jesús. Per chi beenman laan prueb, ad cwëjbtaman nië'man laan.

<sup>35</sup> Chi gulox bacaa reeman laaman loj crüjz, dxel gudxijt reeman suert guijc xabaman din yala' reeman laan. <sup>36</sup> Dxel gurej reeman yagaj din gap reeman laaman. <sup>37</sup> Abi' guijc crüjz guin bacaa reeman lejtr ni rëb, chexc zeel cwaman loj crüjz. Rëb lëjtr guin: “BEN GUIE NAJ JESÚS XREY REE BEN ISRAEL.”

<sup>38</sup> Në tio'p xin gubaan bacaa reeman loj crüjz, tibix xladbee Jesús stibix xladruvejsaman. <sup>39</sup> Abi' ree bén rdëd, rniecegijdx reeman Jesús, runij guijc reeman, <sup>40</sup> rëbgaj reeman:

—Lüj rëb, nuse'nl yadooro' abi' loj choon dxejzi nayüjnlan, baslaa lüj gajc. Bal walil najl Xi'n Dios baguiajt loj crüjz guin.

<sup>41</sup> Ziangajc ree bixhioz rniabee ree bixhioz në ree mextr rajc ley con ree guxtis Israel, ruze' reeman Jesús, rëb reeman:

<sup>42</sup> —Baslaax ben ren ree, abi' ad rajct ruslaa laagajquix. Bal wali najx xrey ree bén Israel, yaguajtix loj crüjz guin, din yaliladx reex. <sup>43</sup> Rililadxit Dios. ¡Yan, guslaaza Dios laax, bal wali rënman laax, din rëbix: “Xi'n Dios najx”!

<sup>44</sup> Abi' nëgajc ree xingubaan ca cwë'man ruze' laaman.

### *Güjt Jesús*

(*Mr. 15:33-41; Lc. 23:44-49; Jn. 19 :28-30*)

<sup>45</sup> Dxel diizd garol dxej bicajy loj guidib guidxliuj, xt raca choon wadxe. <sup>46</sup> Loj horzii gurixdiajman rejs da't, rëbaman:

—Elí, Elí, ¿lama sabactani? —rën guiëban: Dios, Dios, ¿chexc zeel gulëéladxil naj?

**47** Yu' ree bén za' yagaj, chi bigueijn reeman, rëb reeman:

—Laaman cabejdx Elías, bén badëë xtiidx Dios loj ree bejn.

**48** Laa baxüün gajc tijbaman bicajdxaman tijb xiiil loj vinagr, abi' bacaaman laan loj tijb yag zianz badxigaman laan ro' Jesús din guië'man laan. **49** Per rëb los demazri reeman:

—Basa'nx, din yaguiaa ree don zidgaslaa Elías laax ya.

**50** Zianz gurixdiaj Jesús rejs da't stijb, dxel güjtaman. **51** Loj hor zii goxya' lajd nal lën yadooro' Jerusalén gojcan tio'p lala', diizd guijc guin xt guia' guin goxya'. Abi' guxu, gula' tëë ree guajro'.

**52** Guiáad ree baa bixal reen, abi' zien ree bejn bén naj xbejn Dios, bén ma güjt ree baban. **53** Dxel chi baban Jesús, barii lën xbaa reeman, abi' guyu reeman Jerusalén, lod baguiaa zien ree bejn laa reeman.

**54** Dxel suldad rniabee ree suldad në gra ree suldad za'nëman yagaj canaj reeman Jesús, chi baguiaa reeman caxu në gra ni cayajc, däd bidxeb reeman abi' rëb reeman:

—Walican Xi'n Dios bén guin.

**55** Zien ree bengunaa guzanal Jesús diizd Galilea, bén been tëë ree laaman yudar, za' reeman zift ruguiaa reeman ni cayajc. **56** Loj reeman no'ch María Magdalena, në Li xniaa Santiaaw con Xiëb netëë xniaa ree xi'ngaan Zebedeo.

### *Biguie'ch Jesús*

(*Mr. 15:42-47; Lc. 23:50-56; Jn. 19 :38-42*)

**57** Chi gure guiaal, bidxin tijb benrijcw laman Xiëb, bén Arimatea, në laaman binal Jesús.

58 Wejman loj Pilato, bignabaman xcuerp Jesús. Dxel gunabee Pilato bayü reeman cuerpa guin lojman. <sup>59</sup> Abi' cwa'man cuerpa guin batüübaman tijb lajd naya. <sup>60</sup> Dxel biquie'chaman laaman lén tijb baa cüb ni gudéenman par laagajcaman lén tijb guiaj. Zianz basiaawaman ro' baa guin con tijb guiajro', ziataman. <sup>61</sup> Abi' zojb María Magdalena con stijb bén la gajc Li, ro' baa guin.

### *Rajp ree suldad ro' xbaa Jesús*

62 Chi bareguiaal, dxej raziiladx ree bejn, wej ree bixhioz rniabee ree bixhioz nē ree bénfarisew, bigneenē reeman Pilato, <sup>63</sup> rēb reeman lojman:

—Dad, rasaaduladxan, chi ziz naban bén rusquiee ni, rēbaman guial chi gac choon dxej yabanman. <sup>64</sup> Zeel gunabee guiyaawdxi'ch ro' baa guin xt chi gac choon dxej, chitëë guit' ree xbejnman guxhin cwan reeman xcuerpaman. Abi' guiëb reeman loj ree bejn guial ma babanman. Abi' mazri gusquiee reeman bejn guial loj ni yaloj.

65 Dxel rēb Pilato loj reeman:

—Laa ree suldad za' yagaj. Gol chinë reeman, gol basiaawdxi'ch ro' baa guin zi'c rëndi.

66 Abi' zë reeman, dxel basiaawdxi'ch reeman ro' baa guin. Zianz basa'n reeman suldad guin ree cayajp reeman laan.

## 28

### *Raban Jesús*

(*Mr. 16:1-8; Lc. 24:1-12; Jn. 20 :1-10*)

1 Chi gudëd dxej raziiladx ree bejn, bareguiaal chidumingw, María Magdalena con stijb bén la

gajc Li biquiaa reeman ro' baa guin. <sup>2</sup> Dxel bi't tijb xodoxh, guial biguiajt tijb xianjl Dios diizd xanyabaa, dxel bibig anjl guin ro' baa guin biquiedaman guiaj nayaaw ro'n, zianz gurejman guijcan. <sup>3</sup> Dád rliajman bacha' zi'c chi rë'p nijs, guíaad xabaman naquichbëjn. <sup>4</sup> Chi baguiiaa ree suldad guin anjl guin, binij reeman guial dád bidxeb reeman xt badaj reeman abi' biyajb reeman luyuj. <sup>5</sup> Dxel rëb anjl guin loj ree bengunaa guin:

—Ad rdxebidi, ragbeen cayguiilidi Jesús bén cwa loj crüjz. <sup>6</sup> Per achutri laaman guie, ma babanman zi'c naman. Gol guida nial din guguaadi lod gudixh reeman laaman. <sup>7</sup> Yan, gol baxüün gol bicojn ree xbejnman guial ma babanman, ma nedaman lojdi zëgajman Galilea, ni guguaadi laaman. Ni nezan naj ni rugojnan lëjt.

<sup>8</sup> Dxel cari da't baza reeman ro' baa guin rdxeb reeman rabaa tée reeman, ruxüün reeman zia reeman zicojn reeman xbejn Jesús. <sup>9</sup> La'tgaj zia reeman, balüüloj Jesús loj reeman, bagajpdiozaman laa reeman. Abi' bibig reeman lojman, bazuxib reeman, gudiidx reeman guia'man, <sup>10</sup> abi' rëbaman loj reeman:

—Ad rdxebidi. Gol chej, gol biguiedx loj ree da bejnan din che reeman Galilea, ni guguiiaa reeman naj.

### *Ni rëb ree suldad*

<sup>11</sup> La'tgaj zia ree bengunaa guin, në tio'p choon ree suldad cayajp ro' baa guin zë luguiedx guin zicojn reeman bixhioz rniabee ree bixhioz gra ni goc. <sup>12</sup> Dxel wej ree bixhioz rniabee guin bigneenë

reeman guxtis Israel ree persi baya'n reeman diidx xhie güün reeman. Abi' dad zro' milia badëed reeman loj ree suldad guin, <sup>13</sup> rëb reeman:

—Con gol güwdx loj ree bejn: “Guxhin la'tgaj nadoodyëjsan, bi't ree xbejn Jesús abi' gulan reeman xcuerpaman.” <sup>14</sup> Abi' bal gagbee gobernador, dunujn yaneenë' laaman chitëë xhie güünnëman lëjt.

<sup>15</sup> Dixel cwa' ree suldad guin milia guin abi' been reeman zi'c rëb reeman. Laan naj diidx ni nare'ch loj ree bén Israel xt yan.

*Rxhiaal Jesús bén naj ree apóstoles  
(Mr. 16:14-18; Lc. 24:36-49; Jn. 20:19-23)*

<sup>16</sup> Guidxiptib ree xi apóstoles Jesús, wej reeman Galilea, guijc tijb guia' lod rëb Jesús che reeman. <sup>17</sup> Abi' chi baguiaa reeman Jesús, bazuxib reeman lojman, majsi yu' reeman ad bililadxza'ct. <sup>18</sup> Dixel bibig Jesús loj reeman, rëbaman:

—Dios ma banee gra guialrniabee din ganabeen xanyabaa në loj guidxliuj. <sup>19</sup> Zeel, gol chej guidib guidxliuj, gol biglüü ree bejn din gac reeman da bejnan. Gol baroobnijs reeman por dux Dad ree, por Xi'nman në por xSprijtaman, <sup>20</sup> gol balüü tée reeman din guzoob reeman diidx gra ni ma rnin lëjt. Abi' naj gazunë' lëjt gradxejczi xt chi nit guidxliuj. Amén.

## Xtiidx Dios

### New Testament in Zapotec, Santo Domingo Albarradas (MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

### Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

fb4ebcb8-e1f4-5bfc-b08c-f590e137d86d